

Pacuenia exanavanapa Jesús pitorobivi, apóstolevi

Pacuenia Jesús tajëvelia vajunupaeba Espíritu Santo pepatsijavanexatsica mapanacuayabetsicaje yabara pelivaisi

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiayapijibaxutota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoyaquinatsi.

² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiayapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. ³ Bajaraxuacujinae Jesús pijavajabitsaë beyaxuabatsi. Jesús petëpaecujinae

icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajësixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë Espíritu Santo. Bajaraponë yabara taxa Dioso najumecapanepaeya jumaitsi papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanapaenexa. ⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacatuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje pecopatsinexa, xamë vecuapitsapaeyaexanaename mapamatacabitaje? ¿Nexata tsaja

vajaviriavi judíovi juya evetsiaexanaename vajanacayanacuaevetsinexa? jai Jesús pijajivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëtane pamatacabi bajaraxua copiapatsijitsia.

⁸ Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabëpatsianica paxamëjavabetsica. Nexata panelivaisipaebanajetarubenaename Jerusalén tomarajava, Judea nacujava ata, Samaria nacujava ata, tajënacuatubujava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjëa petaejava.

¹⁰ Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje, Jesús pijajivi jemata bajarajota tsitanaitajëtatsi.

¹¹ Nexata ángelnëbeje jumaitsidebeje Jesús pijajivijavabelia:

—PaGalilea nacupijivimë, ¿detsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnëbeje Jesús pijajivijavabelia.

Pacuenia Jesús pijajivi natsicueyaitapeta Matíasvënëñe apóstolenëñexa yabara pelivaisi

¹² Jesús baja peponaecujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bजारapatsuto eca caekilómetrocuenia Jerusalén tomaravecua.

¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamonaie Jesús pijajivi apóstolevi, mapevënëñe. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexëñato. Itsanë Simón. Bजारaponë celotenë. Itsanë pevënë Judas, Santiago pejuyapijinë. ¹⁴⁻¹⁵ Pabota

Jesús pijajivi apóstolevi najinavanapa, athëbëyo pexanaeirajavatatsia, nacaetuatabiaba caejavata pevajëtabiabixexa Diosojavabelia. Jesús pena María, Jesús pejuyapijivi ata, itsapetiriavi ata yajava, nacaetuatabiaba pevajëtabiabixexa Diosojavabelia. Bजारapajivibitsaëto ciento veinte pajivibeje. Nexata penacaetuatsijavata bajarapamonae tuatuajëta Pedro nonotapuna. Pedro nexata jumaitsi penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajëvelia jumaitsi Dioso pejumelivaisibaxutota. Pacuenia bajayata Davidpijinë Espíritu Santo pejamatabëcueneta tajëvelia vajunupaebiaexanatsi Judaspijinë pexanaejavanexa, copiapata jane baja. Tsipaji

Judaspijinë itsa matacapona pamonaē Jesús vaetabijitsiatsi, Judaspijinë tocopiapatatsi baja pacuēnia Davidpijinë tajēvelia jumaitsi. ¹⁷ Judaspijinë picani paxanēyajuvēnēnēmi. Jesús picani bajaraponēmi itapeta penanacuēnēbinexa paxanēta. ¹⁸ Judaspijinë ira comuata pibisiacuēne pexanaematamopalatata. Bajaraponēmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pēnēmi pitsatajarabarena. ¹⁹ Daxita Jerusalén tomarapijivi vēnēlivaisitanetsi daxita xua tocopiapatatsi Judaspijinēmi. Nexata Judaspijinēmi pecomuatsiira, Jerusalén tomarapijivi vēnēruba Acéldama. “Acéldama,” itsa jai bajarapamonaē pijajumeta, mapajumetaje pejumaitsi jume: “Papalata pejamatabēcueneta jivitonē beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaitsi penacaetuatsivijavabelia:

—Salmosvēnēbaxutota tajēvelia Judaspijinē yabara comparaciōncuēnia jumaitsi mapacuēniaje:

Pijabo jivinebo xuabetsiana. Itsajivi ata apo ponaponaē tsane bajarapabota, jai tajēvelia Salmosvēnēbaxutota Judaspijinē apóstolenē penaexanaejavavecua pepitsapaejavanexa yabara.

Itsajavata Salmosvēnēbaxutota icatsia tajēvelia jumaitsi Judaspijinē yabara mapacuēniaje:

Bajaraponëmi penacuenebijavami, itsanë pitsiana, jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepitsapaejamatabëcuene, jai Pedro penacae-tuatsivijavabelia.

²¹ Icatsia Pedro jumaitsi:

—Caenë panetsicueyaajibi doce pa-ponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinexa. Bajaraxuata bitapetatsi itsanë pataneyanabinexa. Paxamë tuatujëta ena patanajuapënjinanapanapevi vajatuxanenë Jesús pamatacabi abaxë ponapona mapanacuataje. ²² Juanpijinë raja bautisaba Jesús. Bajara pamatacabijavaveliacujinae, panajuapënjinanapanajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinexa, jai Pedro penacae-tuatsivijavabelia.

²³ Nexata pamonaë nacaetuata, Dioso pe-jumecovënëtsivi, anijanëbeje itapeta, Pedrohana jane baja Jesús penajuapënjinanapanapevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. ²⁴ Bajaraxuacujinae bajarapamonae najumaitsi:

—Vajëtsianatsi Diosojavabelia va-janacayapëtaeyaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenënexa, panetsitajëre.
²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

2

Pacuenia jane baja athëbëvetsica Espíritu Santo patsica Jesús pijajivi petsijamatabëjonexatsi yabara pelivaisi

¹ Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostésvënëfiesta. Nexata bajarapamat-acabi daxita Jesús pijajivi nacaetuata caejavata.

² Nexata bajarapamat-acabi athëbëvetsica jemata najumeta bepinijijoviboxaneto. Nexata pabota Pedrohana nacaetuatená, daxitabo najumeteca. ³ Bajarapamonae tane athëbëvetsica

perunaejavatsica bepitarunutsicotia. Nexata bajarapamonae caejivi canacujitsia bajarapacotia tsimatanatsanaeyarunaicatsi. ⁴ Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipaebijava itsavirijumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsavirijumenëta natsipaebiaexanatsi.

⁵ Bajarapamatacabita Jerusalén tomarata jinavanapa ayaibitsaëtoخانeto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso. ⁶ Nexata bajarapamonae itsa jumetane bepiniijoviboxaneto athëbëvetsica penajumetsijava, nexata pabota Jesús pijajivi nacaetuatena, bajarapabota muxunanacaetuana ayaibitsaëtoخانeto bajarapamonae. Pavirijumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabarà Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilvaisianë. ⁷ Athëbëvetsica bepiniijoviboxaneto penajumetsijava pemuxunanacaetuanaevi, pinijicuenia najamatabëxainaeya jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë. ⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaxanae-javaveliacujinae vajanatsipaebijumenëta caëjëpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bजारapamonae apo judíovi ata, Dioso jumecovënëtavanapa pacuenia vaxaitsi judíovitsi jumecovënëtavanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi canacujitsia bajarapamonae Dioso pinijicuene pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetuanævi.

¹² Nexata daxita bajarapamonae ja-

matabëcuenenajunaviacanubena. Nexata
bajarapamonae najumaitsi:

—¿Detsa meta mapitsijamatabëcuene yabara it-
sije? najai.

¹³ Itsamonae saya jumecaponaeja jumaitsi
Jesús pijajivi yabara:

—Aitajibi ra saya mapamonaeje, jai.

*Pacuenia Pedro tsipaeba athëbëvetsica bepiniji-
joviboxaneto penajumetsijava pemuxunanacaetu-
anaevijavabelia yabara pelivaisi*

¹⁴ Apóstolenë Pedro nonotapuna once ponëbeje
apóstolevi yajava. Nexata Pedro pinijijumeta ju-
maitsi athëbëvetsica bepinijijoviboxaneto pena-
jumetsijava pemuxunanacaetuanavevijavabelia:

—Tajamonae judíovi, Jerusalén tomarata
panenapatsivi, panenamuxunaevere. Paxamë
ata Jerusalén tomarata paneenaevi, xaniavaetsia
panenamuxunaevere paneyapëtaenexa xua
yabara pacatsipaebijitsiatsi. ¹⁵ Paxamë

mapamonae yabaraje pajumaitsimë: “Aitajibi
ra saya mapamonaeje,” pajamë. Mara pamona
apo aitajibije. Bajayacunuaepato raja abaxë maje.
Bajarapaepatota jivi apo aitajibi tsabiabi. ¹⁶ Mara
pamona paxamë panijajumenëta Espiritu
Santo pejamatabëcueneta natsipaebiaexanatsije
pecopiapatsixae baja xua bajayata tajëvelia
Joelpijinë Diosojumepaebinëmi vajunupaeba.
Bajaraxua yabara Dioso pejumaitsijava Joelpijinë
bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënae
tsane mapanacua peverevececaenex-
aje, itorobianicajë Espiritu Santo

daxitanacuapijivi, pamonaе tajajivi
 petsijamatabëjonexatsi. Daxita panexi,
 pebijivi, petiriavi, paebiana palivaisi
 Espíritu Santo paebiaexanaenatsi, xanë
 talivaisi. Pevëjëavi pebijivi taena xua
 tsitajëtsianajë bemajitsinaebocuenia.
 Perujuvi pebijivi piamajitsinaejavata
 tsipaebianajë. ¹⁸ Nexata daxita pamonaе
 tanetonacuenebivi, pebijivi, petiriavi
 ata, bajarapamatacabi Espíritu Santo
 toitorobianicajë petsijamatabëjonexatsi.
 Nexata bajarapamonaе paebiana
 xanë talivaisi. ¹⁹ Tsitajëtsianajë
 itaboxotatsia pinijicuene taexanaejava.
 Daxita mapanacuajava ata pinijicuene
 taexanaejava tsitajëtsianajë. Ayai tsane
 pijana. Ayai tsane isotocotia. Ayai
 tsane petsëxë mapanacuataje. ²⁰ Nexata
 matabipijijuameto aitaquiri tsane.
 Meravipijijuameto bepijana itatsobia
 tsane. Bajara itsane mapanacuataje
 itsa baja peneta imoxoyo pevajënae
 tsane icatsia pepatsimatacabinexatsica
 pepo petuxanenë. Bajarapamatacabi
 bajaraponë pinijicuene pexanaejava
 pecaëjëpaenëcuenetsi, tsitajëtsiana
 daxitajivijavabelia. ²¹ Nexata pajivi
 navajëtsiana pepo petuxanenëjavabelia,
 bajarapajivi capanepaenatsi,” jai Dioso,

jai bajayata tajëvelia Joelpijinë Diosojumepae-
 binëmi Dioso pejumaitsijava bajaraxua yabara,
 jai Pedro athëbëvetsica bepinijijoviboxaneto pena-
 jumetsijava pemuxunanacaetuanævijavabelia.

22 Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pinijicuene pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuene pexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapiniijicuene.

23 Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tsipaji patocopatame piajamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajëvelia najamatabëxaina bajarapacuenia Jesús panebeyaxuabinexa. 24 Itsiata baitsi jane Jesús petëpaecujinae Dioso icatsia asaëyaexanatsi. Dioso capanepatsi petëpaejavavecua. Tsipaji Jesús Dioso pexënatoxae, acuenebi pematatoxenetsijavatsi petëpaejava.

25 Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaecujinae. Davidpijinë itsa yaquina Jesús pejumaitsijava Diosojavabelia icatsia piasaëjavanexa petëpaecujinae, yaquina mapejumaitsiitaneje:

Yapëtaniji Dioso taneyajavaponaponaejava. Tamuxuneneta ponapona, tacujuanenia. Bajaraxuata apo junavinë tsane.

26 Bajaraxuata jamatabëcuenebarëyanë tsane. Nexata jivijavabelia tsipae-

bianajë tajamatabëcuenebarëyajava.
 Bajaraxuata yapëtaniji tatëpaecujinae
 icatsia tasaëjavanexa. ²⁷ Xamë, Diosomë,
 apo necopatsimë tsane petëpaevi
 peponaenacuayabelia. Apo necopat-
 simënu tsane taperabëtsabanaenexa
 nexënatonë. ²⁸ Netsitajëtame baja cajena
 taponamenamutonexa taxainaenexa
 matabi apo pevereverecejava.
 Nejamatabëcuenebarëyaexaname itsa
 neyajavaponaname,

pejaiitane bajayata Davidpijinë yaquina Dioso pe-
 jumelivaisibaxutota Jesús pejumaitisijava Dioso-
 javabelia, jai Pedro athëbëvetsica bepinijijovibox-
 aneto penajumetsijava pemuxunanacaetuanæ-
 vijavabelia.

²⁹ Icatsia Pedro jumaiti bajarapamonæjav-
 abelia:

—Tajamonæ, jumenapebetsiaya pacatsipæ-
 bianatsi vajasalinainëmi Davidpijinë yabara.
 Bajayata baja tëpa Davidpijinëmi. Nexata
 mëthëtatsi. Yapëtanetsi itsajota mëthëtatsi.

³⁰ Davidpijinëmi raja Diosojumepæbinëmi
 profetanëmi. Davidpijinëmi baja cajena
 yapëtane pacuenia Dioso pexaniajajumeta
 najumecapanepæya jumaiti. Davidpi-
 jinëmijavabelia Dioso najumecapanepæya
 jumaiti mapacueniaje: “Pacuenia xamë
 evetame Israelnacua, bajara icatsia pacuenia
 bexëajavabelia caenë nemomoxiyajuvënënë
 evetsiana nevetsinacuami, Israelnacua,” jai
 Dioso najumecapanepæya mapacueniaje
 Davidpijinëmijavabelia Jesús yabara. ³¹ Davidpijinë

baja cajena tajëvelia yapëtane Jesús athëbëvetsica Dioso pitorobijavanexatsi jivi pecapanepaenexa. Tajëvelia yapëtanenua Jesús petëpaecujinae Dioso icatsia piasaëyaexanaejavanexatsi. Bjaraxuata bajayata Davidpijinë tajëvelia cajena vajunupaeba Jesús petëpaecujinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumaitsi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara. ³² Bjaraxuata Jesús baja icatsia Dioso asaëyaexanatsi petëpaecujinae. Jesús Dioso piasaëyaexanaejavatsi, daxita baja paxanë pataniji. Bjaraxuata pacatsipaebatsi. ³³ Jesús caponatsi athëbëabetsia Dioso pecujanenia peecaenexa. Nexata baja paxa Dioso rajutatsi Espíritu Santo pacuenia baja cajena najumecapanepaeya Dioso jumaitsi. Nexata bjaraxuacujinae Jesús juya itorobica Espíritu Santo paxanëjavabetsica. Nexata xua pinijicue pexanaejava, aeconoxae pataenubename, pajumetanemenua, palivaisianë mapamonae panijajumenëta pacatsipaebaje, bjaraxua Espíritu Santo pejamatabëcueneta exana. ³⁴ Itsiata baitsi jane ponë athëbëabetsia Dioso caponatsi, apo Davidpijinë. Davidpijinë bajayata tajëvelia Jesús yabara jumaitsi mapacueniaje: Dioso jumaitsi tajatuxanenëjavabelia: “Evetecare abaxë tacujanenia. ³⁵ Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai

Dioso tajatuxanenëjavabelia,
jai bajayata tajëvelia Davidpijinë Jesús yabara.

³⁶ 'Bjaraxuata daxita Israel nacuapijivi xani-avaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajara-ponë Jesús, Dioso exanatsi pepo petuxanenë. Bajara-ponë Jesús, Cristo cajena, ponë Dioso itorobica vajanacacapanepaenexa, jai Pedro athëbëvetsica bepinijijoviboxaneto penajumetsijava pemuxunanacaetuanaevijavabelia.

³⁷ Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabëjibireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pïtsicuene paexanaenajë patajaneconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamë pibisiacuene paneexanaejava pacopabare. Panajamatabëcuenepënëyorore Diosojavabelia. Nexata pacabautisabiana Jesucristo pejamatabëcueneta papecave-cuaajibiaexanaenexa daxita pibisiacuene paneexanaeneconi. Bajara jane xuacujinae Dioso pacarajutsiana Espiritu Santo papecatsijamatabëjonenexa.

³⁹ Dioso raja cajena jitsipa papecarajutsinexa Espiritu Santo. Dioso raja jitsipa panexijavabelia ata perajutsinexa Espiritu Santo. Dioso raja jitsipa itsanacuanëpijivi, tajënacuanëjava pejinavanapaevi ata, perajutsinexa Espiritu

Santo. Daxita pamonaē Dioso junatsiana pijajivinexa, tsijamatabējonēnatsi Espiritu Santo, jai Pedro bajarapamonaējavabelia.

⁴⁰ Bajarapacuenia Pedro itsa tsipaeba, itsalivaisi pematatsēnēa tsipaeba bajarapamonaējavabelia. Pedro pinijicuenia muxujioba bajarapamonaē. Pedro jumaitsi mapacueniajē:

—Pamonaē Jesús beyaxuaba, pibisiacuenē pexanaēvi, bajarapamonaē naxuabiana. Nexata paxamē ata bajarapamonaē paneyajavanaxuabiyāniva, pavecuanajamatabēcuenēpēnēyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovēnētatsi tres mil pajivimaxēto. Nexata daxita bajarapamonaē Jesús pijajivi bautisaba. Nexata bajarapamonaē najunua baja Jesús pijajivijavabelia. ⁴² Nexata bajarapamonaē jumecovēnēta palivaisi Jesús pijajivi apóstolevi tsipaebapona. Daxita bajarapamonaē Jesús pijajivi yajava, apóstolevinua yajava, najamatabēcuenejēpaeya jinavanapa. Daxita nacaetuatabiaba pevājēcabiabinexa Diosojavabelia. Nacaetuatabiabanua caejavata pexaenexa, penajamatabēnapitabiabinexa xua yabara Jesús sivatēpatsi.

Pacuenia jinavanapa pamonaē copiaya Jesús pelivaisi jumecovēnēta yabara pelivaisi

⁴³ Daxitajivi cūjunava Dioso. Tsipaji Dioso yavenonabiaba apóstolevi. Nexata apóstolevi Dioso pesaēta pinijicuenē pexanaējava, exanabiaba. ⁴⁴ Daxita pamonaē jumecovēnēta Jesús pelivaisi, nacaetuatabiaba

najamatabecuenejēpaeya. Bजारapamonae daxita pexainaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajarapamonaeyajuvēnēvi pexainaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bजारapamonae caematacabi canacujitsia nacaetuatabiaba templobota. Daxita bajarapamonae pijabonējava jamatabēcuenebarēyaya xaeyabiaba pexaejava najamatabēcuenejēpaeya. ⁴⁷ Nexata bajarapamonae jumai tsabiabi Diosojavabelia: “Diosomē, bitso ayaijamatabēcuenenēmē. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonae pexaniacuenia yaiyataeyabiabatsi. Nexata itsamonae ata, caematacabi canacujitsia Jesús pelivaisi jumečovēnēta pona pecapanepaenexatsi pibisiacuene pexanaeneconivecua. Bazarapamonae najonepona Jesús pelivaisi pejumečovēnētsivijavabelia.

3

Pacuenia apóstolenēbeje Jesús pejamatabēcueneta xanepanaeyaexanabeje apo pecaējēpaenētsi peponaponaejava yabara pelivaisi

¹ Judíovi caniviyoepatota, bejamatabēcuene a las tres, templobota vajēcabiaba Diosojavabelia. Nexata itsamatacabi, bajarapaepatota, Pedrobeje

Juanbeje naponabeje templobojavabelia.
² Ponë apo pecaējēpaenētsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponē etabiabatsi pijamonae. Nexata bajaraponē amoneya palata vajēcabiabeca bajarapabaupajava pejoneponaevita templobojavaberena. ³ Nexata itsa bajaraponē taeyeca Pedrobeje Juanbeje pejonenajetarucaejavabeje templobojavaberena, vajëqueca palata. ⁴ Nexata Pedrobeje Juanbeje naēcotabeje bajaraponējavabelia. Nexata Pedro jumaitsi bajaraponējavabelia:

—Panetaemabeje, jai Pedro.

⁵ Nexata bajaraponē naitaxutocaevetsiaya jamatabējumai tsecae:

—Nerajutsianabeje tsamē raja itsacuenejavayo, jamatabējai tsecae bajaraponē.

⁶ Pedro nexata jumaitsi bajaraponējavabelia:

—Palata raja apo xainaenē. Itsiata baitsi jane xua xainajē, carajutsianatsi. Jesucristo, Nazaret tomarapijinē, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponē pecujanenia pacobe, Pedro cobevaetabiyotsia. Bajarajota bajaraponē daxitaneniabeje asisaēreca baja. ⁸ Nexata bajaraponē jirevajunua. Petaxuta nuca. Ponapona baja. Nexata bajaraponē templobo enēabelia najoneya Pedrobeje Juanbeje pepēta. Bajaraponē jirevana-jetaruca. Jumai tsanajetaruca Diosojavabelia:

—Diosomë, ¡bitso ayaijamatabëcuenenëmë! ¡Tsi-paji baja nexanepanaeyaexaname! jai tsanjeta-rucae Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajut-sijava Diosojavabelia. ¹⁰ Bajarapamonae ita tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae ita tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templo ënëtuatuajëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponaeenëmi, Pedro pexanepanaeyaex-anaecujinae, Pedrobeje Juanbeje apo copatsitsibeje. Nexata templobo ënëtuatuajëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najua-maxëvaetabanucatsibeje. Nexata jivi ayaibitsaëto itaxutuaothopatsi. Jamatabëcuenenabenajaca bajarapamonae. ¹² Nexata Pedro ita tane bajarapamonae pejamatabëcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xuajitsia pajamatabëcuenenabenajacame maponë yabaraje? ¿Detsa xuajitsia bitso panenaëcobamebeje mapacueniaje? Paxanëbeje yabara meta pajamatabëjumaitsimë mapacueniaje: “Maponëbeje xanepanaeyaexanabeje apo pecajëpaenëmitsi peponaponaejava. Tsipaji baja

caējēpatsibeje bajarapacuene pexanaenexabeje. Bajarapacuene caējēpatsibeje tsipaji meta Dioso pitabarata aneconijibia ponaponabeje,” pajamatabējamē meta paxanēbeje yabara. Paxanēbeje raja patajamatabēcuenetabeje apo paexanaenēbeje bajarapacuene. Jesús raja exana bajarapacuene. ¹³ Vajasalinaivi baja cajena Abrahampijinē, Isaacpjinē, Jacobpjinē. Bajarapamonae pijaDioso pexēnato Jesús. Nexata Dioso jivi yapētaeyaexana Jesús bitso ayaijamatabēcuenē pexainaenēcuenē. Bajaraponē Jesús paxamē parajutame vajanacayanacuaevetsivi pecobeyabelia. Vajanacayanacuaevetsinē Pilato copatsijitsia ata Jesús, itsiata paxamē pajumesaēmē. Apo pajitsipaemē Pilato pecopatsijava Jesús. ¹⁴ Apo pavajēcaemē Pilatojavabelia pecopatsinexatsi Jesús, itsacueneneconiyo apo pexainaenē, pepo planeconijibinē. Caranata biji pibisiacuenē pexanaenē, jivibenē, pecopatsinexatsi, pajumesaēmē. Pavajēcame Pilatojavabelia jivibenē pepitsapaenexa penaneconitsivi pejebabiabibovecua. ¹⁵ Ponē Dioso itorobica vajanacarajutsinexa matababi apo peverevere-caejava, bajaraponē caranata pabeyaxuabame. Itsiata baitsi jane Jesús petēpaecujinae, Dioso icatsia asaēyaexanatsi. Bajarapacuene patataexae, pacatsipaebatsi. ¹⁶ Bajaraponē Jesús pejamatabēcueneta xanepanaeyaexanatsi baja maponēje, apo pecaējēpaenēmitsi pepon-aponaejava. Maponēje najamatabēcuenecopata Jesúsjavabelia. Bajaraxuata maponēje Jesús baja xanepanaeyaexanatsi paneitabarata,

panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:

—Tajamonae, yapëtaniji pacuene pacabarëexana itsamonae, papecaevetsivi yajava. Tsipaji apo payapëtaemë xaniavaetsia. Bajaraxuata pabeyaxuabame Jesús. ¹⁸ Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarapacuene Jesús baja tocopiapatatsi itsa pabeyaxuabame. Tsipaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujamatabëcuenemi. Panajamatabëcuenepënëyorore baja Diosojavabelia. Nexata pibisiacuene paneexanaeneconimi, Dioso pacavecuaajibiaexanaena. Nexata pacajamatabëcuene asaëyaexanaena Dioso.

²⁰ Tsipaji raja icatsia itsamatacabi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatacabi Dioso xanebijitsia daxitacuene, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspijinë

Jesús yabara jumaitsi mapacueniaje: “Pacuenia nitoroba xanë profetanënexanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. ²³ Tsipaji daxita pamona apo jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamona Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi papemomoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús

yabara. ²⁶ Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaejivimë canacujitsia papecayavenonaenexa panenajamatabëcuene pënëyorotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

4

Pacuenia Pedrobeje Juanbeje Jesús pelivaisi tsi-paebabeje tomaraevetsivijavabelia yabara pelivaisi

¹ Pedrobeje Juanbeje abaxë Jesús pelivaisi tsi-paebabeje bajarapamonaejavabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajaraponë capitán templobopijipolicíavi pevetsinë. ² Daxita bajarapamonae baraanaepanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaibeje tsaponae.

³ Nexata bajarapamonae vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. ⁴ Itsiata baitsi jane baja jivibitsaëttoxanetonë capanepaeya jumecovënētatsibeje pevaetabivajënaeyatsibeje.

Nexata daxita pamonaē jumečovēnēta Jesús pelivaisi, ēpebijivi namataējētatsi cinco mil ponēbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonaē nacaetuata Jerusalén tomarata.

⁶ Nexata bajarajota napata sacerdotenē Anás. Bajaraponē Anás sacerdotevi pepo penamata-caitorobinēmi. Napata Caifás ata. Napata Juan ata. Napata Alejandro ata. Napata itsamonaē ata, Anás pijamonaē. ⁷ Nexata Pedrobeje Juanbeje nutatsibeje daxita bajarapamonaē pitabarata. Nexata bajarapamonaē jumaitsi Pedrobeje Juanbejejavabelia:

—¿Jipatsa pejamatabēcueneta paxanepanaeyaexanamebeje apo pecaējēpaenēmitsi peponaponaējava? jai bajarapamonaē Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabēcueneyavenonatsi. Nexata Pedro jumaitsi bajarapamonaējavabelia:

—Paxamē judíovi paneevetsivi, paxamē ata pijinia paancianovimē, paneyanijobamebeje paneyapētaenexa ponē pejamatabēcueneta paxanepanaeyaexanajēbeje apo pecaējēpaenēmitsi peponaponaējava. Paneyanijobamebejenua paneyapētaenexa pacuenia paxanepanaeyaexanajēbeje bajaraponē. ¹⁰ Nexata pacatsipae-bianatsi daxita paxamē paneyapētaenexa daxita Israel nacuapijivi ata peyapētaenexa. Jesús, Nazaret tomarapijinē, ponē paxamē pacobematabiabarutame cruzajavabelia, bajaraponē

icatsia Dioso asaëyaexanatsi petëpaecujinae. Bajaraponë Jesús pejamatabëcueneta maponë paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaitsi comparacióncuenia mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. ¹² Caenë Jesús caëjëpatsi vajanacacapanepaenexa pibisiacuene vajaexanaeconivecua. Bajaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacacapanepaenexa Diosojavabelia, jai Pedro bajarapamonaejavabelia.

¹³ Bajarapamonae yapëtane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonae yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapëtanebeje pexanialivaisi. Saya bajaraponëbeje

penacuenebinēbeje. Nexata judíovi pevetsivi jamatabēcuenenabenajaca. Bajarapamonae nexata jamatabējumaitsi Pedrobeje Juanbeje yabara:

—Bajaraponēbeje cajena penaponaponaenēbeje Jesústa. Bajaraxuata bitso baja yapētanebeje bajarapalivaisi, jamatabējai.

¹⁴ Bajarapamonae tane apo pecaējēpaenēmitsi peponaponaejava penanucaejava Pedrobeje Juanbejejavata. Nexata bajarapamonae acuenebi pejumaitsijava: “Jume raja. Jesús raja pejamatabēcueneta apo xanepanae maponēje,” acuenebi pejaijava. Tsipaji apo pecaējēpaenēmitsi peponaponaejava Jesús pejamatabēcueneta ponapona baja. ¹⁵ Nexata bajarapamonae Pedrobeje Juanbeje caepatoyo navecuacapitsapatsibeje pecovēta ēpamonae penabarēcuaiicuaijainexa.

¹⁶ Nexata Pedrobeje Juanbeje pecovēta caepatoyo penavecuacapitsapaejavatatsibeje, bajarapamonae najumaitsi:

—¿Detsamē raja pacuene exanaenatsi bajaraponēbejejavabelia? Daxita Jerusalén tomarapijivi xaniavaetsia yapētane bajaraponēbeje pexanepanaeyaexanaejavabeje apo pecaējēpaenēmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaebeje raja bajaraponēbeje,” vajajaijava. ¹⁷ Pinijicuenia vaxaitsi bajaraponēbeje itavetsianatsi petsipaebiyavabeje matavējēa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai

bajarapamonae Pedrobeje Juanbeje pecovëta caepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevëalia pejonenexaliabeje, junaliatsibeje. Nexata jane baja bajarapamonae jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipae-baponamebeje Jesús pelivaisi. Pacoparebeje baja jivi panetsipaebaponaejavabeje Jesús pelivaisi, jai bajarapamonae.

¹⁹ Nexata Pedrobeje Juanbeje jumaitsidebeje bajarapamonaejavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. ²⁰ Acuenebi cajena patacopatsijavabeje jivi patatsipaebaponaejavabeje xua patanijibeje, palivaisi ata pajumetaniibeje, jaiibeje Pedrobeje Juanbeje bajarapamonaejavabelia.

²¹ Icatsia judíovi pevetsivi orijibia itavetatsibeje jivi petsipaebaponaeyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponaee Diosojavabelia:

—Diosomë, bitso ayaijamatabëcuenenëmë, jai tsaponaee.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexaabeje apo pecaëjëpaenëmitsi peponaponaejava. ²² Ponë

xanepanaeyaexanatsi Dioso pesaëta pinijicuene pexanaejavata, bajaraponë penaexanaecujinae xaina baja cuarenta pavaibeje pematatsënëa.

Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara pelivaisi

²³ Itsa baja Pedrobeje Juanbeje judíovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judíovi pijaancianovi ata pitavetsijavatsibeje.

²⁴ Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicuene ata. Nexanaenë ira ata. Nexanaenë daxita irapijicuene ata. Nexanaenë manumene ata. Nexanaenë daxita manuamenepijicuene ata. ²⁵ Xamë Diosomë, bajayata Espíritu Santo pejamatabëcueneta tajëvelia yapëtaeyaexaname patajasalinainëmi Davidpijinë. Nexata

nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamonaë apo judíovi, bitso anaepanabiabiana. Saya jema najamatabëxainabiabiana pexanaenexa picani xua apo caëjëpaetsi pexanaenexa. ²⁶ Pinijnacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonaë najamatabëxainaena, xamë Diosomë, nijacuene pecatobijianaenexa. Najamatabëxainaenanua pebejiobiaex-anaenexa Cristo, ponë itorobianimica jivi pecapanepaenexa,

jai bajayata tajëvelia Davidpijinë Espíritu Santo pejamatabëcueneta, Jesús pebejiobiaexanaejavanexatsi yabara, jai Pedrohana pevajëcaejavata Diosojavabelia.

²⁷ Icatsia Pedrohana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaeuatabeje itsanacuanëpijivi. Barënacaeuatabeje apo judíovi. Barënacaeuatabeje judíovi ata yajava. Bajarapamonaë nacaetuata penajumejaitsinexa pacuenia beyaxuabijitsiatsi nexënato Jesús, ponë athëbëvetsica itorobimica. Bajarapacuenia itsa barënacaeuatabeje, copiapata jane baja xua bajayata tajëvelia Davidpijinë vajunupaeba. ²⁸ Bajarapamonaë nacaetuata pexanaenexatsi daxita pacuenia baja cajena bajayata nexënato tocopatame pexanaenexatsi. ²⁹ Patajatuxanenë, yapëtaneme judíovi pevetsivi patanitavetsijava jivi patatsipaebaponaeyaniva nexënato pelivaisi. Paxanë panijajivinë. Nexata

panerajutsianame patanecaējēpaejamatabēcuene ajumejunavijibia jivi patatsipaebaponaenexa nexēnato pelivaisi. ³⁰ Itsa patomarata patsipaebianajē nexēnato pelivaisi, jamatejemaexanaenename piavitanevi. Pinijicuene nexanaejava exanaenename jivi peyapētaenexa bitso ayaijamatabēcuene nexainaenēcuene. Bajarapapinijicuene exanaenename nexēnato Jesús pejamatabēcueneta, jai Pedrohana pevajēcaejavata Diosojavabelia.

³¹ Itsa baja bajarapamonae vereta pevajēcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabēvēncatsi. Nexata bajarapamonae Espíritu Santo petsijamatabēvēnēcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovēnētsivi, xua xaina, daxita nacobenaxainaeyaveta yabara pelivaisi

³² Ayabitsaētozaneto Dioso pejumecovēnētsivi najamatabējēpaeya jinavanapa. Bajarapamonae xua xaina, apo najamatabēxainae caejivi pexainaenexa. Nexata daxita bajarapamonae xua xaina, nacobenaxaina daxita. ³³ Nexata apóstolevi asaēya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaēyaexanatsi vajatuxanenē Jesús petēpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovēnētsivi caenē ata apo yajuvēnēbejiobi pexinaejava yabara. Tsipaji

pamonae bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonaeyajuvënënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitsijume: “Jivi pejamatabëcuenebarëyayaexanaenë,” pejaijume. ³⁷ Nexata José ata pijaira canajeta. Bjaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia tēpabeje Ananíasbeje pijava Safirabeje, penajumetsënëtsixaebje apóstolenë Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje yajuvënëcanajetabeje pijaira. ² Nexata Ananíasbeje pijavabeje pijairamatamoyajuvënëpalata muetsia copatabeje. Bjaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamatamopalata panetsico-

betsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovënètame dovathi pecayamaxëitojorobijava nena-jumetsënëtsinexa Espiritu Santojavabelia? Xamë baja rovia nijairamatamopalata yajuvënëcopatame.

⁴ Nijairami necana-jetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitojorobijava najamatabëxainameje? Ëpaxanëjavaberena baja cajena apo najumetsënëtsimë. Najumetsënètame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitsijava, Ananías petëpaenë irata jopa. Nexata daxita pamona vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca. ⁶ Nexata pabota Ananías petëpaenë boca, bajarapaboyarena pevëjëavi jonna. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananíaspijinë pijava jonna. Bajarapova abaxë apo yapëtae pamona pevecuatëpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamata-motaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajēbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabēcuenejēpamebeje panenajumetsēnētsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemēthēcaevilia. Bajarapamonae icatsia xamē ata cacaponaelia pecamēthētsinexa, jai Pedro.

¹⁰ Nexata bajarajota Pedro pitabarata bajarapova ata icatsia petēpaeva irata jopa. Itsa jonena pevējēavi penaviabanajetarubenaevi, Ananíaspijinē pemēthēcaevilia, caxitajarababuata petēpanucaeva. Nexata icatsia bajarapamonae capitsapalia bajarapova pemēthētsinexa pamonami pemēthē muxuneneta. ¹¹ Nexata daxita Dioso pejumecovēnētsivi, itsamonae ata, pamonae bajarapajivibeje petēpaejava vēnēlivaisitanetsi, bitso junava.

Pacuenia apóstolevi pinijicuene pexanaejavanē exanapona Dioso pesaēta yabara pelivaisi

¹² Apóstolevi Dioso pesaēta exanapona pinijicuene pexanaejavanē Jerusalén tomarapijivi pitabarata. Daxita Dioso pejumecovēnētsivi nacaetuatabiaba templobo ēnētuatuajēta, Portal de Salomónvēnējavata. ¹³ Itsamonae, pamonae Dioso apo pejumecovēnētsivi, junava penanacaetuatsijava bajarapamonaeta. Itsiata daxita Jerusalén tomarapijivi pexaniacuenia yaiyataeyabiaba Dioso pejumecovēnētsivijavabelia.

14 Pevajënaeyabelia jivibitsaëtoxaneto jume-covënëtaþona Jesús pelivaisi, pebijivi, petiriavi ata. Nexata daxita bajarapamonae nanacae-tuatabiaba Dioso pejumecovënëtsivijavabelia.

15 Apóstolevi Dioso pesaëta pinijicuene pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecu. 16 Nexata jivibitsaëtoxanetonë patabiaba Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

*Pacuenia apóstolevi taicatsi penaneconitsiaex-
anaenexatsi yabara pelivaisi*

17 Sacerdotevi pepo penamatacaitorobinë yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsipaji cuenecaëbatsi.

18 Bajaraxuata taicatsi apóstolevi. Jebatsi penaneconitsivi pejebabiabibota. 19 Itsiata baitsi jane bajarapameravi Dioso pijaánel apóstolevi tobaupanatsi penaneconitsivi pejebabiabibo baupanë. Nexata ánel apóstolevi matacapitsapaliatsi. Angel jumaitsi apóstolevijavabelia:

20 —Paponare templojavabelia. Patsi-paebianame jivijavabelia mapapejanalivaisi, Dioso vajanacayajavaponaponaejava, jai ángel apóstolevijavabelia.

21 Apóstolevi itsa jumetane bajarapacuenia ángel pejumaitsijava, nexata ajena matabi tsina, apóstolevi ponalia templojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaevi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaje, jai.

22 Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, navi-abarena cobesa petsipaebinexa penacaetuatsivijavabelia. 23 Nexata templobopijipolicíavi jumaitsi bajarapamonaejavabelia:

—Itsa papaliajē penaneconitsivi pejebabiabibojavabelia, daxitabaupanē xaniavaetsia nabau-paxatabanubena. Bajarajota nubena picani pevetanubenaevi baupanē. Itsiata baitsi jane itsa pabaupatajē, caenē ata apo ecae bajarapabo ēnētuatuajēalia, jai policíavi.

24 Nexata templobopijipolicíavi pijacapitán, sacerdotevi penamatacaitorobivina, itsa jumetane

bajarapacuenia policíavi pejumaitsijava, bajarapamonaē jamatabējumaitsi:

—¿Detsamēra nexata itsi apóstolevi? jamatabējai bajarapamonaē.

²⁵ Nexata bajarapaepatota itsanē pebi parena, templobojavaverena peponaenē. Jumaitsi bajaraponē bajarapamonaējavabelia:

—¡Panejumetaema! Pamonaē pacajunuame penaneconitsivi pejebabiabibota, bajarapamonaē cajena nubena templobotalia. Jivijavabelia tsipaebanubena Jesús pelivaisi, jai bajaraponē.

²⁶ Nexata templobopijipolicíavi pijacapitán barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaējitsipa ibotonēta, jamatabējai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinua pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

²⁸ —Paxanē baja cajena pacajumaitsitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejume-covēnētsimē? Pataema jane pacuenia Jerusalén tomarata yacaējēpapona panetsipaebilivaisi. Paxamē jamatabēpaneneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinë bajarapacuenia pejumaitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovënëtsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovënëtsitsi.

³⁰ Paxamë Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaëyaexanatsi petëpaecujinae.

³¹ Nexata Dioso jumaitsi Jesúsjavabelia: “Ecare tacujuanenia. Xamë rabaja ayaijamatabëcuenenëmë. Jivi nevetsinë tsane. Necapanepaenënua tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabëcuene pënëyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabëcueneta daxitajivi aneconijibia petaenexa. ³² Nexata bajarapacueni yabara jivijavabelia itsa patsipaebaponajë, Espíritu Santo paneyajava tsabiabi. Dioso cajena rajutapona Espíritu Santo pamona jumecovënëta Dioso, jai Pedro, itsaapóstolevi yajava, daxita bajarapamonaejavabelia.

³³ Nexata daxita bajarapamona itsa jumetane bajarapacuenia Pedrohana pejumaitsijava, nexata bitso anaepana. Jamatabëbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonaeyajuvënënë judíovi pecujarubinë, Gamalielvënënë, nonotapuna daxita penajuavi

pitabarata. Bajaraponë fariseonë, Dioso Moiséspijinëta penajumecopatsilivaisi pecujarubinë. Daxitajivi peyaiyataenëtsi. Nexata Gamaliel itoroba apóstolevi caepatoyo pepitsapaenexalia. ³⁵ Nexata apóstolevi caepatoyo pepitsapaejavatalia, pecovëta, Gamaliel jumaitsi penajuavijavabelia:

—Tajamonae judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. ³⁶ Panajamatabënapire pacuenia Teudasvënënëmi bajayata exantsi. Bajaraponëmi picani nacua pevetsinënexa, ayaijamatabëcuenenë bitso jamatabënaexana. Nexata picani pijajivinexa pënajinavanapatsi cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepënajinavanapaevitsi, pamonaе pijajivinexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabi gobierno pejamatabëcueneta daxitajivi namataëjëtsi, Judasvënënëmi, Galilea nacuapijinëmi, bajarapacuenia pijinia jivi ayaibitsaëtoxaneto pënajinavanapatsi. Bajaraponëmi ata beyaxuabatsi. Nexata daxita pepënajinavanapaevitsi nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaeje apóstolevi yabara pacatsipaebijitsiatsi. Pëtsa paitsacueniabame bajarapamonae. Itsa bajarapamonae saya mapanacuapijivi pejamatabëcueneta tsipaebavanapaje, bepijia peneta bajarapamonae petsipaebilivaisi vereverecaena. ³⁹ Itsa jume, Dioso pejamatabëcueneta bajarapamonae

bajarapalivaisi jivi itsa tsipaebavanapa, nexata acuenebi tsipae paxamë bajarapacuenene panevereverecaeyaexanaejava. Belia ayaineconi panatsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonae jume-covënëtsi Gamaliel. Apóstolevi icatsia caevëlia pejonenexalia junaliatsi. Bajaraxuacujinae apóstolevi, caenë canacujitsia, ayaicuenia jumatitibabeponatsi penaneconitsivi pejumaconitabiabimacata. Itavetatsi icatsia matavëjëa jivi petsipaebiyanima Jesús pelivaisi. Bajaraxuacujinae copabatsi jane baja peponaenexa. ⁴¹ Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae. ⁴² Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

6

Pacuenia itapetatsi siete ponëbeje díaconovinexa yabara pelivaisi

¹ Jesús pelivaisi pejumecovënëtaponaevi, pevajënaeyabelia ayaibitsaëtöxanetonë tsaponae. Bajarapamatacabi Jesús pelivaisi jume-covënëtapona griegovi, judíovi ata. Nexata pamonajivi pevecuatëpaevanëtsi, pamonae bitso bejiobi, bajarapamonaejavabelia apóstolevi

rajutabiaba penamatavenonaejavanë. Nexata Jesús pelivaisi penajuajumecovënëtsivi, pamonaegriegovi, jumaitsi judíovijavabelia:

—Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panijavirivijavabelia rajutabiaba, bajaraxuavajëtonë patajavirivijavabelia apo rajutabiabi, jai griegovi judíovijavabelia.

² Doce ponëbeje, apóstolevi, najamatabëcuenejëpa pacuenia exanaejitsia judíovibeje griegovibeje penacobecaëbabiabixae. Nexata apóstolevi junata penacaetuatsinexa daxita pamonaeg Jesús pelivaisi pejumecovënëtsivi. Nexata baja itsa nacaetuata daxita bajarapamonaeg, apóstolevi jumaitsi bajarapamonaegjavabelia:

—Tajamonaeg, paxanë itsa patsicobetsanabiabijitsipajë pexaejava bitso penamatavenonaegvijavabelia, nexata apo panecuenecaëjëpabiabi tsipae jivi patatsipaebinxea Dioso pitorobilivaisi.

³ Nexata paitapetsianame siete ponëbeje, paxamëyajuvënëvi. Paitapetsianame papebijivi caejamatabëcuene pexainaevi, bitso petsijamatabëvënëcaevitsi Espíritu Santo, bitso peyapëtaeyaexanaevitsi Espíritu Santo pejamatabëcuene. Bajarapamonaeg paitorobianame bepejiobivijavabelia petsicobetsanabiabinexa penamatavenonaecuene.

⁴ Nexata paxanë saicaya patsitecavanapaenajë patavajëcabiabijava Diosojavabelia. Patsipaebabiabianajënu Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

5 Nexata daxita pamonaē nacaetuata, itsa jumetane bajarapacuenia apóstolevi pejumait-sijava, tsitaxanepanatsi. Nexata bajarapamonaē itapeta mapamatabëxëyoje. Itapeta Estebanvënënë, ponë bitso Dioso pejumecovënëtsinë, Espíritu Santo petsijamatabëvënëcaenëtsi. Itapeta Felipevënënë. Itapeta Prócorovënënë. Itapeta Nicanorvënënë. Itapeta Timónvënënë. Itapeta Parmenasvënënë. Itapeta Nicolásvënënë. Nicolás itsanacuapijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaaponapona. ⁶ Daxita bajarapamatabëxëyo pitapetsicujinaetsi, nubatsi apóstolevi pitabarata. Nexata pamonaē itapetatsi, caenë canacujitsia pematabocotojumavereca apóstolevi nacobebuatanubena Diosojavabelia petovajëtsijavata.

7 Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaëtoxaneto tsaponae Jesús pelivaisi pejumecovënëtsivi. Sacerdotevi ata ayaibitsaëto jumecovënëtaaponapona Jesús pelivaisi.

Pacuenia Esteban vaetabatsi penaneconitsiaex-anaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaëta pinijicuene pexanaejava, exanabiaba. Daxitajivi pitabarata Dioso pesaëta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonaē nacaetuatabiaba judíovi penacaetuatabibota.

Bajarapabo pevënë Esclavos Libertados. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonaeyajunëvi Esteban anaeya jumenotatsi. ¹⁰Nexata bajarapamonaeyajuvënëvi Esteban anaeya itsa jumenotatsi, Espiritu Santo yavenonatsi pejumecanaviatsijavata bajarapamonaejavabelia. Bajaraxuata

nexata daxita bajarapamonae Esteban apo jumecanaviatsicapanepaetsi juya. ¹¹Nexata pamonaе Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaе matamotatsi penajumetsënëtsinexa Esteban yabara, najumetsënëtsia jane baja jumaitsi jivijavabelia:

—Pajumetaniji pibisiacuenia Esteban pebaracuaicuaijaitsabiabijava Moiséspijinë. Pajumetanijinua pibisiacuenia pebaracuaicuaijaitsabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumait-sixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamonaе jane baja

matamota najumetsënëtsiaya peneconitsinexatsi Esteban. Nexata bajarapamonae itsa pata, jumaitsi Esteban yabara:

—Mara ponëje Esteban apo cueranae Dioso apo pejitsipaecuenia pebaracuaicuaijatsabiabijava templobo. Apo cueranaenua Dioso Moiséspijinëta penajumecopatsilivaisi ata pebaracuaicuaijatsabiabijava. ¹⁴ Pajumetaniji maponëje pejumaitsijava: “Jesús, Nazaret tomarapijinë, xuabianica mapatemploboje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamona matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpaejavatatsi, betsita ángelnëitabara tsarucae Esteban.

7

Pacuenia Esteban jumecanaviata sacerdotevi pepo penamatacaitorobinë yabara pelivaisi

¹ Sacerdotevi pepo penamatacaitorobinë jumaitsi Estebanjavabelia:

—¿Xaniajai tsabaja? ¿Jumaitsimë tsabiabi pacuenia mapamonae caneconitsiajumaitsiye? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumaitsi mapacueniaje:

—Tajamonae, patanevetsivimë, panenamuxu-naevere. VajaDioso bitso ayaijamatabëcuenenë. Tsitanaitajëta baja cajena bajayata vajasalinainë Abrahampijinëjavabelia. VajaDioso tsitanaitajëta Abrahampijinëjavabelia abaxë Abrahampijinë itsa ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuyabelia. ³ Dioso jumaitsi Abrahampijinëjavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinëjavabelia. ⁴ Bajaraxuata Abrahampijinë Caldea nacujavaverena pona. Nexata pata Harán nacuyaberena. Bajarapanacuata Abrahampijinë itsa ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaecujinaetsi, Dioso icatsia Abrahampijinë varapaeyaexanatsi mapairajavaberena, itsajota vaxaitsi aeconoxae jinavanapatsi. ⁵ Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaitsi Abrahampijinëjavabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi itsa apo xinae, bajarapacuenia Dioso najumecapanepaeya jumaitsi Abrahampijinëjavabelia. ⁶ Icatsia Dioso tajëvelia jumaitsi Abrahampijinëjavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena

pepatsivixae tsane, bajarapanacuapijivi
 pijajivi exanaenatsi. Bepejiobicuenia
 nacuenebiaexanabiabianatsi. Cuatrocientos
 pavaibeje nemomoxi bepejiobicuenia
 jinavanapaena bajarapanacuatalia. ⁷ Xanë
 nexata naneconitsiaexanaenajë panacuapijivi
 nemomoxi pijajivi exanaenatsi. Bajaraxuacujinae
 nemomoxi bajarapanacuavecua pitsapaena.
 Nexata icatsia mapanacuayaberena je patsiana.
 Nexata mapanacuataje xanëjavaberena
 najamatabëcuenecopatsiaya navajëcabiabiana,” jai
 baja cajena tajëvelia Dioso Abrahampijinëjavabelia.
⁸ Nexata Abrahampijinë Dioso itorobatsi
 peperabëcaucutaponaenexa daxita papebinacuetoxi
 naexana Abrahampijinë pijabota, baitsi
 peboupiperabëcaucutaponaenexa. Bajarapacuenia
 Abrahampijinë pexanaenexa Dioso itorobatsi
 Abrahampijinë penajamatabënapitabiabinexa
 Dioso peyavenonaeyapaebijavatsi. Nexata
 Abrahampijinë pijava vecuanaexanatsi pebinëyo.
 Bajaraponëyo pevënë Isaac. Nexata baja
 penacuetonëyo penaexanaecujinae, ocho
 pamatacabibeje itsa xaina, Abrahampijinë
 boupiperabëcaucuta pexënatonëyo pacuenia
 Dioso itorobatsi. Bajaraxuacujinae icatsia
 juya Isaacpijinë pexënato xaina. Isaacpijinë
 pexënato pevënë Jacob. Bajara icatsia pacuenia
 Isaacpijinë ata boupiperabëcaucuta pexënatonëyo.
 Bajaraxuacujinae icatsia Jacobpijinë pexi xaina
 doce ponëbeje. Bajara icatsia pacuenia Jacobpijinë
 ata boupiperabëcaucuba pexi. Bajarapadoce
 ponëbejejavaverena penaexanaponaevi
 doce pabitsaëtobeje naexana, jai Esteban

sacerdotevi penamatacitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹ Icatsia Esteban jumaitsi bajarapamonaejavabelia:

—Nexata Jacobpijinë pexi, ponëbeje nacaemon-aemi, vaxaitsi vajasalinaivi. Bajarapamonaemi pejuyapijinë Josépijinë. Nexata Josépijinë cuenecaëbatsi pematapijivi. Bajaraxuata Josépijinë pecaponaenexatsi Egipto nacuyabelia, canajetaxuabatsi pematapijivi. Itsiata Josépijinë Dioso yajavaponaponatsi. ¹⁰ Nexata Josépijinë bepejiobiaexanaejavaminexatsi Egipto nacuada, vecuapanepaponapona. Dioso daxitacuene Josépijinë Egipto nacuada yapëtaeyaexanaponatsi. Bajaraxuata Egiptonacua pevetsinëmi, Josépijinë pexaniajamatabëcuenia tanetsi. Nexata Egiptonacua pevetsinëmi tocopatatsi Josépijinë pecobenaevetsinexa Egiptonacua. Egiptonacua pevetsinëmi pijabo ata petoevetsinexa, Josépijinë tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuada vajasalinaivi jane baja apo xinae pexaejava.

¹² Itsiata Egipto nacuada janibovajënaeya, Josépijinë pecomuaquejebijava ayaijava xaniavaetejeba trigoxu. Nexata Jacobpijinë vënëtane Egipto nacuada pexaejava pexinaejava trigoxu. Nexata Jacobpijinë pexi itoroba Egipto nacujavabelia pesivaponaenexalia

pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinë pexi, pamonae jane baja vajasalinaivi. Itsiata Jacobpijinë pexi pejuyapijinëjavata comuacae ata, apo yapëtae pejuyapijinëcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinë jumaitsi pematapijivijavabelia: “Xanë raja Joséne panejuyapijinëne,” jai Josépijinë. Bajaraxuata nexata Egipto nacuaevetsinëmi yapëtane bajarapamonae Josépijinë pijamonaecuene. ¹⁴⁻¹⁵ Nexata Josépijinë tonajumexuaba paxa Jacobpijinë penavarapaenexa Egipto nacuyabelia. Nexata Jacobpijinë daxita pexi, pemomoxi yajava, varapa Egipto nacuyabelia. Nexata Jacobpijinë, daxita pexi, pemomoxi yajava, itsa pata Egipto nacuata pejinavanapaenexa, nanamataëjëta setenta y cinco pajivibeje. Bajaraxuacujinae Egipto nacuata Jacobpijinë tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexëajavabelia vajasalinaivimi jane baja petēpaevimi pesijebinexatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijinë abaxë itsa asaë vajasalinaivimi pevajënaeya, comuata bajarapaibovaju. Hamorpijinë pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

¹⁷ Icatsia Esteban jumaitsi bajarapamonaejav-

abelia:

—Nexata baja itsa panepapona beja-matabëcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinë pemomoxi, vajasalinaivimi jane baja, ayaibitsaëtoxaneto tsaponae Egipto nacuata. Nexata jane baja pijinia imoxoyo pevajënae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinëjavabelia, baitsi jane baja Dioso pejamatabëcueneta vajasalinaivimi pejutsinexatsi Egipto nacuaverena pejinavanapaenexa Canaán nacuata. ¹⁸ Nexata bajarapamatacabi itsanë junua pevetsinexa Egiptonacua. Ponë Egiptonacua pejanaevetsinë, bajaraponë apo yapëtae Josépijinë Egiptonacua pevetsinëmicuene. Tsipaji baja bajayata, bajaraponë pevajënaeya, tëpa baja Josépijinë. ¹⁹ Nexata Egiptonacua pejanaevetsinë, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejibiaexanabiabatsinua. Vajasalinaivi pexi pebinëyo itsa tonaexanatsi, nacuaevetsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. ²⁰ Bajarapamatacabi naexana Moiséspijinë. Moiséspijinë bitso pexanianacuetonëyo. Dioso barëya tanetsi. Nexata Moiséspijinë penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspijinë paxabeje penabeje xuabatsi baja. Nexata nacuaevetsinë pexënatoyo Moiséspijinë pitatsi nacoxyabijitsiatsi. Nexata

nacuaevevtsinë pexënatoyo Moiséspijinë vitsatatsi pexënatonëyocuenia. ²² Nexata Moiséspijinë cujarubatsi daxitacuene, xua Egipto nacuapijivi yapëtane. Nexata Moiséspijinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itsa baja Moiséspijinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. ²⁴ Nexata baja Moiséspijinë pona petaenexa pijamonae. Nexata baja Moiséspijinë itsa ponapona panacuata pijamonae jinavanapa, Moiséspijinë pitabëta Egipto nacuapijinë tobejio-biaexanatsi pijamonaenë. Nexata Moiséspijinë bajarajota pijamonaenë yamatamobeyaxuaba Egipto nacuapijinë. ²⁵ Moiséspijinë nexata jamatabëjumaitsi: “Daxita tajamonae, Israelpijinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moiséspijinë. Itsiata baitsi jane Moiséspijinë pijamonae bajarapacuenia apo sivajamatabëjumaitsi. ²⁶ Moiséspijinë pebeyaxuabicujinae Egipto nacuapijinë, icatsia meravia pitsijavata, Moiséspijinë caxitajaraba anijanëbeje penabejavatabeje. Bajaraponëbeje Moiséspijinë ëpijamonaenëbeje, Israelpijinë pemomobeje. Nexata Moiséspijinë xaniavaetsia

itaveta penabeyanivabeje matavëjëa. Jumaitsi: “¡Panabejitsipamebeje! Panapijamonaenëmëbeje raja. ¿Detsa xuajitsia panabiamebeje?” jai Moiséspijinë. ²⁷ Nexata ponë matapita penabejavabeje, torotajarabatsi Moiséspijinë. Bajaraponë jumaitsi Moiséspijinëjavabelia: “¿Jipatsa catocopata patanevetsinënexamë? ¿Jipatsa catocopata, pibisiacuene itsa paexanajë, pataneconitsiaexanabiabinexamënuu?”

²⁸ ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi Moiséspijinë pijamonaenë.

²⁹ Nexata Moiséspijinë itsa jumetane bajarapacuenia pejumaisijavatsi pijamonaenë, nexata Moiséspijinë najetabajirava Madián nacuayabelia. Bajarapanacuatalia ponapona. Nexata bajarapanacuatalia Moiséspijinë nacojioba. Xaina anijanëbeje pexënatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moiséspijinë peponaponaecujinae Madián nacuata, Dioso tsitanaitajëtatsi beángelnëcuenia. Bajarapacuenia tsitanaitajëtatsi petusato nacuata, Sinaivënëtsuto canacujitsita. Tsiquirinaemëyo petajueyecaecotia tuatuajëta, tsitanaitajëtsitsi Dioso Moiséspijinë. Itsiata tsiquirinaemëyo apo veriajavitsi.

³¹ Moiséspijinë itsa tane, jamatabëcuenenabenajaca. Nexata cujitalia xaniavaetsia imoxoyo

petauenexa tsiquirinaemëyo petajueyecaecotia. Nexata bajarapacotiajavaverena Dioso jumaitsi Moiséspijinëjavabelia: ³² “Xanë raja nijasalinaivimi pijaDiosonë. Abrahampijinë, Isaacpijinë ata, Jacobpijinë ata, pijaDiosonë,” jai Dioso. Nexata bajarajota Moiséspijinë neconecojai pecajunavi. Apo naëcotsilia baja icatsia matavëjëa. ³³ Nexata icatsia bajarapacotiajavaverena Dioso jumaitsi Moiséspijinëjavabelia: “Nataxujonore nijazapato. Tshipaji raja taitabarata nucame. ³⁴ Taniji rabaja tajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsinueyabi-abijava. Nexata runaicajë bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moiséspijinëjavabelia tsiquirinaemëyo petajueyecaecotiajavaverena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moiséspijinë Dioso itorobatsi pepon-aenexa Egipto nacuayabelia, vajasalinaivimi Egipto nacuata pebejiobiaexanabiabijavatsive-cua pejutsinexa Egipto nacuaverena. Moiséspijinë peponaevajënaeya Egipto nacuayabelia, pamatacabi abaxë Moiséspijinë ponapona panacuata vajasalinaivimi jinavanapa, bajarapamatacabi vajasalinaivimi Moiséspijinë navecuaitavetatsi. Vajasalinaivimi jumaitsi Moiséspijinëjavabelia: “¿Jipatsa catocopata patanevetsinëexamë?

¿Jipatsa catocopata, pibisiacuene itsa paexanajë, pataneconitsiaexanabiabinexamënuu?”
 jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moiséspijinë peponaenexa vajasalinaivimijavabelia. ³⁶ Moiséspijinë nexata pona Egipto nacuyabelia. Nexata Egipto nacuata Moiséspijinë Dioso pesaëta pinijicuene pexanaejava, exanapona. Bajaraxuacujinae Moiséspijinë Egipto nacuaverena vajasalinaivimi jane baja matacanajetaruca. Nexata Moiséspijinë epatuarena Rojovënë manuumene maxëranajavata, Dioso pesaëta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanë icatsia Dioso pesaëta pinijicuene pexanaejavanë, Moiséspijinë exanapona. ³⁷ Bajarapamatacabi cajena Moiséspijinë jumaitsi vajasalinaivimijavabelia: “Pacuenia xanë Dioso nitoroba Diosojumelivaisi jivi tatsipaebinënexa profetanëexanë, bajarapacuenia Dioso pacatoitorobianica itsanë profetanë Diosojumelivaisi papecatsipaebinënexa. Bajaraponë paxamëyajuvënë tsane. Bajaraponë pajumecovënëtsianame,” jai cajena Moiséspijinë bajayata tajëvelia vajasalinaivimijavabelia Jesús yabara. ³⁸ Moiséspijinë barënacaetuata vajasalinaivimi petusato nacuata, Sinaivënë tsutomuxuneneta. Nexata Sinaivënë tsutojumabetsia caenë Moiséspijinë junaya. Nexata Sinaivënë tsutojumatsia Moiséspijinë ángeljavabelia tocaicuaijai vajasalinaivimi. Nexata Moiséspijinëta Dioso penajumecopat-

silivaisi jivi pejumecovënëtsinexa, Sinaívnë tsutojumatatsia tonajumecopatatsi. Bajarpalivaisi Dioso najumecopata Moiséspijinëta vaxaitsi ata bajarapalivaisi vajaxainaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:

—Vajasalinaivimi apo jamatabëjumecovënëtsi Moiséspijinë. Apo jitsipae cajena matavëjëa penamatacaitorobinënexatsi. Vajasalinaivimi picani najamatabëxaina epatua Moiséspijinë pepepënaviabinxatsi Egipto nacuyabelia.
⁴⁰ Moiséspijinë bajayajebi ponaponaya Sinaívnë tsutojumatatsia. Nexata Moiséspijinë pecovëta vajasalinaivimi jumaitsi Aarónpijinëjavabelia: “Exanare diosovi vajanacamatacaponaenexa. Apo yapëtaetsi rabaja pacuenia exanatsi Moisés vajanacamatacaponaenë Egipto nacuverena,” jai. ⁴¹ Nexata vajasalinaivimi becerro jumapecataeya exana oronë. Nexata bajarapajumapenëjavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabëcuenebarëyaya fiesta exana pecobeta pexanaexae oronë. Tsipaji bajarapajumapenë vajasalinaivimi bepíjadosonë tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabëcueneocopatsiaya penavajëcabiabinexa itaboxopíjitulupujavabelia. Diosojumepaebinë

profeta peyaquinaebaxutota, Dioso peju-
maitisjava vajasalinaivimi yabara jumaitsi
mapacueniaje:

Israelpijinē papemomoximē, pamatacabi abaxē
pajinavanapame cuarenta pavaibeje
petusato nacuatalia, pabeyabiabi atamē
baca, oveja yajava, bajarapavi xanē
apo panerajutabiabimē ofrendacuenia.
⁴³ Bajarapavi parajutabiabame
ofrendacuenia panenatoexanaedioso-
vijavabelia. Tsipaji bajarapamatacabi
pacajinavanapame carpabo bepanija-
diosonē panetaenē Molocvënēdiosonē
pijabonexa. Pacajinavanapamenua
tuluputo, jumapecataeya panenatoex-
anaetuluputo, Renfánvënētuluputo.
Nexata bajarapatuluputo pataneme
bepanijadioso. Panecobeta saya
paneexanaediosovi, pacajinavanapame
najamatabēcuenecopatsiaya bajarapa-
diosovijavabelia panenavajēcabiabinexa.
Bajaraxuata panijanacuavecua paca-
caponaeayaexanaenatsi Babilonianacua
pënëyabelia pairajavabelia,

jai Dioso pejumaitisjava mapacueniaje profetanē
peyaquinaebaxutota vajasalinaivimi yabara, jai
Esteban sacerdotevi penamatacaitorobivijav-
abelia, judíovi pijaancianovijavabelia ata, judíovi
pecujarubivijavabelia ata.

⁴⁴ Icatsia Esteban jumaitsi bajarapamonaejav-
abelia:

—Bajayata vajasalinaivimi itsa jinavanapa
petusato nacuata, cajinavanapa Dioso

pijacarpaboxaneto, bajarapabota Diosojavabelia
 pevajëtabiabinexa. Nexata Dioso Moiséspijinëta
 penajumecopatsilivaisi, Dioso peyaquinaei-
 bopanayobeje, vajasalinaivimi xaniavaetabu-
 atabiaba bajarapacarpabo ënëtuatuajëta.
 Copiaya Moiséspijinë jumapecataeya Dioso
 tsitajëtatsi pacuenia bajarapacarpabo
 exanetsijitsia. Nexata juya Moiséspijinë itoroba
 vajasalinaivijavabelia. Nexata vajasalinaivimi
 exaneta bajarapacarpabo pacuenia Dioso
 cuenecataeya tsitajëtatsi Moiséspijinë.
⁴⁵ Bajaraxuacujinae bajarapacarpabo rajutatsi
 vajasalinaivimi pecajinavanapaenexa.
 Nexata vajasalinaivimi itsabelia varapa,
 caponabiaba bajarapacarpabo. Moiséspijinë
 baja itsa tëpa, Josuépijinë juya matacopona
 vajasalinaivimi. Josuépijinë nexata pamatacabi
 vajasalinaivimi matacanajetaruca, caparena
 bajarapacarpabo mapanacuayaberenjaje. Nexata
 vajasalinaivimi vajabitsaë exana mapanacuataje
 pejinavanapaevimijavabelia. Nexata vajasali-
 naivimi mapairaje yacajërëta. Pamatacabi
 Josuépijinë vajasalinaivimi matacanajetaruca
 mapanacuayaberenjaje, Dioso rëcëpecaeyaexanatsi
 mapanacuapijivimije Josuébana pevajënaetarena.
 Nexata bexëjavaberena ata, pamatacabi
 Davidpijinë mapanacua evetaje, vajasalinaivimi
 abaxë cajinavanapa bajarapacarpabo. ⁴⁶ Nexata
 Dioso pexaniajamatabëcuenia tanetsi Davidpijinë,
 mapanacuaje pevetsinëmi. Nexata picani
 Davidpijinë bitso jitsipa Dioso pijabonexa
 templobo pexanaeyaexanaenexa. Baitsi paDioso
 bajayata Jacobpijinë jumecovënëta, Davidpijinë

jane baja pamopijjinēmi. ⁴⁷ Itsiata baitsi jane Davidpijinē Dioso apo tocopatsitsi templobo pexanaeyaexanaenexa. Davidpijinē pexēnato, Salomónpijinē, Dioso pijabonexa templobo exanaeyaexana, Davidpijinē baja pepuatēpae. ⁴⁸ Pepo Dioso athēbētatsia peecaenē, bajaraponē apo ponaponae bota, jivi pexanaebota. Diosojumepaebinē profetanē bajayata jumaitsi mapacueniaje Dioso pejumaitsijava:

⁴⁹ Athēbētatsia daxitacuene taevetsinē. Mapanacuajava ata taevetsinē. ¿Detsa nexata xuajitsia bo panetoexanetsipame? Apo namatavenonaenē cajena bo tanacueraevetsinexa. ⁵⁰ Xanē daxitacuene taexanaenē,

jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabēcuenetajavi. Paneamatabocotajavinua. Apo pajumecovēnētsimē Dioso pejumelivaisi. Apo pacopatsimē Espíritu Santo papecatsijamatabējonenexa. Pacuenia panijasalinaivimi bajayata itsi, bajara saya icatsia paxamē paitsimē. ⁵² Diosojumepaebivi profetavi tajēvelia vajunupaebapona Cristo, pepo planeconijibinē pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamē pijavajabitsaē pecobeyabelia pacanajetaxuabame. Bajarapacuenia Cristo

pabeyaxuabame. ⁵³ Angelevi pacarajutsi ata Dioso Moiséspijinëta penajumecopatsilivaisi jivi pejumecovënëtsinexa, itsiata paxamë apo pajumecovënëtsimë bajarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

*Pacuenia Esteban beyaxuabatsi yabara peliv-
aisi*

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane. ⁵⁵ Itsiata Esteban bitso jamatabëcuenevënëca Espíritu Santo. Esteban athëbëa benaëcotsia. Nexata tane Dioso pijapenivenivenaecotia. Taenutsianua Jesús penuceajava paxa Dioso pemuxuneneta, pecujuanenia. ⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujuanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxita caecuenia cujibarenatsi Esteban pevaetabinexatsi.

⁵⁸ Bajarapamonae Esteban caponaliatsi tomarapënëyabelia. Nexata tomarapënëtalía Esteban tseconatsi ibotonëta. Nexata daxita

pamonae jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petsec-onaevajënaetsi ibotonëta, bajarapamonae penajumajonejebijavanë pevëjëato Saulovënënë evetsiaexanatsi. ⁵⁹ Petseconanubenaejavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tëpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinë baja itsa beyaxuabatsi, Saulo tsitaxanepanatsi. Nexata pebijivi, pamonae Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxuxuaba pebejiobiaexanaponaejava Jesús pelivaisi pejumecovënëtsivi Jerusalén tomarata. Saulo jane

baja jaitaruta Jesús pelivaisi pejumecovënëtsivi Jerusalén tomarata. Caebo canacujitsia jonepona. Nexata taicapona pebejivi, petiriavi ata, pamonaē Jesús pelivaisi pejumecovënëtsivi. Penaneconit-sivi pejebabiabiboyabelia Saulo cajonepona bajarapamonae. Nexata ayaibitsaëtoxaneto Jesús pelivaisi pejumecovënëtsivi, Jerusalén tomarapijivi, rëcëpeca itsatomaranëjavabelia. Itsamonae rëcëpeca Samaria nacuyabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënëtsivi, tsipaebapona Samaria nacujava yabara pelivaisi

⁴ Pamonaē Jesús pelivaisi pejumecovënëtsivi, rëcëpeca Jerusalén tomaravecuā. Nexata itsax-uayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. ⁵ Pamonaē rëcëpeca yajuvënënë, pevënë Felipe. Bajaraponë lia Samaria nacuatā peecae-tomarajavabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsaponaē Felipe Samaria nacuatā peecaetomarapijivijavabelia.

⁶ Itsa patomarata Felipe Jesús pelivaisi tsipaebabiaba, jivi ayaibitsaëtoxaneto nacaetu-atabiaba. Daxita bajarapamonae xaniavaetsia namuxunaevetabiaba Felipe ita tsipaebabiaba Jesús pelivaisi. Bajarapamonae tane Felipe Dioso pesaëta pinijicuene pexanaejavanë. ⁷ Pamonaē dovathi peyajavajinavanapaevi, Felipe vecuacapitsapabiaba. Dovathi pinijijumeta

aėjai tsabiabi itsa vecuacapitsapabiaba Felipe. Nexata dovathi peyajavajinavanapaevimi, jamatejema baja tsabiabi. Pamonaē ata petabusipacuenabivitsi, pejayujayunaēvi ata, jamatejemayaexanapona Felipe.
⁸ Bajaraxuata daxita bajarapatomarapijivi jamatabēcuenēbarēya.

⁹ Bajarapatomarata Simónvēnēnē ponapona. Bajaraponē jivi pejorobabiabinē. Bajayajebi daxita Samaria nacuapijivi yamaxēitojorobaponapona. Simón jumai tsabiabi bajarapatomarapijivijavabelia:

—Xanē bitso jivi taxaniavaetsinē, jai tsabiabi.

¹⁰ Daxitajivi, petuxanēvi ata, Simón pejumait-sijava namuxunaēvetabiabatsi. Bajarapamonae nexata Simón yabara jumai tsabiabi:

—Maponēje Simón pinijicuene pexanaejava caējēpatsi. Dioso raeta yavenonatsi, jai tsabiabi bajarapamonae Simón yabara.

¹¹ Bajarapacuenia Samaria nacuapijivi xaniavaetsia jumecovēnētabiaba tsipaji Simón pejorobicueneta bajayajebi jivi yamaxēitojorobabiaba. ¹² Nexata Felipe Samaria nacuapijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jumecovēnēta Felipe petsipaebilivaisi. Bajarapamonae pebijivi, petiriavi ata, Felipe bautisaba.

¹³ Nexata jane baja Simón jivi pejorobabiabinē ata jumecovēnēta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepēta naponapona Simón. Nexata

Simón jamatabëcuenenabenajacabiaba itsa taeyabi-
aba Dioso pesaëta Felipe pinijicuene pexanapon-
aejavanë.

¹⁴ Nexata apóstolevi Jerusalén tomarata peji-
navanapaevi, vënëlivaisitane Samaria nacuapijivi
Dioso pitorobilivaisi pejumecovënëtsijava. Nexata
apóstolevi jumaitsi peyajuvënënëbejejavabelia:

—Pedro, paxamëbeje Juanbeje, pataemeliabeje
Samaria nacuapijivi, pejumecovënëtsivi Dioso
pitorobilivaisi, jai apóstolevi.

Nexata Pedrobeje Juanbeje ponabeje.
¹⁵ Itsa bajaraponëbeje patabeje Samaria
nacuayabelia, tovajëtabeje Diosojavabelia
Espíritu Santo petsijamatabëpatsinexatsitsica
Samaria nacuapijivi, Dioso pitorobilivaisi
pejumecovënëtsivi. ¹⁶ Bajarapacuenia tovajëtabeje
tsipaji abaxë Samaria nacuapijivi Espiritu
Santo apo tsijamatabëpatsitsitsica. Abaxë saya
bautisabatsi bajarapamonae Jesús pevënëta.
¹⁷ Nexata Pedrobeje Juanbeje petovajëtsijavatabeje
Diosojavabelia, tsiatanacobebuatabeje Samaria
nacuapijivi. Nexata jane baja Samaria nacuapijivi
Espíritu Santo tsijamatabëpatsicatsi.

¹⁸ Nexata Simón itsa tane Samaria nacuapijivi
Espíritu Santo petsimatarunaejavatsitsica
apóstolenëbeje Samaria nacuapijivi tsi-
matanacobebuatsiaya petovajëtsijavatabeje
Diosojavabelia, nexata Simón palata tsipaeba
apóstolenëbejejavabelia. ¹⁹ Simón jumaitsi:

—Panerajurebeje mapacaëjëpaejamatabëcueneje.
Pajivi tsiatanacobebuatajë tatovajëtsijavata

Diosojavabelia, bajarapajivi petsimatarunaenexatsitsica Espíritu Santo, jai Simón apóstolenëbejevabelia.

²⁰ Nexata Pedro jumaitsi Simónjavabelia:

—Xamë cajena Dioso caxuabiana infiernojavabelia. Nexata vereverecaename nijapalata yajava. Tsipaji najamatabëxainame necomuatsinexa ëpalatata Dioso amoneya jivi perajutsijavatsica. ²¹ Tsipaji pepacuene apo najamatabëcuenecopatsimë xaniavaetsia Diosojavabelia. Nexata Dioso patajumecovënëtsivita, apo nanacuenebimë tsane. ²² Copare

baja papibisiacuene najamatabëxainame. Najamatabëcuenepënëyorore Diosojavabelia. Vajëre Diosojavabelia pecavecuaajibiaexanaenexa papibisiacuene najamatabëxainame. ²³ Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcuenecënënaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajërebeje Diosojavabelia tanevecuaajibiaexanaenexa paneconi xainajë Dioso tanexuabiyanima infiernojavabelia pacuenia panejumaitsimëbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata

penaetomaranëjava tsipaebanajetarucabeje
pexanialivaisi, Jesús pelivaisi.

*Pacuenia Felipe bautisaba Etiopía nacuapijinë
yabara pelivaisi*

²⁶ Dioso pijaángel jumaitsi Felipejavabelia:

—Nonotapunare. Maxuayolia roviaia
liamëreje. Panamuto Jerusalén tomaraverena
naropota pepatsinexa Gaza tomarabelia,
bajarapanamutualia liamëre, jai ángel
Felipejavabelia.

Bajarapanamuto petusato nacujava rucalia
pepatsinexa Gaza tomarabelia. ²⁷ Nexata
Felipe xaniavaeta pijajavaxi peponaenexa baja.
Bajaraxuacujinae naropolia jane baja. Nexata
bajarapanamutualia Felipe caxitajaraba Etiopía
nacuapijinë. Bajaraponë palata pevetsinë.
Etiopíanacua pevetsiva pijapalata tovetabiaba.
Bajaraponë, Etiopía nacuapijinë, Jerusalén
tomarajavabelia pona najamatabëcuenecopatsiaya
pevajëtsinexa Diosojavabelia templobota.

²⁸ Nexata baja Etiopía nacuapijinë Jerusalén
tomaraverena naviatanajetaruca. Navialia
baja pijanacuayabelia. Pijamoyota,
carrozavënëmoyota, yanajetaruca. Nexata
lebanajetaruca Diosojumelivaisipaebinë profeta
Isaíaspijinë bajayata peyaquinaebaxuto. ²⁹ Nexata
Espíritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje.
Imoxoyo pemuxunenia nucaponaename, jai
Espíritu Santo.

³⁰ Felipe nexata cujinaejinalia. Nexata baja Fe-
lige pëcaxinalia Etiopía nacuapijinë. Nexata Felipe

jumetane Etiopía nacuapijinë pebaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë ita apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënëmoyo ënëabetsia Felipe penajunaenexatsia penamuxuneniaecaenexabeje.

³² Profeta Isaíaspijinë pebaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi.

³³ Bejiobiaexanaenatsi. Pibisiacuenae apo exanae ata, naneconitsiaexanatsi. Itsajivi ata bajaraponë yabara apo jumaitsi tsane: “Mara pamonaeye bajaraponëmi pemomoxije,” apo jai tsane. Tsipaji beyaxuabianatsi,

jai tajëvelia mapacueniaje Isaíaspijinë pebaquinaebaxutota Jesús yabara, palivaisi Etiopía nacuapijinë lebanajetaruca.

³⁴ Nexata Etiopía nacuapijinë jumaitsi Felipejavabelia:

—Pexaniacuene netoexanare. Netsipaebare ponë yabara yaquina profeta Isaíaspijinë macpacueniaje. ¿Baja tsa ponë pijacuata nayabarajumaitsi? Itsa jume, ¿itsanë yabara tsaja jumaitsi? jai Etiopía nacupijjinë Felipejavabelia.

³⁵ Nexata palivaisi Etiopía nacupijjinë lebana-jetaruca, bajarapalivaisi Jesús yabara pejumaitsi-java copiaya Felipe yapëtaeyaexana. Bajaraxuacujinae icatsia tsipaeba pexanialivaisi, Jesús pelivaisi. ³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacupijjinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacupijjinë Felipejavabelia.

³⁷ Nexata Felipe jumaitsi:

—Itsa jumecovënëtame xaniavaetsia daxita nejamatabëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xania-jai Dioso pexënato, jai Etiopía nacupijjinë Felipejavabelia.

³⁸ Nexata bajaraponë pijamo nuco-jopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacupijjinë. ³⁹ Nexata penonotajunaecujinaetsinabeje, Espíritu Santo pitatsi Felipe Etiopía nacupijjinë pitabarata. Itsiata Etiopía nacupijjinë apo tae pacuenia Felipe pitatsi Espíritu Santo. Bajaraxuacujinae Etiopía

nacuapijinë apo taetsi baja Felipe matavjēja. Itsiata Etiópía nacuapijinë pona baja barëyaya pijanacuayabelia. ⁴⁰ Felipe Espíritu Santo caliatzi Azoto tomarabelia. Felipe nexata daxita tomaranëjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovënëta Jesús yabara pelivaisi

(Hch 22.6-16; 26.12-18)

¹ Saulo cajena Jerusalén tomarata apo copatsi petaicaponaejava daxita pamona Jesús pelivaisi jumecovënëta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. ² Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judíovi penacaetuatabiabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaenexa Damasco tomarabelia.

³ Bajaraxuacujinae Saulo jane baja pona

Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica.
⁴ Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaiti mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaiti:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaiti Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaiti:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaiti:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunaviacanubena. Nexata moya nubena. Tsipaji jumetane pajume athëbëvetsica jumaiti Saulojavabelia. Bajarapajume jumetae ata, itsiata bajarapamonae apo tae jivitonë. ⁸ Nexata Saulo,

irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxu-tomeravibatsi. Nexata papebijivi Saulo yajavana-jetaruca, bajarapapebijivi saya Saulo comacapon-aliatsi Damasco tomarabelia. ⁹ Nexata Saulo nat-sivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca. ¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsimatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenē, anijatonē vēnēlivaisitaniji pacuenia bajaraponē Saulo exanaponona. Vēnēlivaisitaniji bajaraponē pebejiobiaexanaponaejava Jerusalén tomarata daxita pecajumecovēnētsivi. ¹⁴ Maberena ataje icatsia itorobatsi sacerdotevi penamatacaitorobinē petotaicaenexa daxita pamonaē pecajumecovēnētsivi jinavanapa mapatomarataje, jai Ananías Jesúsjavabelia.

¹⁵ Nexata Jesús jumaitsi Ananíasjavabelia:

—Ponare baja. Tsipaji bajaraponē Saulo itapetajē baja tanelivaisipaebinexa itsanacuanēpījivijavabelia, tanelivaisipaebinexanua bajarapanacuanē pevetsivijavabelia ata, tanelivaisipaebinexanua Israel nacuapijivijavabelia. ¹⁶ Xanē Saulo tsitajētsianajē pacuenia itsamatacabi Saulo itsamonae bejiobiaexanaejitsiatsi. Bajaraponē bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajētsijavata.

¹⁷ Bajaraxuacujinae Ananías jane baja lia. Joneya pabota Saulo ponaponna. Ananías nexata nacobebeuata Saulo pematobocotojumavereca. Ananías jumaitsi Saulojavabelia:

—Tajabananē Saulo, pepo petuxanenē raja Jesús, ponē catsitanaitajēta namutua nenajetarucāejavata, bajaraponē nitoroba. Bajaraponē nitoroba tacatsimatanacobebeuatsinexa pecavecuajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobebeuatsinexa

pecatsijamatabëvënëcaenexa Espíritu Santo, jai Ananías Saulojavabelia.

¹⁸ Bajarapacuenia Ananías pejumaitzijavata Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bjaraxuacujinae bautisabatsi baja.

¹⁹ Bjaraxuacujinae pexaejava baja xane. Nexata baja icatsia Saulo aperabésaëreca. Saulo nexata Damasco tomarata caematacabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacaetuatabibonëjava. Saulo jivi itsa tsipaebapona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

²¹ Nexata daxita pamonaе jumetane Saulo petsipaebilivaisi, jamatabëcuenenabenajaca. Najumaitsi bajarapamonaе Saulo yabara:

—Mara ponëje bejiobiaexanapona Jerusalén tomaratalia daxita pamonaе jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonaе jumecovënëta Jesús pelivaisi. Nexata itsa taica, pecaponaenexa picani Jerusalén tomarabelia, sacerdotevi penamatacaitorobivijavabelia, najai bajarapamonaе Saulo yabara.

²² Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxu-abicujinae Jesús pelivaisi jivi petsipaebaponaejava, bexëajavabelia judíovi sivana-jamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabaupaxanetojavalía jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxuata Saulo bajarapabaupaxanetojavalía apo pitsapaelia. ²⁵ Damascotomara matatoyorotsia yacaranata piaitayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia

peyacaranatsiibopanaxaneto yenepanata athëbëyo perucaeventanavojotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyaniavatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaejava Jesús pelivaisi pejumecovënëtsivijavata. Itsiata daxita bajarapamonae Saulo cjunavatsi. Tsipaji apojumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuaicuaijatsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsipaebapona ajumejunavijibia Jesús pelivaisi. Saulo barëcuaicuaijai tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënaxuabatsi Cesarea

tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxu-ayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaexanabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espíritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaibitsaëtoxaneto jumecovënëtapona Jesús pelivaisi.

Pacuenia Jesucristo pejamatabëcueneta Pedro jamatejemayaexana Eneasvënënë yabara pelivaisi

³² Pedro najetaruca daxitatomaranëjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovënëtsivi. ³³ Nexata Pedro Lida tomarata taeyabuata Eneasvënënë. Bajaraponë ocho pavaibeje xaina camata peboacacujinae. Tsipaji tabusipacuenabatsi. ³⁴ Pedro nexata jumaitsi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujumatabëcuene pecatsitecaejavami, copaba baja. Najamatabëcuenecopaba baja Jesucristo javabelia.

Pacuenia Pedro Dorcas vënëva petëpaecujinae icatsia asaëyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Bajarapova pevënë griegojumeta Dorcas. Dorcas daxita maticabi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. ³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas tëpa Jope tomarata. Peperabëquiatsicujinaetsi petëpaeva buatatsi anijairabeje pexinaebo ënëtuatuajëta. Athëbëyo pairatsia, bajarapaënëtuatuajëtatsia buatatsi.

³⁸ Jopetomara eca imoxoyo Lida tomaravecua. Dioso pejumecovënëtsivi vënëlivaisitanetsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

³⁹ Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca.

Nexata pamonajivi pevecuatëpaevanëtsi, Dorcaspijiva pevēnuevitsi, Pedro matatoyorotsia itaxutuanuenubenatsi. Bajarapamonaē Pedro tsitajëbatsi Dorcaspijiva pejorocaejavanë, penaxatabijavanë, penajumaacabipananë ata, xuanë Dorcaspijiva rajuta bajarapamonaējavabelia pamatacabi abaxë asaë tsaponaponae.
⁴⁰ Nexata paënëtuatuajëta petëpaeva boca, bajarapaënëtuatuajëvecua Pedro daxita bajarapamonaē pitsapaeyaexana. Bajarapamonaē itsa pitsapalia, Pedro pematatabacabëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatëpaevanëtsi ata. Nexata tsitajëta bajarapamonaējavabelia petëpaevami icatsia piasaëjava. ⁴² Nexata Dioso pesaëta bajarapapiniñicuene Pedro pexanaejava, daxita Jope tomarapijivi yapëtane. Nexata jivibitsaëtöxaneto jumecovënëta Jesús Dioso pexënatocuene. ⁴³ Nexata Pedro bajayajebi ponapona Jope tomarata. Simón bacabocotonë peyacueyacuecaeyaexanaenë, pijabota Pedro naponapona.

10

Pacuenia Pedro barëcuaicuaijai Corneliovënënë yabara pelivaisi

¹ Cesarea tomarata ponapona Corneliovënënë. Apo judíonë. Bajaraponë Italia nacuaverena pepatsivi vajabitsaëvi pijacapitán. ² Cornelio pijabopijivi barējumecovënëtaaponapona Dioso. Dioso bitso yaiyataeya Cornelio ponapona. Cornelio palata ayaijava rajutabiaba judíovijavabelia peyavenonaenexa judíovi bepejiobivi. Cornelio vajëtabiaba Diosojavabelia. ³ Itsamatacabi caniviyoepatota, bejamatabëcuene a las tres, Cornelio bemajitsinaebota tane Dioso pijaángel pejonejavarena pijaboyarena. Nexata junataxubatsi.

—¡Cornelio! jaitsi.

⁴ Cornelio nexata naëcota ángeljavabelia. Bitso cujunava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabiabijava Diosojavabelia, nera-jutabiabijava ata penamatavenonaecue ne bepejiobivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manumene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

⁷ Bajarapacuenia ángel bemajitsinaebota peju-maitsicujinae Corneliojavabelia, ángel baja pona. Nexata Cornelio junata anijanēbeje pijabota pet-onacuenebaponaponaenētsibeje. Pematatsēnēa junata caenē vajabitsaēnē. Bajaraponē vajabitsaēnē Dioso peyaiyataenē. Bajaraponē Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivaponaenexa. Nexata baja bajarapamonae naropoba.

⁹ Meravia pitsijavata, matonejeepatota, bajarapamonae Jope tomara imoxoyotana-jetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajēpaebo. Pedro junaya bajarapabojumatatsia pevajētsinexa Diosojavabelia. ¹⁰ Pedro bitso piajani. Jamatabēnabane picani. Itsiata pexaejava pexanaevi abaxē apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athēbēvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaētotabeje namataenetsia upicēta. Bajarapacuenia yamaēya copatsica. ¹² Bajarapapanaxaneto tuatujēta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobēxēta pejinavanapaevi. Nubena daxitaviria pepunaevi. ¹³ Nexata Pedro jumetane athēbēvetsica pejumaitsijava: “Pedro, nonotapunare. Beyaxuare daxita mapamonaeje

nexaenexa,” pejaijava athëbëvetsica, Pedro jumetane.

¹⁴ Nexata Pedro jumaitsi:

—Jume raja. Caeto ata raja xanë apo xaenë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xaenë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëabetsia baja icatsia yapëcaevaya. ¹⁷ Pedro nexata najamatabëxainaeya jamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacuecaeyaexanaenë, pijabo. ¹⁸ Nexata bajarapamonae pepatarëcëpacujinae, baupa pënëvelia ayaijumeta yanijoba. Jumaitsi:

—¿Baja tsa mapabota Simón naponaponaje, ponë vënërubatsi itsavënë, Pedro? jai bajarapamonae.

¹⁹ Pedro abaxë bojumatatsia athëbëyo najamatabëxainecaya bemajitsinaebota petaejava yabara. Nexata Espíritu Santo jumaitsi Pedrojavabelia:

—Taema. Acueyabi ponëbeje casivaparena.
²⁰ Nexata nonotapunare. Runaremeca baja nenaponae nexa bajarapamonae pepëta. Jamatejema saya ajamatabëcuenecovëbia naponae name. Tsipaji raja xanë itorobarenajë bajarapamonae, jai Espíritu Santo Pedrojavabelia.

²¹ Nexata baja Pedro runareca Cornelio pijajivi-javabereca. Pedro jumaitsi bajarapamonaejavabelia:

—Ponë pajaitame, xanë rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaëvi raja pijacapitán Cornelio pejamatabëcuene panajetarubenajë. Bajaraponë pexaniajamatabëcuenenë. Dioso bitso pejumecovënëtsinë. Nexata bajaraponë Diosojavabelia vajëcabiaba. Daxita judíovi yayatanetsi. Nexata judíovi jumai tsabiabi bajaraponë yabara: “Pexaniajamatabëcuenenë raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanë pacasivaponarenatsi Cornelio pijaboyabelia nenaponae nexa. Cornelio cajumetaejitsia palivaisi tsipaebijitsiamë

bajaraponëjavabelia, jai Cornelio pijajivi Pedrojavabelia.

²³ Nexata Pedro copiapita boyaberena pejonenexa bajarapamonae. Bajarapamonae abaxë namajita bajarapabota. Bajayacunua jane baja Pedro napona bajarapamonae pepëta. Pedro pëyanatatsi itsamonae Jope tomarapijivi, Dioso pejumecovënëtsivi. Itsiata abaxë bajarapamatacabi apo patsilia. Epatua abaxë majitaothopa.

²⁴ Nexata meravia pitsijavata Pedrobana jane baja palia Cesarea tomarabelia. Cornelio nexata pijabota yajavanuca pejunatsivi, pijamon-aeviriavi. Yajavanucanua itsamonae, pamona bitso Cornelio peyapëtaevitsi. Pedro jane baja barëvajënaeevetanucatsi. ²⁵ Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabëta nucanua Pedro pitabarata. Tsipaji bitso yaiyataeya copiapitsijitsia picani. ²⁶ Nexata Pedro apo jitsipae bajarapacuenia bitso yaiyataeya pecopiapitsijavatsi. Nexata Pedro maxëvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamë jamatabëcueneitsimë, bajara saya xanë ata jamatabëcueneitsinë, jai Pedro.

²⁷ Nexata Pedro Cornelio barëcuaiquaijai tsanucaponae panabojavarena. Pedro itsa najoneya Cornelio pijaboyalia, tane jivibitsaëtoxaneto Cornelio pijabota penacaetuatsivi. ²⁸ Nexata Pedro jumaitsi Cornelio pijabota penacaetuatsivijavabelia:

—Paxamë baja cajena xaniavaetsia payapëtaneme mapacueneye. Paxanë pajudíovinë patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajë apo judíovi. Apo panetocopatsinua patajonenexa apo judíovi pijaboyalía. Itsiata baitsi jane aeconoxaeta baja Dioso nitaveta tacopatsinexa baja bajarapajamatabëcuene. Nexata Dioso netocopata tayajavaponaponaenexa apo judíovi ata. Netocopatanua tanajonenexa apo judíovi ata pijaboyalía. ²⁹ Bajaraxuata itsa nejunata taponanexa maberenaje, narenanë bepijia ajamatabëcuenecovëbia. Nexata jamatabëyapëtaniji xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, caniviyoepatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuenetataecujinae. Angel penaxatatsijava nivenivena.

³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëthane baja nerajutabiabijava bepejiobivijavabelia penamatavenonaecueneye. ³² Nexata nijajivi itorobare Jope tomarajavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca manuamene

itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepijiayo casivaponaeyaexanatsi. Xamë baja nexata pexaniajamatabëcuenia netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabelia.

*Pacuenia Pedro livaisi tsipaeba Cornelio pijab-
ota yabara pelivaisi*

³⁴ Pedro jane baja taxuxuaba livaisi petsipaebi-
java. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxi-
taviriavitsi. ³⁵ Caenacuapijivi canacujitsia,
pamonae Dioso yaiyataeyajinavanapa,
jumecovënëtsiajinavanapanua pacuenia Dioso
itorobatsi, bajarapamonae Dioso jitsipa. ³⁶ Dioso
cajena pexanialivaisi, Jesucristo pelivaisi,
tonajumecopata Israel nacuapijivijavabelia.
Nexata bajarapalivaisi tsipaebatsi Israel
nacuapijivi pibisiacuene pexanaeneconivecua
Jesucristo pejamatabëcueneta pecapanepaenex-
atsi Dioso. Jesucristo raja daxitajivi pijatuxanenë.
³⁷ Payapëtaneme rabaja mapacueneje. Juanpijinë
jivibautisabinëmi jivi livaisi petsipaebanaje-
tarucaecujinae, pebautisabaponaecujinaenua,
Jesús cotocaevi tsipaebanajetaruca Galilea
nacuajava, Judea nacujava ata. ³⁸ Payapëtaneme
rabaja mapacueneje. Jesús, Nazaret

tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús caējēpatsi daxitacuene pexanaenexa. Nexata Jesús jamatejemayaexanapona daxita pamonaē dovathi pejamatabëcueneta avitane. Bajarpacuenia Jesús exanapona tsipaji Dioso yajavaponaponatsi. ³⁹ Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemēthētsicujinaetsi, acueyabi matabacabita, Dioso icatsia asaēyaexanatsi. Dioso Jesús caējēpaeyaexanatsi patanetsitanaitajētabiabinexa paxanējavaberena. ⁴¹ Itsiata Jesús apo tsitanaitajētsi daxitajivijavabelia. Ēpaxanējavaberena saya panetsitanaitajētabiaba. Tajēvelia baja cajena Dioso paneitapeta patataevinexa Jesús petēpaecujinae icatsia itsa asaē. Bajaraxuata Jesús petēpaecujinae icatsia itsa asaē, panetsitanaitajētabiaba. Nexata panebarēnabane. Panebarēmatavējēaapanua. ⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexinaevi. Itsamatacabi Jesús naneconitsiaexanaena piasaēvi, petēpaevimi ata. ⁴³ Athēbēvetsica Jesús pepatsivajēnaetsica, bajayata jinavanapa Diosojumepaebivimi profetavi. Nexata profetavimi tajēvelia

vajunupaebapona Jesús pejamatabëcueneta Dioso pevecuaajibiaexanaejavanexa pibisiacue ne pexanae neconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espíritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanucaejavata Corneliobanajavabelia, Espíritu Santo tsijamatabëjunuatsi daxita pamona e jumetaeyena Pedro petsipaebilivaisi. ⁴⁵ Nexata judíovi Dioso pejumecovënëtsivi, Pedro peyajavapatsivi, ita tane bajarapacue ne, jamatabëcuenenabenajacanubena. Jamatabëcuenenabenajaca tsipaji apo judíovi ata Espíritu Santo tsijamatabëjunuatsi. ⁴⁶ Nexata Pedro peyajavapatsivi yapëtane Espíritu Santo petsijamatabëjonejavatsi Corneliobana. Tsipaji Corneliobana cuaicuaijai itsaviriajumenëta, apo penatsipaebijumenëmi. Corneliobana jumai tsapona e Diosojavabelia:

—Diosomë, bitso ayaijamatabëcuenenëmë, jai tsapona e.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamona e ataje Dioso rajutatsi Espíritu Santo. Bajaraxuata itsajivi ata acuenebi pejumaitsijava bajarapamona e yabara: “Pëtsa mapamona e je pabautisabame merata,” pejaijava, jai Pedro.

⁴⁸ Nexata Jesucristo pevënëta Pedro bautisaba Corneliobana. Pedro pebautisabicujinae Corneliobana, asivatsi abaxë Pedro penaponapon-aenexa bajarajota caematacabibeje.

11

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

¹ Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamonaе jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi. ² Nexata pamatacabi Pedro pata Jerusalén tomarata, judíovi, pamonaе jumecovënëta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajarapacueene yabara. Pedro jumaitsi judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuecaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniiji athëbëvetsica perunaejavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutobabatsia

naëcotajë xaniavaetsia tataenexa xua yajavanaje-
 taruca bajarapapanaxaneto tuatuajëta, nexata
 taniji cuatro pataxutabeje pejinavanapaevi.
 Taniji unupijivinua, pianaepanaevi. Taniji
 pecotobëxëta pejinavanapaevinua. Taniji
 pepunaevinua. ⁷ Nexata jumetaniji athëbëvetsica
 tanejumaitsijava: “Pedro, nonotapunare.
 Beyaxuare daxita mapamonaeye nexaenexa,”
 nejai. ⁸ Nexata jumaitsinë: “Jume raja. Caeto
 ata raja xanë apo xaenë bajarapavirianëxi
 tanejamatabëcuenebijaeyaniva. Tsipaji Dioso
 Moiséspijinëta patanetonajumecopatsilivaisi,
 paneitaveta bajarapavirianëxi pataxaeyaniva,”
 janë. ⁹ Nexata athëbëvetsica icatsia nejumaitsi:
 “Pavirianëxi caitorobatsi nexaenexa, xaema.
 Pëtsa jumaitsimë: ‘Apo xaenë raja bajarapaviri-
 anëxi tanejamatabëcuenebijaeyaniva,’ jamë
 pëtsa,” nejai athëbëvetsica. ¹⁰ Acueyabi xuabeje
 bajarapacuenia athëbëvetsica napëna nejumaitsi.
 Bajaraxuacujinae bajarapapanaxaneto
 daxita bajarapamonae athëbëabetsia baja
 icatsia yapëcaevaya. ¹¹ Bajarapaepatota jane
 baja acueyabi ponëbeje nesivapata pabota
 naponaponajë. Bajarapamonae itorobatsi
 Cesarea tomaraverena. ¹² Nexata Espiritu
 Santo nitoroba bajarapamonae pepëta
 ajamatabëcueneconvëbia tanaponaenexa Cesarea
 tomarabelia. Mapamonaeye vajamonae, seis
 ponëbeje Dioso pejumecovënëtsivi, nepëyanata
 Cesarea tomarabelia. Nexata panajoneyajë
 Cornelio, vajabitsaëvi pijacapitán, pijaboyalìa.
¹³ Nexata Cornelio panetsipaeba pijabota
 petsitanaitajëtsijavatsi ángel. Angel pina jumaitsi

Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë itsa patsiarena, catsipaebiana pacuenia exanaejitsiamë Dioso pecavecuaajibiaexanaenexa daxita pibisiacuene nexanaeneconimi, daxita nijabopijivi yajava,” jai pina ángel Corneliojavabelia. ¹⁵ Nexata jane baja itsa taxuxuabajë livaisi tatsipaebijava Corneliobanajavabelia, Espíritu Santo tsijamatabëpatsicatsi Corneliobana. Pacuenia vaxaitsi copiaya nacatsijamatabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu Santo. ¹⁶ Nexata najamatabënapitajë Jesús patanejumaitsijava mapacueniaje: “Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo,” patanejajiva Jesús, najamatabënapitajë. ¹⁷ Xaniajai baja cajena. Dioso rajutapona Espíritu Santo apo judíovi ata pacuenia vaxaitsi nacarajuta Espíritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espíritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitsi:

—Xaniajai rabaja. Dioso bajarapacuenia exana apo judíovi ata matababi apo pevereverecejava pexainaenexa, itsa copaba pibisiacuene pexan-

abiabijava penajamatabëcuenepënëyorotsinexa
Diosojavabelia, jai judíovi.

*Pacuenia Dioso pejumecovënëtsivi Antioquía
tomarata jinavanapa yabara pelivaisi*

¹⁹ Pamatacabi Estebanpijinë beyaxuabatsi,
Dioso pejumecovënëtavanapaevi Jerusalén
tomarata rëcëpeca daxitanacuanëjava.
Bajarapacuenia rëcëpeca tsipaji bitso bejiobiaex-
anaponatsi. Jesús pelivaisi pejumecovënëtsixae,
itoyatsi. Itsamonae tajëbelia rëcëpeca Fenicia
tomarabelia. Itsamonae rëcëpeca Chipre
tunaetota peecaetomarabelia. Itsamonae
rëcëpeca Antioquía tomarajavabelia. Nexata
bajarapamonae Jesús pelivaisi tsipaebapona
bajarapatomaranëjava ëjudíovijavabelia. Itsaviriav-
ijavabelia apo tsipaebapona. ²⁰ Itsamonae Jesús
pelivaisi pejumecovënëtsivi, Chipre tunaetota
peecaetomarapijivi, Cirene tomarapijivi ata,
pona Antioquía tomarabelia. Bajarapamonae
pijinia Antioquía tomarata apo judíovijavabelia
tsipaebapona pexanialivaisi, Jesús pelivaisi.
²¹ Pamonaë apo judíovijavabelia tsipaeba Jesús
pelivaisi, Dioso yavenonatsi. Nexata apo judíovi
ayaibitsaëtoxaneto jumecovënëta Jesús pelivaisi.
Najamatabëcuenepënëyorota Diosojavabelia
pibisiacuene pexanabiabijavavecua.

²² Jerusalén tomarata pejinavanapaevi, Jesús
pelivaisi pejumecovënëtsivi, vënëlivaisitane apo
judíovi ata Antioquía tomarapijivi Jesús pelivaisi
pejumecovënëtsijava. Nexata bajarapamonae
Bernabé itorobaliatsi Antioquía tomarabelia
petaenexa apo judíovi ata Jesús pelivaisi

pejumecovënëtsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenebarëya apo judíovi ata. Nexata Bernabé muxujioba apo judíovi ata daxita bajarapamonae pejamatabëëthëtovetsina ajamatabëcuenesaëya peyajavajinavanapaenexa Dioso. ²⁴ Bernabé bitso pexaniajamatabëcuenenë. Jamatabëcuenevënëca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovënëtsinë Bernabé. Bajaraxuata nexata jivibitsaëtoxaneto jumecovënëta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitajaraba Saulo, barërena Saulo Antioquía tomaraberena. ²⁶ Nexata Antioquía tomarata caevai naponaponabeje Dioso pejumecovënëtsivijavata. Jivi ayaibitsaëtoxaneto livaisi tsipaebabiababeje. Antioquía tomarata daxita pamonaes Jesús pelivaisi jumecovënëtavanapa, bajarapamonae pijatomarapijivi pepo copiaya jane baja vënërubatsi Cristianovi.

²⁷ Pamatacabi abaxë Bernabébeje Saulobeje ponaponabeje Antioquía tomarata, Dioso-jumepaebivi profetavi, Jerusalén tomaraverena penaropobivi, pata Antioquía tomarata. ²⁸ Bajarapaprofetaviyajuvënënë pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo

peypätaeyaexanaexaetsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanëjava, jai tajëvelia Agabo.

Bजारapajaniboxaneto bexëa copiapata Agabo pejumaitsicuenia pamatacabi nacuaeavetsinë Claudio evetaponapona Romanonacua.

²⁹ Bजारaxuata cajena janibovajënaeya, Antioquía tomarapijivi daxita Dioso pejumecovënëtsivi najamatabëcuenejëpa peyavenonaenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi.

³⁰ Nexata baja Antioquía tomarapijivi itsa tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

12

Pacuenia Pedro etatsi penaneconitsivi pejebabi-abibota yabara pelivaisi

¹ Nacuaeavetsinë Herodes bejiobiaexanapona Jesús pelivaisi pejumecovënëtsivi. ² Herodes pijajivi itoroba espadata pebeyaxuabinexatsi Santiago, Juan pematapijinëmi. ³ Herodes ita tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bजारapacuenia

Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bजारapabota cuatro pabitsaëtobeje vajabitsaëvi Pedro nacobenaevetabiabatsi. Itsabitsaëto itsa pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatuajëta Pedro majitanuca anijanëbeje vajabitsaënëbeje, pevetsinëtsibeje, petuatuajëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabau-paevetatsi. ⁷ Jemata Dioso pijaáñgel naitajëta Pedrojavata. Nexata penaneconitsivi pejebabiabibo ënëtuatuajëta naitayota. Pedro pemajitanucaenë áñgel yenejayatabatsi Pedro penaëcotsinexa. Angel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecëtsicadenamaëtotsibeje vecobejoparecatsi baja. ⁸ Nexata icatsia ángel jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ángel.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabi-abijava. Nepënaponare, jai ángel Pedrojavabelia.

⁹ Pedro nexata napona ángel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene ángel pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ënëtuatuajëtareca peyabaupaevetecaevajabitsaënëtsi. Icatsia xenetabeje pecotocaevi ënëtuatuajëtatsina peyabaupaevetecaevajabitsaënëtsi. Bjaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bjarapabaupaxaneto hierrobaupaxaneto. Nexata bjarapabaupaxaneto tonabaupatatsibeje pijacuata. Pitsatabaliabeje jane baja callejavabelia. Nexata callejavareca penajetarucæjavatabeje, ángel jemata ajibi tsojopae. ¹¹ Pedro jane baja xaniavaetsia najamatabëcueneyapëtane. Nexata Pedro jamatabëjumaitsi:

—Baja rajane matapania aconoxae xaniavaetsia najamatabëcueneyapëtani. Dioso

tsaena itorobica pijaángel tanecapanepaenexa Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabējai Pedro.

¹² Pedro najamatabēxaina pacuenia exanaejitsia. Nexata lia María pijaboyabelia. Bजारapova María, Juan pena, ponē vērūbatsi itsavēnē, Marcos. María pijabota ayaibitsaētoxaneto Dioso pejumecovēnētsivi nacaetuata Diosojavabelia petovajēcaenexatsi Pedro. ¹³ María pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponē baupa docodocotanunuca. ¹⁴ Nexata Rode itsa jumeyapētane Pedrocuene, nexata abaxē apo tobaupatsi. Rode kujinaelia boyabelia pejamatabēcuenebarēyatsajonexae. Nexata Rode tsipaeba María pijabota penacaetuatsivijavabelia. Jumaitsi:

—¡Pedro rajane baja nucalia baupa pēnēverenal jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanē raja pepacuene! Pedro raja nucalia baupa pēnēverena, jai Rode.

Bजारapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

¹⁶ Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabëcuenenajunaviaca.

¹⁷ Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matabi tsina, vajabitsaëvi, pamonae Pedro evetabiabatsi pananeconitsivi pejebabiabibota, bitso jamatabëcuenebëjai. Tshipaji bajarapamonae apo yapëtae itsabelia Pedro pona.

¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonae Pedro evetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinexatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevevtsinë Herodes Judea nacuavecua pona. Pona Cesarea tomarabelia peponaponaenexa Cesarea tomarata.

Pacuenia tēpa nacuaevetsinē Herodes yabara pelivaisi

20 Nacuaevetsinē Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabēcueneyanaba xaniavaetsia pebarēcuaicuaijainexa nacuaevetsinē Herodesjavabelia. Tsipaji bajarapatomarabejepijivi jitsipa icatsia pexaejava petocapatabinexatsi pijatomarabejavaberena Herodes pevetsinacuajavaverena. Nacuaevetsinē Herodes pijabo petoevetsinētsi pevēnē Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatabēcuenē petoxainaenexa petocuaicuaijainexa Herodesjavabelia. Nexata Blasto jejai. Tocuaicuaijai Herodesjavabelia Herodes icatsia pebarajamatabēxanepanaenexa bajara patomarabejepijivijavabelia. 21 Nexata Herodes tocaējēta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocaējēta bajarapamonae pepatsinexa, Herodes naitabētsia naxatata nacuaevetsinē penaxatatsicuenia. Nexata jane baja bajarapatomarabejepijivi pata pebarēcuaicuaijainexa Herodes. Nexata daxita bajarapamonae pitabarata nacuaevetsinē peecaejavata, Herodes eca. Nexata Herodes xaniavaetsia barēcuaicuaijai bajara

patomarabejepijivijavabelia. ²² Nexata bajarapatomarabejepijivi Herodes yabara pinijijumeta yamaxëitojorobiaya jumai tsaponae pebarajamatabëxanepanaenexatsi:

—¡Maponëje nacabarëcuaicuaijaje, apo jivitonë! ¡Diosonë tsaena! jai tsaponae bajarapatomarabejepijivi Herodes yabara.

²³ Bajarapacuenia pejumaitsijava bajarapatomarabejepijivi Herodes apo pejumeitavetsixae, Dioso pijaángel naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatëpa.

²⁴ Nexata Dioso pejumecovënëtsivi, daxitanacuanëjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëtoxaneto tsaponae.

²⁵ Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barëliabeje Juan, ponë vënërubatsi itsavënë, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi

¹ Antioquía tomarata Dioso pejumecovënëtsivijavata, jinavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë

Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivinua. Herodes Galileanacua pevetsinë. Herodesbeje Manaénbeje penajuavitsabinëbeje. ² Itsamatacabi daxita bajarapaprofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espíritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajëbeje, bajaraxua jane baja tane-tonacuenebinxabeje, jai Espíritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsimatanacobebuatatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanëjava petsipaebaponaenexabeje Dioso pitorobilivaisi.

Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjava yabara pelivaisi

⁴ Bernabébeje Saulobeje Espíritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia. ⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi

penacaetuatabiabinöjjava. Juan napona Bernabébeje Saulobeje pepëta peyavenonabiabinexa. ⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judíonë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi. ⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumentane Dioso pitorobilivaisi. ⁸ Itsiata baitsi jane Barjesús, jivi pejorobinë, ponë vënërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi. ⁹ Nexata Saulo, ponë vënërubatsi itsavënë, Pablo, tsijamatabëvënëcatsi Espíritu Santo. Nexata Pablo naëcota asaëyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamë jivi neyamaxëitojorobinë, pibisiacuene nexanaenë, dovathi pijajivitonëmë, pexaniajamatabëcuene pexanaejava nitoyanë! Apo jamatabëcopatsimë nenajumetsënëtsijava pejumecovënëtsiyaniva pamonaë picani

jamatabējumecovēnēta Dioso pijapexaniajailivaisi.
¹¹ Dioso raja aeconoxae cananeconitsiaexanaena.
 Nexata apo natsivajēnaetaemē tsane.
 Matapania anijajuametonē panepaena, icatsia
 natsivajēnaetaename, jai Pablo Barjesúsjavabelia.

Nexata bajarajota Barjesús itaxutomerav-
 ibajunuatsi. Bitso itaxutoaitaquiri. Nexata
 saya Barjesús nacobenajayabaruta itsanē
 pecobevaetabinexatsi pecomacaponanexatsi
 pijaboyabelia. ¹² Sergio Paulo itsa tane bajara-
 pacuene, nexata jumecovēnēta Jesús pelivaisi.
 Sergio Paulo bitso jamatabēcuenenajunaviaca itsa
 jumetane Jesús pelivaisi Bernabébeje Pablobeje
 petsipaebijavatabeje.

*Pacuenia Pablobeje Bernabébeje ponaponabeje
 Antioquía tomarata, Pisidia nacuata peecaetomarata,
 yabara pelivaisi*

¹³ Pablobana Chipre tunaetota Jesús pelivaisi
 petsipaebavanapaecujinae, Pafos tomarata
 nanaropoba velapanata peponaebarcoxanetota.
 Nicaba Panfilia nacuayabelia. Nexata Panfilia
 nacuatatalia pata Perge tomarata. Juan baja Perge
 tomarata itsajamatabēcuenenajamatabēxaina.
 Nexata baja naviateca Jerusalén tomarabelia.

¹⁴ Nexata Pablobeje Bernabébeje icatsia
 nanaropotabeje Perge tomarata. Nexata icatsia
 patabeje Antioquía tomarabelia, Pisidia nacuata
 peecaetomarabelia. Judíovi penacueraevetsi-
 matacabita Pablobeje Bernabébeje najunuabeje
 judíovi penacaetuatabiabibota. Bajarajota
 naecabeje. ¹⁵ Nexata daxita bajarapabota
 pejonevi, namuxunaeveta Dioso Moiséspijinēta

penajumecopatsilivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bjaraxuacujinae judíovi penacaetuatabiabibo pevetsivi, pijajivitonë itoroba. Nexata bajaraponë jumaitsi Pablobeje Bernabébejjavabelia:

—Tajabananébeje, itsa payapëtanemebeje itsalivaisiyo panetsipaebinexabeje, aeconoxae patsipaebianamebeje jivi piagamatabëcuenesaënexa Diosojavabelia, jai bajaraponë Pablobeje Bernabébejjavabelia.

¹⁶ Nexata jane baja Pablo nonotapuna. Nacobe-yota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa.

Nexata Dioso pejamatabëcueneta vajasalinaivimi pexi ayaibitsaëtoxaneto xainapona. Nexata vajasalinaivimi ayaibitsaëtoxaneto tsaponae pamatacabi jinavanapa Egipto nacuata. Nexata Dioso pesaëta vajasalinaivimi matakaponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvënë nacuata pejinavanapaevimi. Nexata baja Dioso vajasalinaivimi totsatatsi bajarapanacuanëjava juya pejinavanapaenexa. ²⁰ Bjaraxuacujinae Dioso itoroba vajasalinaiviyajuvënënev

juezmonae penaexanaponaenexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinē evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijinē pecotocaevijueznē. ²¹ Nexata vajasalinaivimi jumaitsi profeta Samuelpijinējavabelia: “Pajitsipajē nitorobijava vajayajuvēnēnē penaexanaenexa vajanacayanacuaevetsinēnexa,” jai. Nexata profeta Samuelpijinē Dioso pejamatabēcueneta itoroba Saúlpijinē vajasalinaivimi cuarenta pavaibeje peyanacuaevetaponaponaenexatsi. Bajaraponēmi Saúlpijinē, Cispijinē pexēnato, vajasalinainēmi Benjamínpijinē pemomoxiyajunēnēnē. ²² Bajaraxuacujinae Saúlpijinē Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinē vajasalinaivimi peyanacuaevetsinexatsi. Dioso jumaitsi Davidpijinē yabara mapacueniaje: “Isaí pexēnato, David, jamatabēcueneyapētaniji. Bajarapitsinē jitsipajē. Bajaraponē David daxita pacuenia jitsipajē, netoexanaena,” jai Dioso Davidpijinē yabara. ²³ Davidpijinē raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajēvelia najumecapanepaeya jumaitsi vajasalinaivimijavabelia. ²⁴ Jesús petaxuxuabivajēnaeya jivi livaisi petsipaebaponaejava, copiaya Juanpijinē jivibautisabinēmi tsipaebanajetaruca daxita Israel nacuapijivijava.

Jumai tsanajetaruae Juanpijinë: “Pacopabare baja daxita pibisiacuene paneexanabiabijava. Panajamatabëcuenepënëyorore Diosojavabelia. Bajaraxuacujinae pacabautisabianatsi,” jai tsanajetaruae Juanpijinë. ²⁵ Juanpijinë abaxë itsa apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponënë. Xanëcujinae rajane bajaraponë najetarucaena. Xanë raja saya beveliajamatabëcuenenënë bajaraponëvecua. Nexata bajaraponë bepijajivitonënëcuenia ata tataxujonotsinexa pijazapato, vecuaauranë,” jai tsaponae Juanpijinë Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaitsi judíovijavabelia judíovi penacaetuatabiabibota:

—Tajamonae Abrahampijinë papemomoximë, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. ²⁷ Itsiata Jerusalén tomarapijivi apo yapëtae Jesús pecapanepaejavanexatsi. Jerusaléntomara pevetsivi ata apo yapëtae Jesús pecapanepaejavanexatsi. Bajarapamonae apo jumeyapëtaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabianë canacujitsia lebabiabi ata bajarapabaxuto judíovi penacaetuatabiabibota, itsiata bajarapamonae apo jumeyapëtae. Bajarapamonae itsa neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajëvelia vajunupaeba Jesús pexanaejavanexatsi. ²⁸ Judíovi apo caxitajarabi

ata Jesús itsacueneneconi pexainaejava, itsiata bajarapamonae vajëta nacuaevetsinë Pilatojavabelia Jesús pebeyaxuabinexatsi. ²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajëvelia jumaitsi Dioso pejumelivaisibaxutota. Bajaraxuacujinae Jesús petëpaenë pitsicatsi cruzajavavetsica. Bajaraxuacujinae mëthëtatsi. ³⁰ Itsiata baitsi jane Dioso icatsia asaëyaexanatsi Jesús petëpaecujinae. ³¹ Jesús petëpaecujinae Dioso icatsia itsa asaëyaexanatsi, bajayajebi anijatonë tsitanaitajëtabiaba pijajivijavabelia, pamonae yanatatsi pamatacabi Jesús pona Galilea nacujavaverena Jerusalén tomaraberena. Bajarapamonae nexata maparucaeje tsipaebapona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaitsi bajarapamonaejavabelia judíovi penacaetuatabiabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaitsi pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonaemi pemomoxitsi. Nexata pacuenia Dioso tajëvelia najumecapanepaeya jumaitsi vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi,

canutatsti daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitsijava Jesúsjavabelia. ³⁴ Dioso baja asaëyaexanatsi Jesús petëpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenē yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaitsti mapacueniaje: “Caexanaenatsi pacuenia baja cajena najumecapanepaeya jumaitsinē Davidpijinējavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia. ³⁵ Bajaraxua yabara Jesús pejumaitsijava Diosojavabelia Salmosbaxutota icatsia jumaitsti mapacueniaje: “Nexënatonē apo necopatsimē tsane taperabëtsabanaejavabelia,” jai Salmosbaxutota. ³⁶ Davidpijinē abaxë itsa asaë tsaponaponae, jumecovënëtsiaponapona pacuenia Dioso itorobatsi. Bajaraxuacujinae Davidpijinē tēpa baja. Nexata Davidpijinē mëthëtatsi pamojivimi pemëthëanē muxuneneta. Nexata Davidpijinē mëthëabelia perabëtsabana baja. ³⁷ Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponē apo perabëtsabanae cajena mëthëabelia. ³⁸ Tajamonae, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuaajibiaexana pibisiacuene paneexanaeneconimi. ³⁹ Pajivi Jesús jumecovënëtsiana, bajarapajivi daxita pibisiacuene pexanaeneconi Dioso vecuaajibiaexanaenatsi Jesús pejamatabëcueneta. Pajivi apo jumecovënëtsicapanepea ata Dioso Moiséspijinëta penajumecopatsilivaisi,

jamatabējumaitsi: “Xanē baja jumecovēnētajē Dioso Moiséspijinēta penajumecopatsilivaisi. Nexata pibisiacuene taexanaeneconi Dioso nevecuaajibiaexanaena,” jamatabējai, itsiata bajarapajivi pibisiacuene pexanaeneconi Dioso apo vecuaajibiaexanaetsi tsane. Tsipaji Dioso Moiséspijinēta penajumecopatsilivaisi itsajivi ata apo jumecovēnētsicapanepeae. ⁴⁰ Xania baja tsane. Xaniavaetsia pajinavanapaename papeca-tocopiapatsiyaniva pacuenia Diosojumepaebivi profetavi peyaquinaebaxutota tajēvelia jumaitsi. Tsipaji raja profetavi peyaquinaebaxutota, tajēvelia jumaitsi mapacueniaje:

⁴¹ Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavana-paeepatota xanē, Diosonē, exanaenajē ayaicuene taexanaejavanē. Nexata taexanaejavanē pelivaisi, itsamonae xaniavaetsia pacatsipaebi ata tsane, itsiata apo pajumecovēnētsimē tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamonaē Dioso apo pejumecovēnētsivi, jai Pablo bajarapamonaejavabelia judíovi penacaetuatabiabibota.

⁴² Pablobeje baja Bernabébeje pitsapaejitsiabeje judíovi penacaetuatabiabibovecua. Nexata bajarajota pamonaē apo judíovi, junatatsibeje icatsia itsamatacabi judíovi penacueraevetsimatacabita petsipaebinxabeje bajarapalivaisi.

⁴³ Penacaetuatsivi baja naviaba judíovi penacaetuatabiabibovecua. Nexata Pablobeje

Bernabébeje judíovi penacaetuatabiabibovecua itsa pitsapabeje, jivi ayaibitsaëto pënaponatsibeje. Bajarapamonaeyajuvënëvi itsamonae judíovi, itsamonae apo judíovi. Pamonaē apo judíovi, bajarapamonaē catsiteca judíovicuenia Dioso pejumecovënëtsijava. Nexata Pablobeje Bernabébeje muxujobabeje bajarapamonaē pevajënaeyabelia ajamatabëcuenesaëya pejumecovënëtavanapaenexa Dioso pitaxutotsoniataejavatsi.

⁴⁴ Bajara jane xuacujinaē icatsia judíovi penacueraevetsimatacabita, bajarap-atomarapijivi muxunanacaetuatsibeje ayaibitsaëtoxanetonë Dioso pitorobilivaisi penamuxunaevetsinexatsibeje. ⁴⁵ Nexata judíovi itsa tane bajarapajivibitsaëtoxanetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuajiaitsi Pablo. ⁴⁶ Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsideje tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainaenexa matacabi apo pevereverecaejava. Paxanëbeje baja nexata pacavecuaponatsibeje patatsipaebinexabeje bajarapalivaisi apo judíovijavabelia. ⁴⁷ Bajarapacuenia

pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcueneitayotsinexa pamonaē apo judíovi. Baitsi jane tsipaebanajetarucaename tajumelivaisi daxitanacuanëjava, nacuatabujava ata pejinavanapaevi, pecapanepaenexatsi pibisiacuene pexanaeconivecua, jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitsijava, nexata apo judíovi jamatabëcuenebarëya. Nexata apo judíovi jumaitsi: —Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamonaē baja cajena tajëvelia Dioso itapeta matakabi apo pevereverecejava pexainaenexa. ⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi. ⁵⁰ Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barëcuaicuaijai tomaraevetsivijavabelia, petuxanevi pijavajivijavabelia ata. Nexata bajarapamonaē anaepana Pablobeje Bernabébejejavabelia. Nexata baja Pablobeje Bernabébeje capit-sapatsibeje bajarapanacuavecua. ⁵¹ Nexata Pablobeje Bernabébeje bajarapatomarata nataxuatsapërëvarëbabeje. Bajarapacuenia nataxuatsapërëvarëbabeje bajarapatomarapijivi

peyapëtaenexa penaneconitsijava Diosojavabelia, apo pejumecovënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. ⁵² Itsiata daxita pamonaē Dioso pejumecovënëtsivi, Antioquía tomarata pejinavanapaevi, jamatabëcuenebarëya. Espíritu Santonua jamatabëcuenevënëcavanapa. Nexata exanabiaba pacuenia Espíritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacaetuatabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëtoxaneto judíovi, apo judíovi ata, jumecovënëta Jesús pelivaisi. ² Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. ³ Bajarapacuene peyapëtaexaebeje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyjavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniataejavatsi bajarapamonae. Nexata daxita bajarapamonae yapëtane Jesús pelivaisi pexaniajailivaisicuene. Tsipaji bajaraponëbeje ayaicuene pexanaejava Dioso pesaëta exanaponabeje. ⁴ Itsiata bajarapatomarapijivi apo najamatabëcuenejëpae. Itsamonae jitsipa

pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. ⁵ Nexata judíovi, apo judíovinua, tomara pevetsivinua, jamatabëbijatanetsibeje Pablobeje Bernabébeje. Jamatabëtseconatsibejena ibotonëta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Listra tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. ⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Listra tomarata yabara pelivaisi

⁸ Listra tomarata naeca petaxucuenabinëtsi. Penaexanaejavaveliacujinae apo ponaponae caeto ata. ⁹ Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcueneyapëtane petaxucuenabinëtsi pejamatabëjumaitsijava: “Dioso pepacuenecaëjèpatsi tanetaxuxanepanaeyaexanaenexa,” pejamatabëjaijava. ¹⁰ Nexata Pablo pinijijumeta jumaitsi petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. ¹¹ Jivibitsaëttoxanetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae

pijajumeta, Licaoniajumeta, pinijijumeta
jumaitsi mapacueniaje:

—¡Diosonēbeje cajena! ¡Bevaxaitsi jivi-
tonēbejecuenia patsica vaxaitsijavabetsica! ¡jai
bajarapamonae.

¹² Bajarapanacuapijivi xaina pijadioso-
vivi. Itsiata apo pepo diosovi. Nexata Bernabé
tanetsi beZeusvënēdiosonē. Pablo pijinia
tanetsi beHermesvënēdiosonē. Tsipaji Pablo
penamatacanajetarucaenē. Nexata jivi
barēcuaicuaijai tsabiabi. ¹³ Zeusvënēdiosonē
pijatemplobo eca Listratomara jumaverena,
Listra tomarabelia pejonebaupa imoxoyovecua.
Nexata sacerdotenē, Zeusvënēdiosonē pijatem-
plobota penacuenebabiabinē, capata torobitsaēto
Listra tomarabelia pejonebaupajavaberena.
Bajarapatorobitsaēto matabocoitabētsiaya
tsimataruba pematono. Nexata sacerdotenē,
Listra tomarapijivi yajava, tobejitsiatsibeje picani
bajarapatorobitsaēto Pablobeje Bernabébeje
ofrendacuenia bajarapavi petotajuitsinexatsi-
beje. Bajarapacuenia picani totajuitsijitsiatsibeje
tsipaji bediosonēbeje tanetsibeje. ¹⁴ Nexata
Bernabébeje Pablobeje itsa jumetanebeje
bajarapacuene petoexanaejavanexatsibeje,
apo jitsipaebeye. Nexata penaxatatsijavabeje
mēpabētītinaxuabarecabeje. Tsipaji Dioso
apo pejitsipaecuenia bajarapamonae
toexanaejitsiatsibeje. Nexata cujinaejinaliabeje
jivibitsaēto xanetonē penacaetuanajavabelia.
Nexata bajarapajivibitsaēto xanetonē tuatujēta
nucabeje. Pinijijumeta Pablo jumaitsi:

15 —¿Detsa xuajitsia bajarapacuenē panetoexanaejitsiamē? Paxanēbeje ata raja saya pajivitonēnēbeje. Pacuenia paxamē pajamatabēcueneitsimē, bajara saya paxanēbeje ata patajamatabēcueneitsinēbeje. Papatajopajēbeje patacatsipaebinxabeje pexanialivaisi. Panajamatabēcuenepēnyorore bajarapacuenia paneexanabiabijavavecua panejumecovēnētsinexa pepo Dioso apo peyamatacabiavereverecaenē. Dioso raja daxitacuene pexanaenē. Exana mapanacuaje, mapanacuapijicuene yajava. Exana itaboxo ata, itaboxopijicuene yajava. Exana manuumene ata, manuumenepijicuene yajava. 16 Dioso copata vajavajēnaeya daxitanacuapijivi pejinavanapaenexa pijacuata penatojitsipaecuenia. 17 Nexata Dioso daxitacuene pexanaejava, nacobecovētaeyaexanabiaba daxitajivijavabelia. Nexata picani bajarapamonae becanaējēta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vjaubijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabēcuenebarēyayaexananua, jai Pablo pamonaejavabelia picani torobitsaēto tobejitsiatsibeje.

18 Bajarapacuenia Pablo jumaitsi ata, itsiata picani bajarapamonae jamatabētobiatsibeje torobitsaēto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja

belia copatsiaexanabeje.

¹⁹ Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bjaraxuacujinae tomarapënëyabelia robobocaliatsi. Tsipaji baja bepetëpaenë taeyabuataatsi. ²⁰ Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabébeje ponabeje baja Derbe tomarabelia.

²¹ Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtatsibeje jivibitsaëtoخانeto. Bjaraxuacujinae icatsia naviatanajetarucabeje Listra tomarajava, Iconio tomarajava ata, Antioquía tomarajava ata. ²² Bjarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponaenexabeje Dioso pejumecovënëtsivi. Muxujiobaponabeje bajaramonae pevajënaeyabelia ajamatabëcuenesaëya pecatsitecaenexa Dioso pejumecovënëtsijava. Pablobeje Bernabébeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenejëtaponaena daxita

vajajonevinexa Dioso pijanacuayabetsia, jaibeje tsaponae Dioso pejumecovënëtsivijavabelia.

²³ Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabibeje pexaejava. Nexata penacaetuatsijavata itsa toitapetabeje, japasa tovajëtabiababeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename ma-paancianovije xaniavaetsia pecatoevetsinexa nijajivi, jaibeje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata peecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaebeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tsipaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsimatanacobebuatatsibeje

Dioso peyavenonaponae nexatsibeje jivi
 petsipaebanajetaruaejavatabeje Dioso
 pitorobilivaisi. Pablobeje Bernabébeje
 Antioquía tomarata patabeje. Tsipaji
 baja toveretabeje daxita pacuenia Dioso
 itorobatsibeje. ²⁷ Itsa baja Antioquía tomarata
 patabeje, junatabeje penacetuatsinexa daxita
 Dioso pejumecovënëtsivi. Nexata bajarapa-
 monaejavabelia tsipaebabeje daxita Dioso
 peyavenonaponaejavatsibeje. Tsipaebabejenua
 apo judíovi ata pejumecovënëtsijava Dioso
 pitorobilivaisi. Tsipaji baja cajena Dioso
 tocopata apo judíovi ata pejumecovënëtsinexa
 bajarapalivaisi. ²⁸ Pablobeje Bernabébeje
 Antioquía tomarata bajayajebi naponaponabeje
 Dioso pejumecovënëtsivijavata.

15

*Pacuenia apóstolevi, ancianovi yajava, nacaetu-
 ata Jerusalén tomarata yabara pelivaisi*

¹ Pamatacabi Pablobeje Bernabébeje
 ponaponabeje Antioquía tomarata, judíovi,
 Judea nacuaverena peponaevi, pata Antioquía
 tomarata. Nexata bajarapamonae Dioso pejume-
 covënëtsivijavabelia livaisi tsipaeba. Petsipaebija-
 vata bajarapamonae jamatabëcuenenavëxaniabiaya
 jumaitsi mapacueniaje:

—Panamatavenoname paxamë ata papecaper-
 abëcaucubinexa pacuenia Dioso Moiséspijinëta na-
 jumecopata. Itsa jume, nexata acuenebi tsane pa-
 pecacapanepaejava Diosojavabelia, jai tsaponae
 judíovi, pepatsivi Judea nacuaverena.

2 Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barénajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

3 Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacuajava, Samaria nacuajava ata. Bajaraxuayo Dioso pejumecovënëtsivijavabelia tsipaebapona apo judíovi ata pijaperujujamatábëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

4 Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. 5 Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonanua bajarapamonae pejumecovënëtsinexa Dioso Moiséspijinëta

penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. ⁷ Bajayajebi baja namataenetsia penabarëcuaicuaijaicujinae, nexata Pedro nonotapuna. Jumaitsi:

—Tajamonae, payapëtaneme rabaja mapacueneye. Xanë baja cajena bajaya Dioso nitapeta, paxamëyajuvënënë, apo judíovijavabelia tatsipaebinxexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta. ⁸ Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacueneye tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacueneye pexanaeneconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamonae paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacaëjêpae vajajumecovënëtsinexa. Vajasalinaivimi ata apo caëjêpaetsi pejumecovënëtsinexa

bajarapalivaisi. ¹¹ Vaxaitsi baja jumecovënētatsi Jesús pelivaisi. Nexata vajatuxanenē Jesucristo pejamatabëcueneta Dioso vanacaitaxutotsoniataexae, nacacapanepaena pibisiacuene vajaexanaeneconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeneconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaëta pinijicuene pexanaejavanē exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. ¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. ¹⁴ Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeneconivecua Jesús pelivaisi itsa jumecovënēta. ¹⁵ Bajarapacuenia apo judíovi ata aneconijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

¹⁶ “Bajayata abaxë pamatacabi Davidpijinë evetaponapona Israelnagua, xaniavaetsia jivi nejumecovënētavanapa. Bajara icatsia

pacuenia jivi xaniavaetsia tanejume-
covënëtaavanapaenexa, yavenonaenajë.
¹⁷ Nexata apo judíovi ata, daxita pamona
junatsianajë tajajivinexa, bajarapamonae
ata jitsipaena tanejumecovënëtsinexa,” jai
bajayata Dioso mapacueniaje. ¹⁸ Dioso
baja cajena tajëvelia yapëtaeyaexana daxita
mapacuenia yabaraje,

jai profetavi peyaquinaelivaisita, jai Santiago
apóstolevijavabelia, ancianovijavabelia ata.

¹⁹ Icatsia Santiago jumaitsi apóstolevijavabelia,
ancianovijavabelia ata:

—Nexata xanë jamatabëitsinë mapacueniaje.
Apo jamatabëitonotsi tsanetsi baja matavëjëa apo
judíovi, pamona baja najamatabëcuenepënëyorota
Diosojavabelia. ²⁰ Itsiata baitsi jane caeliv-
aisiyobeje toyaquinaenatsi cuyalatobaxutota
vajayapëtaeyaexanaenexa bajarapamonae.
Itsamonae xaina pecobeta saya jumapecataeya
pexanaenëanë bepijadosovi petaenexa.
Nexata bajaraxuanëjavabelia ofrendacuenia
pevi perajutsinexa, tobeyabiaba baca, oveja
ata. Toyaquinaenatsi bajarapayajuvënëvi
pexaeyaniva. Toyaquinaenatsinua daxita
pebijivi peyapëtaenexa, daxita petiriavi ata
peyapëtaenexa. Papebijivi baja nacojioba,
pematayajibiyanivatsi itsavajavabelia pijavave-
cua. Papebijivi pijinia abaxë apo nacojiobi,
pematayajibiyanivatsi petirivajavabelia. Bajara
pijinia pacuenia petiriavi ata. Papetiriavi baja
nacojioba, pematayajibiyanivatsi itsanëjavabelia
pamonavecua. Papetiriavi pijinia abaxë apo
nacojiobi pematayajibiyanivatsi pebijavabelia.

Toyaquinaenatsinua bajarapamonae pexaeyaniva cuibocuetacaeya pebeyaxuabinē pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovēñetsivi peyapētaenexa xua vaxaitsi judíovitsi kujunavatsi. Nexata itsamatacabijavabelia ata apo judíovi pejamatabēcuenebijianaeyaniva judíovijavabelia. ²¹ Tsipaji bajarapalivaisi Dioso Moiséspijinēta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuenē. Itavetabiabatsi bajarapacuenē penacueraevetsimatacabianē canacujitsia penacaetuatabiabibonējava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovina, daxita Dioso pejumecovēñetsivina, najamatabējēpa penaitapetsinexa bajarapamonaejävēñēvi pitorobinexa Antioquía tomarabelia Pablobeje Bernabébeje pepēta. Nexata itapetatsibeje Silasbeje Judasbeje. Judas vēñerubatsi itsavēñē, Barsabás. Bajaraponēbeje Dioso pejumecovēñetsivi penamatacaitorobivi yävēñēñēbeje.

²³ Pacuyalatobaxuto bajaraponēbeje tocaponaejitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanē paapóstolevinē, pacajamatabēnajinaliatsi. Vajamonae ancianovi ata pacajamatabēnajinalia. Pacajamatabēnajinaliatsi daxita apo pajudíovimē, Antioquía tomarata panejinavanapaevi. Paxamē ata Siria nacuata

panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi. ²⁴ Pavënëlivaisitaniji pacuena pacajumaitsi paxanëyajuvënëvi papeca-sivaxainaevilia. Bajarapamonae pina nexata pacanajamatabëcuene epatajërërëcaeyaexanapona. Tsipaji pina bajarapamonae pacajumaitsi: “Panamatavenoname paxamë ata papeca-perabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamona pacajumaitsi bajarapacuenia, paxanë cajena apo paitorobinë paxamëjavabelia. ²⁵ Nexata paxanë patanacaetuatsijavata, panajamatabëcuenejèpajè pataitapetsinexa ponèbeje paitorobijitsianë paxamëjavabelia pecaponaenexabeje patacatoyaquinaelivaisi. Bajaraponèbeje naliabeje Bernabébeje Pablobeje pepëta. ²⁶ Vajabananèbeje, Bernabébeje Pablobeje, bitso vaxaitsi asivatsi. Bajaraponèbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, itsiata ajamatabëcuenesaèbeje tsaponapona. ²⁷ Nexata bajaraponèbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸ Itsa panacaetuatajè Espíritu Santo paneyavenona patayapëtaenexa peyapëxanepanelivaisi patacatoitorobinexa panejumecovënëtsinexa. Nexata baja apo panamatavenonaemë panejumecovënëtsinexa piayapëbejelivaisi, palivaisi daxita pajudíovinë pajumecovënëtajè.

Pacaitorobatsi palivaisi bitso panamatavenoname panejumecovënëtsinexa. ²⁹ Pecobeta saya jumapecataeya pexanaenëanëjavabelia ofrendacuenia pevi perajutsinexa itsamonae itsa tobia baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepëta. Nexata baja naponabeje. Bajarapamonae pata Antioquia tomarabelia. Nexata Antioquia tomarapijivi junata daxita Dioso pejumecovënëtsivi penacaetuatsinexa. Nexata penacaetuatsijavata rajutabeje bajarapacuyalatobaxuto. ³¹ Antioquia tomarapijivi itsa leba bajarapacuyalatobaxuto, bajarapamonae bitso jamatabëcuenebarëya. ³² Judasbeje Silasbeje Diosojumepaebinëbeje profetanëbeje. Nexata ayailivaisi tsipaebabeje

Antioquía tomarapijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjjobabeje penaviatsinexabeje baja pitorobilivitsijavabelia. ³⁴ Pepuanapëjjobibeje baja, Silasbeje abaxë itsiata icatsia nacopatabeje bajarajota. ³⁵ Pablobeje Bernabébeje ata abaxë ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquía tomarata Pablobeje Bernabébeje bajayajebi ponaponabeje. Pablo jumaitsi Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. ³⁸ Itsiata baitsi jane Pablo apo jitsipae baja icatsia Marcos pebarëponaenexabeje.

Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejala. ³⁹ Nexata Pablobeje Bernabébeje apo najamatabëcuenjëpabeje Marcos pebarëponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovajëtatsibeje Diosojavabelia peyavenonaponaenexatsibeje penajetaruaejavabeje. ⁴¹ Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsapona.

16

Pacuenia Timoteo Listra tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë.

² Daxita Dioso pejumecovënëtsivi, Listra tomara-pijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtaponapona, jai tsabiabi.

³ Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucaejitsia, judíovi penaperabëcaucubivi jinavanapa. Nexata judíovi apo jitsipae peyajavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucaejitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi.

⁴ Pablobana tomaranëjava itsa najetarubena, caetomarapijivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipae-banajetarubena caetomarapijivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena.

⁵ Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayaibitsaëto jumecovënëtapona.

Pacuenia Pablo bemajitsinaebota tane Macedonia nacuapijinë yabara pelivaisi

⁶ Espíritu Santo apo tocopatsitsi Pablobana petsipaebinexa Dioso pitorobilivaisi Asiavënë nacuata. Bajaraxuata Pablobana najetarubena Frigia nacuajava, Galacia nacuajava ata. ⁷ Pablobana itsa najetarubena Misianacua muxubërëa, jamatabëpata picani Bitinia nacuajava. Itsiata baitsi jane Espíritu Santo apo tocopatsitsi pepatsinexa Bitinia nacuajava. ⁸ Nexata Misianacua canacujitsialia roviaia ponalia. Pata Troas tomara-belia. ⁹ Nexata Troas tomarata meravi Pablo bemajitsinaebota taenuta Macedonia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinë.

¹⁰ Pablo bemajitsinaebota petaenutsicujinae Macedonia nacuapijinë, bepijia paxaniavaetajë patajajavaxi patanicabinexalia Macedonia nacuayabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropobajë. Panaponajë barcota. Roviaia panayanicabaliajë patapatsinexa Samotrasiatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis

tomarabelia. ¹² Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayaibitsaëtöxaneto Roma tomaraverena pepatsivi. Bajarapatomarata panajinavanapajë caematacabimaxëto. ¹³ Nexata abaxë itsa panajinavanapajë Filipos tomarata, judíovi penacueraevetsimatacabita papitsapajë tomarapënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya itsa pajaitanajetarubenajë, petiriavi penacaetuatenaevi mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petiriavijavabelia. ¹⁴ Bajarapapetiriaviyajuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipapaëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi. ¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaÿyata panejunata patanajinavanapaenexa pijabota. Nexata panaponajÿ bajarapova pijaboyabelia bajarapova pijabota patanajinavanapaenexa.

¹⁶ Paponabiabajÿ mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabÿcueneta tajÿvelia petiriva yapÿtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajÿvelia xaniavaetsia tsipaebabiaba. Nexata pacuenia bajarapova tajÿvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabÿcuene, pijatuxanevi pitabiaba. ¹⁷ Bajarapova nexata panepÿnanajetarucabiaba. Bajarapova pinijijumeta jumai tsanajetarucabiabi paxanÿ yabara:

—Mapapebijivije, athÿbÿtatsia peecaenÿ Dioso pijajivi. Pacatsipaebapona papecacapanepaelivaisinexa pibisiacuene paneexanaeconivecua, jai tsanajetarucabiabi petiriva paxanÿ yabara.

¹⁸ Bajarapacuenia najuamatacabianÿ jumai tsanajetarucabiabi itsa panepÿnanajetarucabiaba. Nexata bitso Pablo pejamatabÿitonotabiabixaetsi, belia napÿnÿyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitisjavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia.

²⁰ Jivi penaneconitsiaexanabiabivi, juezmonae, pitabarata nutatsibeje. Pamonaе Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanaponabeje vajatomarapijivi. ²¹ Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

²² Nexata jivi ayaibitsaëtoخانeto baraanaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatatsijavabeje pevejuma-jonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota.

²³ Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia

juezmonae itoroba penaneconitsivi pejebabi-abibo pevetsinē Pablobeje Silasbeje xaniavaetsia pevetsinexatsibeje penaneconitsivi pejebabi-abibo ēnētuatuajēta. ²⁴ Penaneconitsivi pejebabiabibo pevetsinē juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pēnēyatuucubijavanē, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bjaraxuacujinae xaniavaetsia yasicatarērētatsibeje cepovēnējavata.

²⁵ Nexata meravituatuajēta Pablobeje Silasbeje vajētabeje Diosojavabelia. Diosojumevajianē naxēanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxēanecaejavabeje. ²⁶ Nexata jemata bajarapaepatota ira najēabapeneta pinijicuenia. Penaneconitsivi pejebabiabibo, daxitabo, nanquebeca. Caecuenia daxita baupanē nabaupana pijacuata. Daxita penaneconitsivi pacadenamaētonēta cobecēbejebatsi, vecobeothopatsi. ²⁷ Penaneconitsivi pejebabiabibo pevetsinē naēcotapuna pemajitecaenēmi. Nexata itsa tane daxita baupanē penabaupanaejava, navemarajonotaxuabina pijaespada penabeyaxuabinexa picani. Tsipaji jamatabējumaitsi: —Daxita meta baja penaneconitsivi rēcēpeca. Nexata bajarapajamatabēcuene yabara nenaneconitsiaexanaena tomara pevetsivi, jamatabējai.

²⁸ Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

²⁹ Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepijia tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematabacabëta nucajunua Pablobeje Silasbeje pitabarata. ³⁰ Bajaraxuacujinae penaneconitsivi pejebabiabibo pevetsinë barëpitsapaliatsibeje Pablobeje Silasbeje. Penaneconitsivi pejebabiabibo pevetsinë jumaitsi:

—¿Detsa xua exanaenajë tanecapanepaenexa Diosojavabelia? jai Pablobeje Silasbejevabelia.

³¹ Nexata Pablobeje Silasbeje jumaitsibeje:

—Najamatabëcuenecopare pepo petuxanenë Jesucristojavabelia pecacapanepaenexa Diosojavabelia. Xamë nijabota pejinavanapaevi ata Jesucristojavabelia najamatabëcuenecopatsi pecapanepaenexatsi Diosojavabelia, jaibeje.

³² Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata.

³³ Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquiatatsibeje. Nexata bajaraponë, pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenebarëya Dioso pejumecovënëtsixae.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa.

³⁶ Nexata penaneconitsivi pejebabiabibo pevetsinë jumaitsi Pablojavabelia: —Juezmonae rabaja netonajumeitorobarena patacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejejavaberenata. Tsipaji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. ³⁹ Nexata juezmonae parena. Jumaitsi Pablobeje Silasbejejavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujiobabeje bajarapamonae piajamatabëcuenesaënexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevetsimatacabianë canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabiabibota:

—Dioso baja cajena pejumelivaisibaxutota tajëvelia vajunupaebatsi Cristo, ponë baja Dioso itorobica jivi pecapanepaenexa. Tajëvelia baja cajena Dioso pejumelivaisibaxutota Cristo vajunupaebatsi pijavajabitsaë ayaicuenia pebejiobiaexanaejavanexatsi. Vajunupaebatsinua baja cajena Cristo petëpaecujinae icatsia piasaëjavanexa. Bajaraponë raja Jesús, ponë pelivaisi pacatsipaebatsi. Bajaraponë raja Cristo, ponë Dioso itorobica jivi pecapanepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabiabibota.

⁴ Nexata judíoviyajuvënëvi jumecovënëta Pablo petsipaebabiabilivaisi. Ayaibitsaëto griegovi ata, Dioso pejitsipaevi, jumecovënëta Pablo petsipaebabiabilivaisi. Ayaibitsaëto petiriavi ata, petuxanevi pijavajivi, jumecovënëta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejajavata.

⁵ Nexata judíovi, pamonaë apo jumecovënëtsi Pablo petsipaebabiabilivaisi, Pablo cuenecaëbatsi. Tsipaji Pablojavabelia jivi ayaibitsaëto jonepona. Nexata bajarapajudíovi junata jivi ayaibitsaëto xaneto pibisiajamatabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barënacaetuata. Nexata daxita bajarapajudíovi, pejunatsivi jane baja yajava, barënamatabëcueneyanaba. Nexata itoroba bajarapatomarapijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënënë pijabota. Nexata daxita pamonaë anaepana

bajarapatomarata, Pablobeje Silasbeje jemata tsimaxëpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixaetsibeje, nexata pamona anaepana, vaetabatsi Jasón, itsamonae yajava, pamonae Dioso pejumecovënëtsivi. Robobocaponaliatsi Jasónbana tomara pevetsivijavabelia. Nexata pamona anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje pi-anaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponë nucaje, tocopata pijabota penaponaponaenexabeje Pablobeje Silasbeje. Daxita pamonae Jasón mayajavanucaje, Pablobana ata, daxita bajarapamona, apo jumecovënëtsi cajena Romanonacua pepo pevetsinë pitorobilivaisi. Daxita bajarapamona jumai tsabiabi: “Romanonacua pepo pevetsinë rabaja apo nacayanacuaevevtsi. Itsanë rabaja nacayanacuaeveveta. Bajaraponë pevënë Jesús,” jai tsabiabi daxita bajarapamona, jai najumetsënëtsiaya tomara pevetsivijavabelia pamona anaepana.

⁸ Nexata bajarapacuenia pejumaitsiyava itsa jumetane, daxita tomarapijivi tomara pevetsiv-inua bitso anaepana. ⁹ Nexata Jasón, Dioso pejumecovënëtsivi yajava, palata matamotsiaex-anatsi tomara pevetsivijavabelia, Pablobeje Silas-

beje pevecuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponēbeje mapatomaravecuaje, pacatocanaviabi-anatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana pe-naviabinexa pijabonējavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovēnētsivi bepíjia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabiabiob-javabelia.

¹¹ Ajamatabēcuenetaja pajudíovi jinavanapa Tesalónica tomarata. Nexata apo jumecovēnētsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabēcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabiabota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapētaenexa xaniajai bajarapacuenia itsa jumaitsi Pablo petsipaebabiabilivaisi.

¹² Berea tomarapíjivi judíovi ayaibitsaēto jumecovēnēta Pablo petsipaebabiabilivaisi. Ayaibitsaēto pijinia

griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. ¹³ Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojavabelia. ¹⁴ Nexata Berea tomarapijivi, pamonae jumecovënëta Pablo petsipaebabiabilivaisi, bajarapamonae Pablo bepijia itorobatsi peponaenexa manuumene itapata peecaetomarabelia. Silasbeje abaxë Timoteobeje nacopatabeje Berea tomarata. ¹⁵ Pamonae Pablo yanataponaliatsi, pënaxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuenecaëjëpaenatsibeje, bepijia renabeje tsane tanecaxitajarabinexabeje Atenas tomarata, jai Pablo bajarapamonaejavabelia.

Bajaraxuacujinae pamonae Pablo pënaxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tuatuajëjava. Nexata Atenas tomarapijivi pematabacabëta nubenabiaba pevajëcabinexa

bajarapajumapecataevijavabelia. Nexata Pablo itsa tane bajarapacuene, bejamatabëjiobi bitso. ¹⁷ Nexata judíovi penacaetuatabiabibota Pablo Dioso pitorobilivaisi yabara barënajumenotabiaba pevëna judíovi. Barënajumenotabiabanua apo judíovi ata, pamonaë Dioso pejitsipaevi. Caematacabi canacujitsia barënajumenotabiabanua pamonaë Pablo caxitajarabatsi tomara tuatujëta. ¹⁸ Nexata Pablo caxitajaraba pebijivi, epicúreomonaë pecujarubilivaisi pejumecovënëtavanapaevi. Caxitajarabanua itsapebijivi, estoicosmonaë pecujarubilivaisi pejumecovënëtavanapaevi. Bajarapamonaë ata Pablo barënajumenota. Nexata Pablo pebarënajumenotsijavata, bajarapamonaëyajuvënëvi Pablo yabara muetsia najumaitsi:

—¿Detsa meta pitsilivaisi maponëje namatatsapatsia nacabarëcuaicuaijajije? najai bajarapamonaë Pablo yabara.

Itsamonaë pijinia Pablo yabara najumaitsi:

—Itsanacuapijivi racovë pijadiosoivi pelivaisi-paëbinë, najai bajarapamonaë.

Bajarapacuenia najumaitsi tsipaji Pablo tsipae-bapona pexanialivaisi, Jesús pelivaisi. Tsipae-baponanua petëpaevimi icatsia itsamatacabi pi-asaëjavanexa petëpaecujinaë. ¹⁹ Nexata bajarapamonaë Pablo barëponaliatsi Areópagovënë tsutojavabelia, patsutojavabelia tomara pevetsivi nacaetuatabiaba penabarëcuaicuaijainexa. Itsa baja palia bajarabelia, bajarapamonaë jumaitsi Pablojavabelia:

—Panetsipaebare patayapëtaenexa papejanalivaisi tsipaebaponaë. ²⁰ Panetsimumuxaitothia

abaxë palivaisi tsipaebaponame. Nexata pajitsi-pajë patayapëtaenexa pajamatabëcuenelivaisi xaina palivaisi tsipaebaponame, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pamonaë bajarapatomarata najinavanapa, daxita bajarapamonaë jamatabëcueneenabiabatsi pejanalivaisi pejumetaeyabiabinexa. Jamatabëcueneenabiabatsinua petsipaebabiabinexa itsamonaëjavabelia ata.

²² Nexata Pablo nonotapuna bajarapamonaë tuatuajëta Areópagovënë tsutojavata. Jumaitsi:

—PaAtenas tomarapijivimë, pacatanetsi rabaja panijadiosovi bitso papecajamatabëcueneenabiabijava.

²³ Tanajetarucabiabijavata panijatamaracallejava, taeyabiabajë itsaxuayo pavajëcabiabame panijadiosovijavabelia. Nexata caxitajarabajë altarvënëjava, itsajota jivi vajëcabiaba abaxë apo yapëtae ata padiosojavabelia vajëcabiaba. Bajarapaaltarvënëjavata peyaquinarutsiitane jumai tsarucae mapacueniaje: “Padioso abaxë apo yapëtaetsi, bajarapadiosojavabelia vajëcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvënëjavata, nexata bajarapaDiosojavabelia paxamë baja najamatabëcuenecopatsiaya panavajëcabiabame, abaxë apo payapëtae atamë bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicue ne yajava. BajarapaDioso pepo pevetsinē jane baja daxita mapanacuaje. Pevetsinē itaboxo ata. BajarapaDioso cajena apo ponaponae jivi pexanaetemplota. ²⁵ BajarapaDioso apo namatavenonae jivi peyavenonaenexatsi. Tsipaji apo namatavenonae itsacuenejavayo ata. Biji rajane bajaraponē nacarajuta caepatoyo vajaasaëtsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athëbëtatsia peecaenē, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenē pebi exana. Bajaraxuacujinae bajarapapebijavaverena naexanapona daxitaviriajumevi pijasalinaivimi. Nexata bajarapapebijavaverena penaexanaponaevi yacaējëpa pejinavana-paejava daxitanacuanëjava. Nexata Dioso caeviriajumevi canacujitsia tocopatapona pamatacabibeje asaë tsavanapaejitsia. Tocopataponanua panacuanëjava jinavanapaejitsia.

²⁷ Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabëcuenecopatsinexa Diosojavabelia. Dioso cajena tajë apo nacavecuaponaponae.

²⁸ Dioso raja pejamatabëcueneta asaë tsavanapaetsi. Bajarapacuenia Dioso pejamatabëcueneta asaë tsavanapaetsi tsipaji baja cajena paxamëyajuvënëvi bajayata

peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitsitsi mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacueni exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacueni pexanabiabijava yabara. Itsiata baitsi jane maparucaeje Dioso itoroba daxitajivi daxitanacuanëjjava pejinavanapaevi pibisiacueni pexanabiabijava pecopabinexa baja, penajamatabëcuenepënëyorotsinexa Diosojavabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaëjëtaruta. Pamatacabi Dioso tocaëjëtaruta, itsa copiapatsiana, naneconitsiaexanaena daxitanacuanëpijivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane

bajarapacuenia Pablo pejumaitsijava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxu-naevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona. ³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonaе jumecovënëta Pablo petsipaebilivaisi yajuvënënë, pevënë Dionisio. Bajaraponë Dionisio, Areópagovënë tsutojavata penacaetuatabiabivi pevetsiviyajuvënënë. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipae-baponaponaecujinae Dioso pitorobilivaisi, pona baja. Nexata pata Corinto tomarabelia.

² Nexata Corinto tomarata Pablo caxitajaraba judiónë, Aquilavënënë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapapona daxita judíovi pepitsapaenexa Roma

tomaravecua. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapêtane pejorocaejava carpabonë. ⁴ Judíovi penacaetuatabiabibota, penacueraevetsimatacabianë canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacue ne Cristo, ponë copiaevetavanapatsi pepatsijavatsica vajanacacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaeyava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nënëbabia bajarapamonae peyapëtaenexa penaneconitsijava Diosojavabelia. Tsipaji apo jumecovënëtsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamë saya panejamatabëcueneta panaxuabianame Diosovecua. Xanë tajamatabëcueneta

apo panaxuabimë tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovënëtsimë. Aeconoxae rabaja copatajê patacatsipaebabiabijava paxamëjavabelia bajarapalivaisi. Tavajënaeyabelia baja ponaenajê tatsipaebaponaenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabiabibovecua pitsapa. Nexata pona Justovënënë pijaboyabelia. Nexata Justo pijabota Pablo naponapona. Bajaraponë Justo penavajëcabiabinë Diosojavabelia. Pijabo eca judíovi penacaetuatabiabibo muxuneneta. ⁸ Nexata Crispovënënë, judíovi penacaetuatabiabibo pevetsinë, daxita pijabopijivi barëjumecovënëta Jesús pelivaisi. Ayaibitsaëto Corinto tomarapijivi, pamonaе jumetane Pablo petsipaebabiabilivaisi, jumecovënëta. Nexata bajaramonaе nabautisaba. ⁹ Nexata meravi bemaitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaejava tajumelivaisi. ¹⁰ Xanë raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaëto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tsipaebaponaпona Dioso pitorobilivaisi Corinto tomarapijivijavabelia.

¹² Pamatacabi Galiónvënënë Acayanacua evetaponapona, judíovi najamatabëcuenejëpaeya tsimaxënacatuatatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi

nacuaevecsine Gali3n pitabarata. ¹³ Nexata jud3ovi jumaitsi nacuaevecsine Gali3n javabelia:

—Mara poneje jivi livaisi tsipaebaponaje pejumecov3n3sinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxan3 cajena bajarapacuenia apo panetonajumecopatsi Dioso Mois3spijin3ta penajumecopatsilivaisi, jai jud3ovi nacuaevecsine Gali3n javabelia Pablo yabara.

¹⁴ Ajena picani Pablo jumepitsijitsia jud3ovi, itacarajeta nacuaevecsine Gali3n jumaitsi jud3ovijavabelia:

—Paxam3 pajud3ovim3, bepayap3taneme mapacueneye. Itsa maponeje nacobetoxotsipa, jiviton3 ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipaj3. ¹⁵ Paxam3 saya pabar3najumenotame maponeje papecatsipaebaponaelivaisi yabara. Pabar3najumenotamenua panijasalinaivi pijalivaisi yabara ata. Nexata saya paxam3 panijacuata bajaraxua yabara pabar3cuaicuaijam3re pacuenia pajitsipame. Xan3 raja apo evetsine bajarapalivaisi, jai nacuaevecsine Gali3n jud3ovijavabelia.

¹⁶ Nexata baja nacuaevecsine Gali3n navecuapitsapaeyaexana jud3ovi. ¹⁷ Nacuaevecsine Gali3n jud3ovi navecuapitsapaeyaexanae ata, caecuenia abax3 jud3ovi apo ponae pijabon3javabelia. Nexata griegovi, bajarajota penubenaevi, nacobenavaetaba jud3oviyajuv3n3n3, S3stenesv3n3n3. Bajarapon3 S3stenes jud3ovi penacaetuatabiabibo pevetsine. Nexata griegovi S3stenes conibabia nacuaevecsine Gali3n pitabarata, ajibi ata

peyabaraconibabejava. Nexata nacuaevetsinë Galión tae ata bajarapacuene, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bjaraxuacujinae Dioso pejumecovënëtsivita napëjioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamamani matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. ¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabiboyalialia. Nexata bajarajota barënalivaisita judíovi. ²⁰ Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai. ²¹ Nexata Pablo itsa napëjioba, bajarapamonaejavabelia jumaitsi:

—Naxanetajë tapatsinexa Jerusalén tomara-belia tataenexa pafiesta baja imoxoyo pevajënae pejonenexa. Itsiata icatsia najetarucaenajë paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea

tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquía tomarabelia. ²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomaranëjava. Najetaruca Galacia nacuata penaetomaranëjava, Frigia nacuata penaetomaranëjava ata. Bajarapatomaranëjava pejinavanapaevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judíonë Apolosvënënë pata Efeso tomarata, Alejandría tomarapijinë. Bajaraponë xaniavaetsia Dioso pitorobilivaisi jivi tsipaebabiaba. Jumeyapëtane bitso pacuenia Dioso pejumelivaisibaxutota jumaiti.

²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaejava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcuenesaëya xaniavaetsia tsipaebanajetaruca Jesús pelivaisi.

²⁶ Apolos ajumejunavijibia Dioso pitorobilivaisi jivi tsipaeba judíovi penacaetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona

Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuayabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bजारapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuayabelia, Apolos bitso yavenona Acaya nacuapijivi Dioso pejumecovënëtsivi. ²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapëtaeyaexanapona Jesús pepacune Dioso athëbëvetsica pitorobijavatsitsica jivi pecapanepaenexa. Nexata baja judíovi moya ena. Tsipaji acuenebi judíovi: “Jume raja,” pejajjava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamatacabi pijinia Pablo ibot-sutonë nacuajavaverena najetaruca pepatsinexa Efeso tomaraberena. Efeso tomarata Pablo itsa

pata, caxitajaraba caejivibeje Jesús pelivaisi pe-jumecovënëtsivi. ² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtame Jesús pelivaisi? jai Pablo.

Nexata bajarapamona jumaitsi:

—Jume. Apo payapëtaenë patanetsijamatabëjonejava Espíritu Santo. Apo pavënëtaenë cajena Espíritu Santo ata, jai bajarapamona Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamona jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamona.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamona baja copaba pibisiacuene pexanaejava, pamona baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamona itsa jumecovënëta Jesús pelivaisi, nexata Pablo bautisaba bajarapamona petuxanenë Jesús pevënëta. ⁶ Nexata Pablo

pevajëtsijavata Diosojavabelia, tsimatanacobe-
buata bajarapamonae. Nexata bajarapamonae
Espíritu Santo tsijamatabējunuatsi. Nexata
bajarapamonae itsa cuaicuaijai, ajumeithia
pecuaicuaijaijava. Tsipaji itsaviriajumenëta,
apo penatsipaebijumenëmi, cuaicuaijai.
Bajaraxuacujinae jane baja bajarapamonae
Dioso pitorobilivaisi tsipaebapona jivijavabelia.
7 Daxita meta bajarapamonae bejamatabëcuene
doce ponëbeje.

8 Efeso tomarata Pablo acueyabi pajuametobeje
ponapona. Nexata Pablo Efeso tomarata, judíovi
penacaetuatabiabibota, judíovijavabelia ajume-
junavijibia tsipaebabiaba Dioso pitorobilivaisi.
Pablo judíovi barënajumenotabiaba Dioso pijajivi
pevetsijavanexa yabara. Bajarapacuenia Pablo
barënajumenotabiaba judíovi pejumecovënëtsinexa
Dioso pijajivi pevetsijavanexa. 9 Itsamonae itsiata
amatabocotaja. Apo jitsipae pejumecovënëtsijava
bajarapalivaisi. Bajarapamonae daxitajivi
pitabarata pibisiacuenia baracuaicuaijai
pexanialivaisi, Jesús pelivaisi. Nexata baja
Pablo vecuanatsata bajarapamonae apo
pejumecovënëtsixae Jesús pelivaisi. Pablo
nexata, Jesús pelivaisi pejumecovënëtsivi yajava,
pona Tirannovënënë pijaescuelabojavabelia,
bajarapabota penacaetuatabiabinexa.
Bajarapabota nexata Pablo caematacabi
canacujitsia pexanialivaisi, Jesús pelivaisi,
jivi tsipaebabiaba. 10 Bajarapacuenia Pablo
tsipaebapona anijavaibeje. Nexata daxita
Asiavënë nacuapijivi, judíovi, apo judíovi ata,
jumetane petuxanenë Jesús pelivaisi. 11 Dioso

yavenonatsi Pablo Dioso pesaëta pinijicuene pexanaejavanë pexanaponaenexa. ¹² Nexata pamonaë toavitanetsi, pijamonae Pablo penaxatabijavanë, pijapañueloxi ata, daxita xuaxi Pablo naperabëcajayaba, tocaponabiaba piavitanevi peperabëcajayabinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranëjava najetarubena. Bजारapamonae Jesús pelivaisi apo jumecovënëtsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponëbeje tsavanapae. Bजारapamonae Escevavënënë, sacerdotevi penamatacaitorobinë, ëpexi tsavanapae. Nexata bajarapamonae vënëtane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenë Jesús pevënëta, najai.

Nexata jane baja itsa tane dovathi peyajavaponaponaenë, bajarapamonae jumaitsi:

—Dovathi, pacaitavetatsi, ponë Pablo vajunupaebapona, petuxanenë Jesús pevënëta. Vecuapitsapare baja maponëje, jai Escevavënënë pexi dovathi peyajavaponaponaenëjavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë papamonaemë? jai dovathi.

¹⁶ Nexata bajarajota dovathi peyajavaponaponaenë, tsimaxëjirevarenatsi bajarapamonae.

Pinijisaëta dovathi peyajavaponaponaenë biatsi. Nexata amoneyabatsi. Pinijicuenia tsaquibabiatsi. Vejumatiticatsi penaxatabijavanëmi. Nexata bajaraponë pijabovecua bajarapamonae yarëcëpeca pebejavatsi. Jumasa nexata rëcëpeca. ¹⁷ Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyajavaponaponaenë exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamonae yaiyatane Jesús pevënë.

¹⁸ Nexata ayaibitsaëttoxaneto Dioso pejumecovënëtsivi, patapona Pablobanajavaberena. Nexata bajarapamonae daxitajivi pitabarata navecuapaebapona pibisiacue ne pexanabiabi-
java. ¹⁹ Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapae-
baxutonë. Pamatacabi bajarapamonae comuaca bajarapabaxutonë, ayaimatamota comuaca. Nexata daxita bajarapamonae bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapapalatanëanë bitso penamatamotsinëanë. ²⁰ Nexata bajarapacuenia Dioso pitorobilivaisi yacaëjëpapona baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacuajava, Acaya nacuajava ata, petaenajetarucaenexa Dioso

pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponae-najë icatsia Roma tomarabelia ata, jai Pablo.

²² Nexata Pablo itoroba Macedonia nacuayabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. ²⁴ Efeso tomarapijivi anaepana Pablo banajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata barëpitabiaba bajarapaboximatamo. ²⁵ Nexata Demetrio junata pebarënacuetuatsinexa daxita pebarënacuenebibivivi bajarapaboxi. Junatanua itsamonae ata, pamonaë pijinia jumapecataeya pexanaejavanë nacuenebabiaba. Nexata Demetrio jumaitsi bajarapamonaejavabelia:

—Paxamë rabaja payapëtaneme mapacueneye. Jumapecataeya vajaexanabiabivanë vajanajetabiabixae, ayaijava palata xainaponatsi.

²⁶ Pataneme rabaja. Pajumetanemenua baja

Pablo pejumaitsaponaejava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitsaponaejava. Nexata jivi ayaibitsaëtoxaneto mapatomarapijivije jumecovënëtaPona Pablo bajarapacuenia petsipaebaponaejava. Itsiata apo ëmapatomarapijivije. Daxita Asiavënë nacuapijivi ata jumecovënëtaPona.²⁷ Bajarapacuenia jivi ayaibitsaëto pejumecovënëtaPonaejava apo nacatoxanepanae. Tsipaji jivi apo nacacomuatsi tsipae Artemisavënë diosova pijacune vajanacuenebijava. Pinijijamatabëcuene pexainaediosova Artemisa pijatemplobo ata, apo yaiyatae tsipae. Baitsi padiosova daxita Asiavënë nacuapijivi, daxitanacuanëpijivi ata, pematatabacabëta tonubenabiaba pevajëcabiabinexa bajarapovajavabelia, vereverecaejitsipa. Nexata baja bajarapovajavabelia jivi apo vajëcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—¡Pinijijamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje

pinijiboxanetojavabelia, itsabelia baja cajena daxita tomarapijivi nacaetuatabiaba. ³⁰ Pablo picani jumaitsi Dioso pejumecovënëtsivijavabelia:
 —Xanë najonejitsianë mapaboyaliaje taneyanatsinëbeje tayajivicuaicuaijainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. ³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyaniavatsi.

³² Efeso tomarapijivi penacaetuatsijavata, nalivaisijëpaeya apo cuaicuaijai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaëtoخانeto apo yapëtae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënëjavabelia Alejandro peyapëtaenexa xua yabara jivi ayaibitsaëto nacaetuata. Tsipaji Alejandro ata judíonë. Nexata Alejandro pevëna judíovi pënatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinxexa Efeso tomarapijivi pianaepanaeyaniva daxita judíovijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapëtane Alejandro judíonëcuene, nexata daxita

vavajaiya jumai tsaponae anijahorabejecuenia mapacueniaje:

—¡Pinijijamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaxana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtane vajanacatocopatsijava va-jaevetsinexa mapatomarataje peecaëbo, pinijijamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane diosojumapeibotova, Artemisa, athëbëvetsica pejopaejava mapatomarataje. ³⁶ Nexata bajara-padiosojumapeibotova athëbëvetsica pejopaejava yabara, acuenebi itsajivi ata: “Jume,” pejaijava. Nexata pajamatejemamëre. Pëtsa abaxë itsacuene paexaname copiaya panajamatabëxainaenejevamë xaniavaetsia. ³⁷ Mapapebibeje paxamë pacapatameje, apo penacobetoxotsinëbeje templobopijjava. Pibisiacuenia apo baracuaicuaijaibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

³⁸ Icatsia tomara pevetsinë jumaitsi bajarapamonaejavabelia:

—Demetriobana itsa jamatabëneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa. ³⁹ Itsa apo paneconitsijitsiamë jivi, saya itsa panacaetuatame itsacuenelivaisiyo yabara, nexata saya roviafia papaebare xaniavaetsia daxitajivi penacaetuatsijavata,

pacuena gobierno nacaitoroba. ⁴⁰ Xaniajanë pacuena pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bjarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatsije, jai Efeso tomara pevetsinë penacaetuatsivijavabelia.

⁴¹ Itsa baja Efeso tomara pevetsinë najumevereta bjarapacuenia petsipaebijava, itoroba baja daxitajivi penaviabinexa pijabonëjavabelia.

20

Pacuenia Pablo najetaruca Macedonia nacuajava, Grecia nacuajava ata, yabara pelivaisi

¹ Itsa baja Efeso tomarapijivi jamatabëcaeva pianaepanaejava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia pijamatabëcuenesaë tsavana-paenexa Dioso pejumecovënëtsijava. Pablo

nexata pexaniacuenia napëjioba bjarapamona. Bjaraxuacujinae Pablo baja pona Macedonia nacuayabelia.

² Nexata Pablo itsa pata Macedonia nacuayabelia, pexanialivaisi tsipaebanajetaruca Macedonia nacuapijivi Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Bjaraxuacujinae

icatsia Pablo pata Grecia nacuayabelia.

³ Nexata Grecia nacuata Pablo ponapona acueyabi pajuametobeje. Bjaraxuacujinae

picani Pablo barcota naponaejitsia Siria nacuayabelia. Nexata Pablo nayajumetane Siria nacuata judíovi pevajënaeevetsijavatsi pebeyaxuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacuajava. ⁴ Pamonae Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Listra tomarapijinë. Tíquicobeje pijinia Trófimobeje, Asiavënë nacuapijinëbeje. Bajarapamonae Pablo yanatatsi. Nexata Pablo itsa barëpata Filipos tomarata, xanë Lucasnë, necaxitaraba. ⁵ Nexata daxita pamonae Pablo yanatatsi, namataxainaeya baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacuata pecaetomarata. Nexata pamonae namataxainaeya baja ponalia, paneevetavanapabeje Troas tomaratalia. ⁶ Nexata paxanëbeje Filipos tomarata barcota pananaropotajëbeje pepuavereverecae baja pafiestamatacabi judíovi baxane levadurata matajërëabinejeva pexanaepan. Panaponajëbeje jane baja Troas tomarabelia. Cinco matacabita panapaliajëbeje Troas tomarabelia. Nexata pamonae paneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

Pacuenia Pablo ponapona Troas tomarata

yabara pelivaisi

⁷ Troas tomarata domingomatacabi panacaetuatajē daxita Dioso pejumecovēnētsivi yajava, patanamatabēnapitsinexa xua yabara Cristo sivatēpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi.

⁸ Panacaetuatajē athēbēabetsia pēnēyatuucubibota. Nexata athēbēyo paira paenayajē, itsajotatsia pitayotsijavanē ayaijava rubena xaniavaetsia pitayotsinexa.

⁹ Nexata pevējēato ventanajavata eca, Euticovēnēnē. Pablo nexata bajayajebi livaisi tsipaeba. Nexata belia pevējēato bitso itamajitsipaneca. Nexata baja majiteca. Pemajitecaenē nexata pevējēato jopareca acueyabi pairabejejavavereca. Nexata pevējēato itsa sivarunarecatsi, petēpaenē baja pitatsi.

¹⁰ Nexata Pablo sivarunareca. Pematabacabēta ecaeya isapita petēpaenē. Nexata Pablo jumaitsi Dioso pejumecovēnētsivijavabelia:

—Pētsa panajamatabēxainame. Asaē rabaja icatsia pevējēato, jai Pablo.

Nexata pevējēato icatsia asaē. ¹¹ Nexata Pablo icatsia caevēa junaya. Pejunaecujinaetsia epatsēnēca jane baja pan. Tsicobetsana jane baja daxita Dioso pejumecovēnētsivi pexaenexa. Pexaecujinae abaxē icatsia Pablo bajayajebi cuaicuaijai. Pecuaicuaijainē belia yamatacabibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevējēato piasaēnē barēnaviabatsi pijaboyabelia. Barēya bitso bajarapamonae piasaēxae pevējēato petēpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanë Pablo paneitoroba barcota menia namataxainaeya patanaponaenexa Asón tomarabelia. Bajarapacuenia Pablo paneitoroba tsipaji Pablo matatsënëa najetarucaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. ¹⁴ Nexata jane baja Pablo itsa pata Asón tomarata, Pablo baja nanonorena barco ënëaberena. Nexata baja panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quiotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicujinae, caematacabicujinae, icatsia panapatajë jane baja Mileto tomarabelia. ¹⁶ Pablo rovia jamatabëxeneta Efesotomara, Asiavënë nacuata peecaetomara. Tsipaji apo jamatabëponaponae bajayajebi Asiavënë nacuata. Pablo bepijia jamatabëpata Jerusalén tomarabelia Pentecostésvënë fiestavajënaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

17 Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena. 18 Nexata baja ancianovi itsa parena Pablojavaberena, Pablo jumaitsi bajarapaancianovijavabelia:

—Paxamë baja cajena payapëtaneme mapacueneje. Asiavënë nacuata tapatsimat-acabijavaveliacujinae, Dioso pitorobilivaisi tsipaebaponaponajë Asiavënë nacuata. Daxitamatacabi tonacuenebajë Dioso pijacuene. 19 Dioso pijacuene itsa tonacuenebaponaponajë, apo jamatabëjumaitsinë: “Xanë bitso ayaijamatabëcuenenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinënu tsabiabi tsipaji judíovi jamatabënebexuababiaba. 20 Daxita Dioso pitorobilivaisi pacatsipaebabiabatsi papecajamatatabëcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. 21 Asaëya tsipaebabiabajë judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Bajaraxuacujinae jane baja pejumecovënëtsinexa vajatuxanënë Jesucristo pelivaisi. 22 Mara jotacujinaeje ponaenajë Jerusalén tomarabelia Espíritu Santo taneitorobixae bajarabelia taponanexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. 23 Itsiata caejavayo yapëtaniji. Caetomara canacujitsia

Dioso pitorobilivaisi tatsipaebanajetarucaejavata Espíritu Santo nejumai tsabiabi: “Caetsiana raja penaneconitsivi pejebabiabibota. Xamé bitso benejobicuene taename,” nejai tsabiabi Espíritu Santo. ²⁴ Itsiata baitsi jane cajena apo junavinë bajarapacuenene yabara. “Belia nebeyaxuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamëjava naponaponajë patacatsipaebinexa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa. ²⁶ Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. ²⁷ Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamonae Dioso pejumecovënëtsivi. Espíritu Santo raja pacaitoroba panetoevetsinexa vajatuxanenë

Jesús pijajivi, pamonaē comuata pijanata.
²⁹ Tajēvelia baja cajena yapētaniji tacovēya
 penajetarubenaējavanexa saicayacuenia
 Dioso pejumelivaisivecua petsipaebivi.
 Bajarapamonaē najetarubenaena jivi Dioso
 pejumecovēnētsijava pevereverecaeyaex-
 anaenexa. Pacuenia nevēthē pianaepanaevi
 verene oveja, bajara jamatabēcueneitsane
 bajarapamonaē pevereverecaeyaexanaenexa jivi
 Dioso pejumecovēnētsijavami. ³⁰ Paxamēyajuvēnēvi
 ata saicayacuenia Dioso pejumelivaisivecua
 tsipaebaponaena peyamaxēitojorobinexa Dioso
 pejumecovēnētsivi. Nexata Dioso pejume-
 covēnētsivi navecuanatsanaena pepēnaponaenexa
 bajarapamonaē. ³¹ Bajaraxuata xaniavaetsia
 paevetavanapare Dioso pejumecovēnētsivi.
 Panajamatabēnapire mapacuenije. Xanē
 baja cajena acueyabi pavaibeje, caematacabi
 canacujitsia, meravi yajava, caeto ata
 apo copatsinē patacamuxujiobijava bitso
 patacaasivaxae. Itsajavata tanuejavata
 ata pacamuxujiobabiabatsi, jai Pablo Efeso
 tomarapijiancianovijavabelia.

³² Icatsia Pablo jumaitsi bajarapamonaējav-
 abelia:

—Tajamonaē, nexata baja pacacopatatsi
 Dioso pecobeyabelia Dioso papecaevetsinexa.
 Dioso pejumelivaisi nacatsipaeba Dioso
 vajanacaasivajava. Nexata bajarapalivaisi
 pacajamatabēcuenyavenonaena. Bajara-
 palivaisi caējēpatsi papecajamatabēcuene
 asaēyaexanaenexa Diosojavabelia. Dioso
 pacacapanepaena pacuenia Dioso capanepaena

daxita pamonaē Dioso aneconijibia tane.
³³ Xanē itsa naponaponajē paxamējavata, apo najamatabēxainaenē tanaxainaeyabinexa itsanē pijapalata, penaxatabijava ata. ³⁴ Payapētaneme baja cajena mapacueneje. Tacobeta nacuenebajē tanamatavenonaejavaxi tacomuataponaenexa, tayajavaponaponaevi ata tatocomuatsinexa.
³⁵ Pacatsitanacueneitajētatsi baja cajena pacuenia paxamē ata bepanacuenebame. Bepayavenonamenua itsamonaē bitso bepejiobivi. Tsipaji baja cajena vajatuxanenē Jesús jumaitsi mapacueniaje: “Xanepana bitso itsamonaejavabelia vajarajutabiabijava vaxaitsi itsamonaē vajanacarajutabiabijava matatoxenetsia. Tsipaji bitso jamatabēcuenebarēyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematabacabēta barēnuca pebarēnavajētsinexa Diosojavabelia. ³⁷ Bajaraxuacujinae Pablo baja pona. Nexata ancianovi pēnueyabatsi. Nexata Pablo itsa napējioba ancianovi, yaitaxutonueya vaetabiaya itabaratsutsuneponatsi. ³⁸ Bitso ancianovi najamatabēxaina. Tsipaji Pablo jumaitsi:

—Apo panetaemē rabaja tsane matavējēa, jai.

Bajaraxuacujinae Pablo barcojavabelia peponaejavata, bajarapamonaē pēnaxuabaliatsi barcojavabelia.

Pacuenia Pablo pona Jerusalén tomarabelia yabara pelivaisi

¹ Itsa baja panapëjjobiveretajë ancianovi, panarunarecajë baja barco ënëabereca. Pananicabaliajë roviaia patapatsinexalia Cos tomarabelia. Bajaraxuacujinae, meravia pitsijavata, panapatajë abaxë epatua Rodas tomarata. Bajaraxuacujinae abaxë icatsia panapatajë Pátara tomarabelia. ² Nexata Pátara tomarata icatsia pacaxitajarabajë itsabarco. Bajarapabarco ponaejitsia Fenicia nacuyabelia. Nexata icatsia bajarapabarcota patanaponaenexa, panarunarecajë bajarapamo ënëabereca. Panaponajë jane baja. ³ Nexata barcota patanajetarubenaevavata, pataeyetajë patatsavenonenia Chipretunaeto. Paxenetanajetarubenaevavata rovia. Paponajë Siria nacuyabelia. Nexata baja papatajë Siria nacuyabelia Tiro tomarata. Nexata Tiro tomarata juteta barcoënëta pecaponaevava. ⁴ Nexata Tiro tomarata pacaxitajarabajë Dioso pejumecovënëtsivi. Bajarapamonaejavata pajinavanapajë siete pamatacabibeje. Bajarapamonae tajëvelia Espiritu Santo pejamatabëcueneta yapëtaeyaexanatsi Pablo pebejiobiaexanaevavanexatsi Jerusalén tomarata. Nexata bajarapamonae jumaitsi Pablojavabelia:

—Pëtsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajë. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa

pataponaejava. Nexata mene itapatalia, tajetabota, daxita bajarapamonae yajava, panubenajë patamatabacabëta patavajëtsinexa Diosojavabelia. ⁶ Bajaraxuacujinae panapëjiobajë baja daxita Dioso pejumecovënëtsivi. Icatsia baja panarunarecajë barco ënëaberena. Bajarapamonae baja naviabalia pijabonëjavabelia.

⁷ Tiro tomarata patananaropobicujinae, panapatajë Tolemaida tomarabelia. Bajarapatomarata pabajacobajë Dioso pejumecovënëtsivi. Bajarapamonaejavata panajinavanapajë caematacabi. ⁸ Meravia icatsia pitsijavata pananaropobajë. Panapatajë icatsia Cesarea tomarabelia. Cesarea tomarata patapatsicujinae, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diáconoviyajuvënënë. Bajaraponë pijabota panajinavanapajë. ⁹ Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espíritu Santo pejamatabëcueneta yapëtaeyaexanatsi. ¹⁰ Itsa baja paxainajë anijamatacabianë Felipe pijabota patanapatsicujinae, Judea nacuaverena pata Diosojumepaebinë profeta, Agabovënënë.

¹¹ Bajaraponë pata paxanëjavaberena Felipe pijabota. Nexata Agabo Pablo pijacorreabocoto veepajonotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espíritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia

cëtsianatsi mapacorreabocoto pexainaenëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espíritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaeyaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainaeya exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaejava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaenexatsi, beexanaenatsi baja, pajanë.

¹⁵ Caematacabibejecujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia. ¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënënë.

Pacuenia Pablo Jerusalén tomarata Santiago barëcuaiquaijai yabara pelivaisi

17 Itsa papatajē Jerusalén tomarabelia, Dioso pejumecovēnētsivi panecopiapita jamatabēcuenebarēyaya. 18 Nexata meravia pitsijavata Pablo panebarēsivaxaina Santiagojavabelia. Nexata Santiago pijabota naena ancianovi. 19 Nexata Pablo bajarapamonae bajacoba. Pe-bajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. 20 Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabēcuenebarēya. Nexata daxita bajarapamonae pejumetaexae bajarapacuene, pexaniajamatabēcuene rajuta Diosojavabelia. Nexata Santiagobana jumaitsi Pablojavabelia:

—Patajabanānē, yapētaneme baja cajena mapacueneje. Judíovi bitso ayaibitsaētoxaneto, miles pajivibeje Dioso pejumecovēnētsivi. Yapētanemenua baja mapacueneje. Daxita bajarapajudíovi jumecovēnētsi ata Jesús pelivaisi, itsiata abaxē tsiteca jumecovēnētavanapa Dioso Moiséspijinēta penajumecopatsilivaisi. 21 Pajudíovi apo jumecovēnētsi Jesús pelivaisi, xamē netsipaebaponaelivaisi cayabarana-jumetsēnētabiaba. Nexata bajarapajudíovi najumetsēnētsiaya jumai tsabiabi Jesús pelivaisi pejumecovēnētsijudíovijavabelia: “Itsa raja Pablo livaisi tsipaebapona judíovijava, itsanacuanējava pejinavanapaevi, Pablo itavetabiaba judíovi pecopatsinexa Dioso Moiséspijinēta penajumecopatsilivaisi pejumecovēnētsijavami. Itavetabiabanua bajarapamonae pecopabinexa

peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

²² Icatsia Santiagobana jumaitsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovënëtsivi, cavënëlivaisitane nepatsijava, nacaetuatsiana penabarëcuaicuaijainexa xamë yabara. ²³ Nexata daxitajivi pecayapëtaenexa nejumecovënëtsijava Dioso Moiséspijinëta penajumecopatsilivaisi, exanaename pacuenia pacaitorobijitsiatsi. Majotaje cuatro ponëbeje paxanëyajuvënëvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia.

²⁴ Nexata naponaname bajarapamonaeta temploboyabelia. Nexata templobota nanajamatabëcuenexaniavaetsianame nija-matabëcuenesaënexa Diosojavabelia. Pacuenia bajarapamonae najamatabëcuenexaniavaetsijitsia pijamatabëcuenesaënexa Diosojavabelia, bajara-pacuenia nanajamatabëcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponëjavabelia notsiana, bajaraxua xamë daxita cobecovëmatamotsianame. Bajaraxuacujinae bajarapamonae daxitamatanami maticasi-bianatsi. Bajarapacuenia itsa exanaename, daxita judíovi cayapëtaena nejumecovënëtsijava

Dioso Moiséspijinëta penajumecopatsilivaisi. Nexata daxita judíovi yapëtaena najumetsënëtsiaya pecabaracuaicuaijai tsabiabijava pajudíovi apo jumecovënëtsi Jesús pelivaisi. ²⁵ Pamonae apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonae apo judíovi ata, Dioso pejumecovënëtsivi, pataitavetsinexa, caelivaisiyobeje patoyaquinajë cuyalatota. Itsa patoyaquinajë, pajumaitsinë mapacueniaje: “Pecobeta saya pexanaenëanëjavabelia pevi perajutsinexa ofrendacuenia itsa tobia baca oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetasacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia,” pjanë itsa patoyaquinajë apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponëbeje pepëta pacuenia Santiagobana itorobatsi. Pablo nexata

najamatabëcuenexaniavaetapona piaja-
 matabëcuenesaënexa Diosojavabelia cuatro
 ponëbeje yajava. Bajaraxuacujinae Pablo
 temploboyalia joneya sacerdotevijavabelia,
 petsipaebinexa pamatacabi copiarucaejitsia
 Pablobana penajamatabëcuene xaniavaetsijava
 Diosojavabelia. Bajarapamatacabi cuatro
 ponëbeje Diosojavabelia ofrenda perajutsija-
 vanënexa templobota notsijitsia. Nexata picani
 daxita bajaraxua Pablo cobecovëmatamotsijitsia
 bajaraxua pecanajetsivijavabelia.

²⁷ Nexata siete pamatacabibejecujinae, pamat-
 acabi jane baja Pablo, cuatro ponëbeje yajava,
 Diosojavabelia ofrenda rajutsijitsia, Pablo tem-
 plobota tanetsi judíovi, Asiavënë nacuaverena
 pepatsivi. Nexata bajarapajudíovi itoroba daxita
 Jerusalén tomarapijivi pianaepanaenexa Pablo-
 javabelia. Nexata Jerusalén tomarapijivi, Asi-
 avënë nacuaverena pepatsivi yajava, nacobe-
 navaetabatsi Pablo. ²⁸ Nexata bajarapamonae
 vavajai pinijijumeta. Najumetsënëtsiaya jumaitsi:

—¡Tajamonae judíovi, naxanitsia!
 ¡Paneyavenonare! Maponëje daxitanacuanëjava
 livaisi tsipaebanajetaruca daxitanacuanëpijivi
 vajanacaitoyanexa vaxaitsi manacuapijivitsije.
 Itavetaponanua Dioso Moiséspijinëta pena-
 jumecopatsilivaisi jivi pejumecovënëtsiyaniva.
 Itavetaponanua mapatemplobo ataje jivi
 peyaiyataeyaniva. Apo judíovi ata Pablo
 barëjoneyabiaba matemploboyarenaje. Nexata
 baja Dioso tsitaabejetsi mapatemploboje, Dioso
 pijatemplobo. Nexata baja Pablo naneconita

Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarëponaponaejava Jerusalén tomarata apo judíonë, Trófimovënë, Efeso tomarapijinë. Nexata jamatabëcuenenavëxaniabiaya bajarapamonae jamatabëjumaitsi:

—Pablo raeta apo judíonë barëjunua mapatem-ploboyarenaje, jamatabëjai Trófimo yabara.

Pablo cajena Trófimo apo barëjone temploboy-alia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae kujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboënëvecua. Nexata templobobaupaxanetonë bepíjia vecuabau-paxatabatsi. ³¹ Bajarapamonae picani Pablo jamatabëbeyaxuabatsi. Nexata bajarapaepatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa.

³² Nexata comandante bepíjia barëlia pijajivi vajabitsaëvi, vajabitsaëvi pijacapítánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaëvi pebarëpatsijava, nexata judíovi copaba pebejavatsi Pablo. ³³ Nexata comandante Pablo kujirenatsi. Vaetabiaexanatsi pijajivi. Comandante itoroba pijajivi Pablo pecëtsinexatsi

anijacadenamaëtotabeje. Bajaraxuacujinae
yanijoba judíovijavabelia.

—¿Detsa maponëje? ¿Detsa xua exana maponëje?
jai comandante.

³⁴ Nexata bajarapajivi bitsaëtoxonetonëyajuvënëvi
comandantejavabelia najuatsipaebanubena
pinijijumeta. Nexata comandante apo
jumetae xaniavaetsia bitso jivi pevavajaixae.
Nexata comandante itoroba vajabitsaë Pablo
pecaponaenexatsi vajabitsaë pijaboyabelia.

³⁵ Pablo capatatsi vajabitsaë pijaboitapata.
Vajabitsaë pijabo pepënëvelia xaina beescalerc-
acuenia pexanaejava. Nexata bajarajota
Pablo vajabitsaë nacobenayotsiaya cajunayatsi
vajabitsaë pijaboyalia pecajonenexatsi. Tsipaji
icatsia bajarajota Pablo jivi bejitsiatsi bitso
pianaepanaexae. ³⁶ Jivibitsaëtoxonetonë Pablo
barabocabuataponatsi. Vavajai tsabuataponae
bajarapamonae.

—¡Pabeyaxuare! jai tsabuataponae Pablo yabara.

*Pacuenia Pablo navajunupaeba jivibit-
saëtoxonetonëjavabelia yabara pelivaisi*

³⁷ Itsa baja Pablo vajabitsaëvi pijaboyalia ca-
jonejitsiatsi, nexata Pablo griegojumeta jumaitsi
comandantejavabelia:

—Netocopare tacatsipaebinexa caejumeyo, jai
Pablo.

Nexata comandante jumaitsi:

—¿Xamë tsaja natsipaebame griegojume?

³⁸ ¿Xamë tsaja apo Egipto nacuapijinëmë? ¿Xamë
tsaja imata jivi apo itorobimë pianaepanaenexa
gobiernojavabelia? ¿Xamë tsaja imata

penamaxëvanitsivi cuatro mil ponëmaxëto apo barënajetabajiravimë petusato nacuayabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pex-aniacuene netoexanare. Netocopare livaisi tatsipaebinexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

22

¹ —Tajamonae, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³ —Xanë raja judíonënë. Naexanajë Tarso tomarata, Cilicia nacuata peetaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejitsipacuena tonacuenebianajë,” jamatabëjanë tsabiabi.

Bajarapacuenia aeconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaitsi:

—Xanë abaxë picani bajayata barajinabiabajë pamonaë jumecovënëta pexanialivaisi, Jesucristo pelivaisi. Pamonaë jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamonaë penaneconitsivi pejebabiabibota. Jitsipajë picani pebeyejebinexatsi daxita bajarapamonaë.

⁵ Sacerdotevi pepo penamatacaitorobinë, daxita judíovitsi vajaanianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamon-aejavabelia vajëtajë tanetsicobeyaquinaenexa cuyalato tatocaponaenexa pamonaë judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, tacapatsinexa picani maberenjaje Jerusalén tomaraberena penaneconitsiaexanaenexatsi, jai tsanucæ Pablo judíovijavabelia.

Pacuenia Pablo navajunupaeba pacuenia tax-uxuaba Jesús pelivaisi pejumecovënëtsijava yabara pelivaisi

(Hch 9.1-19; 26.12-18)

⁶ Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatorotsia naitayota athëbëvetsica. ⁷ Nexata bajarajota irataeya bocajunuajë irata. Jumetaenucajë athëbëvetsica tanejumaitsijava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaijjava. ⁸ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapijinënë. Xanë raja tajajivi netobejiobiaexanaponame,” nejai. ⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaicuajjai athëbëvetsica. ¹⁰ Nexata xanë jumaitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. ¹¹ Nexata bajarapacotia tataecujinae bitso nitaxutomeraviba. Apo necajëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaitsi judíovijavabelia:

—Bajarajota Damasco tomarata ponapona Ananíasvënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai

tsabiabi. ¹³ Nexata bajaraponë Ananías xanëjavaberena patajopa tanetaenexa. Nexata nejumai tsanuca: “Tajabananë Saulo, icatsia rabaja itaxutoxanepaname,” nejai. Bajarapacuenia tanejumaitsijavata icatsia baja itaxutoxanepanjë. Nexata baja taniji Ananías. ¹⁴ Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanea netaenexa Dioso pitabarata Jesús pepo planeconijibinë. Caitapetanea nejumetaenexa Jesús pecatsipaebilivaisi. ¹⁵ Nexata ponaename daxitanacuanëpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcuenecopatsixae, daxita pibisiacue ne xanaeneconimi cavecuaajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi

¹⁷ Pablo icatsia jumaitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota

pepo petuxanenë Jesús. ¹⁸ Nexata Jesús nejumlahtsi: “Naxanitsiayo bepíjia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. ¹⁹ Nexata xanë jumlahsinë: “Tajatuxanenë, bajarapamonae judíovi xaniavaetsia baja cajena neyapëtane. Bajarapamonae neyapëtane judíovi penacaetuatabibonëjava tataicaponaejava daxita pamonaе cajumecovënëta taconibabeyabi-abinexa naebota. ²⁰ Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaе Estebanpijinë beyaxuabatsi, penajumajonejebijavanë toevetanucajë,” janë pepo petuxanenë Jesúsjavabelia. ²¹ Nexata pepo petuxanenë nejumlahtsi: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

Pacuenia Pablo exanatsi vajabitsaë pepo pevetsinë comandante yabara pelivaisi

²² Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae pinijijumeta. Jumai tsaponae:

—¡Maponëje pabeyaxuare! ¡Mara pitsinë apo becopatsitsi peponaponaenexa matavëjëaje! jai tsaponae judíovi Pablo yabara.

23 Bajarapamonae pinijjumeta vavajai tsaponae. Pijacamisajumavelia penaxatabijavanë, vebabia bitso pianaepanaexae. Atsabenonë cayajabajarabarena Pablojavaberena pebaraanaepanaexaetsi. 24 Nexata vajabitsaë pepo pevetsinë, comandante, pijajivi itoroba Pablo pecajonenexatsi vajabitsaë pijaboyalialia. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajarapacuenialia picani Pablo exanaejitsiatsi Pablo petsipaebinexa vajabitsaëjavabelialia xua yabara judíovi neconitsiayalialia pinijicuenialialia vavajai tsaponae Pablo yabara. 25 Nexata jane baja Pablo itsa cëtetatsi vajabitsaë picani pejumatitibabenexatsi, nexata Pablo jumaitsi bajarajotalia penucaenë vajabitsaë pijacapitánjavabelialia:

—Xanë raja Romano nacuapijinënë. Nexata itsa panejumaconibabejitsipame abaxë copialialia neneconitsinejevalialia juezmonae pitabaratalia, nexata panevemaxënaneconitsipame. Tsipajialialia nijatuxanenënë, Romanonacualialia pepo pevetsinë, pacaitavetalialia bajarapacuenialialia paneexanaeyanivalialia, jai Pablo vajabitsaë pijacapitánjavabelialialia.

26 Capitán itsa jumetane bajarapacuenialialia Pablo pejumaitisijavalialia, nexata capitán lia vajabitsaë pepo pevetsinë comandantejavabelialialia. Capitán jumaitsi comandantejavabelialialialia:

—Xanialialia baja tsane pacuene exanaejitsiamë Pablojavabelialialialia. ¡Maponëje Pablo Romano nacuapijinënë baja cajenalia! jai capitán comandantejavabelialialialialia.

27 Nexata comandante rena Pablojavaberena. Jumaitsi Pablojavabelia:

—¿Xaniajai tsabaja? ¿Xamë Romano nacuapijinëmë? jai comandante.

—Jãjã, jai Pablo.

28 Nexata comandante jumaitsi Pablojavabelia:

—Xanë ata baja maparucæje Romano nacuapijinënë naexanjë. Tsipaji baja matamotajë ayaimatamota bepepo Romano nacuapijinënë tanaexanaenexa, jai comandante.

Bajarapacuenia jumaitsi tsipaji comandante saicayanacuata penaexanaenë.

Pablo nexata jumaitsi comandantejavabelia:

—Xanë apo matamotsinë. Tsipaji baja cajena pepo Romano nacuapijinënë. Naexanjë cajena Romano nacuata, jai Pablo comandantejavabelia.

29 Nexata picani pavajabitsaë Pablo jumaconibabejitsiatsi, vecuaponatsi baja. Vajabitsaëvi pepo pevetsinë ata, comandante, Pablo cujunavatsi itsa yapëtanetsi Pablo Romano nacuapijinëcuene. Cujunavatsi pecëtsiaexanaexaetsi cadenamaëtonëta.

Pacuenia Pablo navajunupaeba daxita judíovi pevetsivi pitabarata yabara pelivaisi

30 Pablo penavajunupaebicujinae Romano nacuapijinëcuene, meravia pitsijavata, vajabitsaë pepo pevetsinë, comandante, jamatabëyapëtane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaëto. Nexata comandante junata sacerdotevi penamatacaitorobivi, judíovi

pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naëcota daxita penacaetuatsivi. Nexata Pablo jumaitsi bajarapamonaejavabelia:

—Tajamona, xaniavaetsia cajena ponapon-abiabajë najamatabëcuenebijianaenejevanë Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinë, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinë.

³ Nexata Pablo jumaitsi Ananíasjavabelia:

—¡Dioso rajane juya pepacue xamë catsaquibiaxuabiana! Xamë majotaje ecame taneneconitsinexamë. Tsipaji xamë xanë yabara jamatabëcuenenavëxaniabiaya jamatabëjumaitsimë: “Maponëje Pablo naneconita Diosojavabelia,” jamatabëjamë. Nexata xamë nijacuata naneconitame nijagobiernojavabelia. Tsipaji itorobame mapamonaeye tanetsaquibiaxuabinexa taaneconijibinë, jai Pablo Ananíasjavabelia.

⁴ Bajarajota penubenaevi jumaitsi Pablojavabelia:

—Xamë raja jumeitavetame Dioso pijajivitonë, sacerdotevi pepo penamatacaitorobinë, jai bajarapamonaejavabelia Ananías yabara.

⁵ Nexata Pablo jumaitsi:

—Tajamonae, xanë apo yapëtaenë Ananías sacerdotevi pepo penamatacaitorobinëcuene. Itsa yapëtaejitsipajë, apo jumaitsinë tsipae bajarapacuenia. Tsipaji Dioso pejumelivaisibaxutota jumaitsi mapacueniaje: “Pëtsa jumeitavetame pecaevetsinë,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabëcueneyapëtane penacaetuatsivi. Tsipaji penacaetuatsivi caelivaisi apo xainae. Jamatabëcueneyapëtaneme itsamonae pecatsitecaejava saduceovi pecujarubicuene. Jamatabëcueneyapëtane itsamonae pijinia pecatsitecaejava fariseovi pecujarubicuene. Nexata Pablo pinijjumeta jumaitsi:

—Tajamonae, xanë raja fariseonënë. Fariseovi pecujarubicuene jumecovënëtajë. Taxapijinë baja cajena fariseonë. Tamojivimi ata cajena fariseovi. Majotaje neneconitsijitsia. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë, jai Pablo.

⁷ Bajarapamonae itsa jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabëcuenejëpae baja. Nexata anaeya bajarajota navecuanatsana baja. ⁸ Saduceovi jumeaebabiaba fariseovi pejumecovënëtsilivaisi. Nexata saduceovi jumai tsabiabi:

—Jivi petëpaecujinae, acuenebi icatsia Dioso piasaëyaexanaejava. Ajibi raja cajena ángelevi. Ajibi raja cajena petëpaevi ata pejumape, jai tsabiabi saduceovi.

Fariseovi jumecovënëta jivi petëpaecujinae Dioso icatsia piasaëyaexanaejavanexa. Jumecovënëtanua ángelevi ata pejinavanapaejava. Jumecovënëtanua petëpaevi ata pejumape pejinavanapaejava. ⁹ Apo penajamatabëcuenejëpaexae, daxita bajarapamonae bajarajota pinijijumeta vavajai tsaponae. Nexata pamonaе judíovi pecujarubivi, fariseoviyajuvënëvi, nonobapuna. Anaeya jumaitsi saduceovijavabelia:

—Itsacuene ata cajena pibisiacuene apo exanae maponë Pabloje. Xaniajai meta cajena. Petëpaejivi pejumape tsipaebatsi. Itsa jume, ángel meta tsipaebatsi. Paxanë nexata itsacuene ata apo paexanaenë tsane Pablojavabelia Diosojavabelia patananecotsiyanima, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajabitsaë pepo pevetsinë, comandante, belia jamatabëjumaitsi: “Pablo meta baja bajarapamonae beyaxuabianatsi,” jamatabëjai. Nexata comandante junata pijajivi peponaenexa. Pablo baja jutatsi bajarapamonaevacqua. Comandante itoroba pijajivi Pablo pecaponaenexatsi vajabitsaë pijaboyabelia.

¹¹ Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi majotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabëbeyaxuabatsi yabara pelivaisi

¹² Pablo petsitanaitajëtsicujinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apae-natsi, najai bajarapamonae.

¹³ Pamonae picani Pablo jamatabëbeyaxuabatsi, cuarenta ponëbeje pematatsënëa.

¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenä. Nexata pamonae cuarenta ponëbeje, pamonae picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanë. ¹⁵ Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaicuaijainexa. Nexata daxita paxamë patonajumeitorobianame cuyalatota vajabitsaë pepo pevetsinë, comandantejavabelia. Pavajëtsianame comandantejavabelia

papecatocarenanexa Pablo. Pajumaitsimē tsane yamaxēitorobiaya comandantejavabelia: “Pajitsipajē icatsia matavējēa patayanijobijava Pablo, pijaneconi patayapētaenexa xaniavaetsia, paneconi xaina,” pajamē tsane. Nexata paxanē epatotalia pavajēnaeevetsianajē Pablo. Itsa rena, patabeyaxuabinexa patsinejeva maberenaje, jai pamonae cuarenta ponēbeje, pamonae picani Pablo jamatabēbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata baitsi jane Pablo pematapijiva pexēnato jumetane Pablo pevajēnaeevetsiapaebijavatsi pebeyaxuabinexatsi picani. Nexata bajaraponē pona vajabitsaē pijaboyabelia. Itsa baja bajaraponē joneya vajabitsaē pijaboyalia, bajarapalivaisi tsipaeba Pablojavabelia. ¹⁷ Nexata bajaraxuacujinae Pablo junata caenē vajabitsaē pijacapitán. Pablo jumaitsi:

—Barēponare mapapevējēatoje papecanamatacaitorobinē, comandantejavabelia. Itsalivaisiyo xaina petsipaebinexa, jai Pablo.

¹⁸ Nexata Pablo piopaxa capitán barēponatsi vajabitsaē pepo pevetsinē, comandantejavabelia. Nexata capitán jumaitsi comandantejavabelia:

—Naneconitsia raja peponaponaenē Pablo nejunata. Nexata nitoroba tabarēponaenexa mapapevējēatoje xamējavaberena. Tsipaji pina catsipaebijitsia itsalivaisiyo, jai capitán comandantejavabelia.

19 Nexata comandante cobepitatsi pevejëato. Barëliatsi pesaicaeyojavabelia. Comandante nexata jumaitsi pevejëatojavabelia:

—¿Detsa pitsilivaisi xainame tanetsipaebinexamë? jai.

20 Nexata pevejëato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaejavabelia. Bajarapamonae cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonae.

21 Itsiata pëtsa jumecovënëtame bajarapamonae. Tsipaji cuarenta ponëbeje pematatsënëa namatayabiaya epatota Pablo vajënaeevetsiapaebatsi pebeyaxuabinexatsi. Bajarapamonae daxita najumecapanepaeya najumaitsi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonae. Aeconoxae saya bajarapamonae eveta Pablo necaliajava, jai pevejëato comandantejavabelia.

22 Nexata comandante jumaitsi pevejëatojavabelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinae pevejëato baja itorobatsi caevëalia.

Pacuenia Pablo itorobatsi nacuaevetsinë Félixjavabelia yabara pelivaisi

²³ Vajabitsaë pepo pevetsinë, comandante, junata anijanëbeje, vajabitsaë pijacapitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejava. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavabelia, jaí comandante capitánbejjavabelia.

²⁵ Bajaraxuacujinae comandante tsi-cobeyaquina cuyalatobaxuto pitorobinexa nacuaeavetsinë Félixjavabelia. Comandante peyaquinaecuyalatobaxutota jumaitsi mapacueniaje:

²⁶ “Félix, pecayiyataenë, nacua nevetsinë. Xanë raja Claudio Lisiasvënënenë catoyaquinatsi. Cabajacobatsi. ²⁷ Judíovi raja vaetabatsi ponë catoitorobaliatsi, Pablovënënenë. Beyaxuabijitsiatsi picani. Nexata itsa vënëlivaisitaniji Pablo Romano nacuapijinëcuene, sivalianë. Tajajivi vajabitsaë taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanajë tajajivi vajabitsaë pijaboyabelia. ²⁸ Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajë. Bajarapacuenia

nutsiaexanajë bajarapamonae pitabarata tayapëtaenexa jane baja picani paneconi yabara Pablo judíovi neconitsijitsiatsi. ²⁹ Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara. ³⁰ Nexata itsajivi netsipaeba judíovi namutoepatota Pablo pevajënaeevetsiapaebijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinë Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyaberena. Pamonaе caballojumata peponaevi, pevajënaeyabelia abaxë caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponaecuyalatobaxuto nacuaevetsinë Félixjavabelia. Yajavarajutanua Pablo bajaraponë pecobeyabelia. ³⁴ Nexata nacuaevetsinë Félix leba baja petocapatsicuyalatobaxutotsi. Bajaraxuacujinae nacuaevetsinë Félix jumaitsi

Pablojavabelia:

—¿Detsa panacuapijinēmē? jai.

Nexata Pablo jumaitsi:

—Xanē raja Cilicia nacuapijinēnē, jai.

Nexata yapētanetsi Pablo Cilicia nacuapijinēcuene. ³⁵ Nexata icatsia nacuaevetsinē Félix jumaitsi Pablojavabelia:

—Cajumetaenatsi abaxē itsa parena judíovi pecaneconitsivinexa, jai nacuaevetsinē Félix.

Bajaraxuacujinae nacuaevetsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinē pexanaeyaexanaebota.

24

Pacuenia Pablo navajunupaeba nacuaevetsinē Félix pitabarata yabara pelivaisi

¹ Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinē, parena Cesarea tomaraberena. Parena judíovi pijaancianovi yajava, Tértulovēnēnē yajava. Tértulo abogadonē, jivi peneconitsicuepeyapētaenē. Bajaraxuata judíovi junata bajaraponē petocuaicuajainexatsi nacuaevetsinē Félixjavabelia. Nexata judíovi, Tértulo yajava, nubena nacuaevetsinē Félix pitabarata peneconitsinexatsi jane baja Pablo.

² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinē Félixjavabelia mapacueniaje:

—Pecayaiyataenē nacua nevetsinē.
Xaniavaetsia nevetsixae mapanacuaje,

bajayajebi xaniavaetsia pajinavanapajë. Xamë nejamatabëcueneta daxita mapanacuapijicuene, xua abeje picani, xanebiaexanaponame pevajënaeyabelia. ³ Nexata pabarëyanë patanetoexanaejavamë yabara daxita mapanacuajavaje. Bajaraxuata pexaniajamatabëcuene pacarajutatsi. ⁴ Caepatoyo saya pacajamatabëitonotatsi. Pexaniacuene panetoexanare. Panenamuxunaevere caejumeyobeje. ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pianaepanaenexa judíovi penavecuansanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. ⁶ Mara ponëje Dioso pijatemplobo Jerusalén tomaratalia jamatabëbijiana picani. Tsipaji apo judíovi barëjoneya temploboënëalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. ⁷ Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaeavetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaeavetsinë Félixjavabelia. ⁹ Judíovi bajarajota Tértulo pemuxuneneta

penubenaevi ata neconitatsi Pablo. Bajarapajudíovi jumaitsi nacuaevetsinē Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judíovi nacuaevetsinējavabelia.

¹⁰ Nacuaevetsinē Félix nacobeyota juya Pablo pitorobinexatsi Pablo jane baja penavajunupaebinxena nacuaevetsinē Félix pitabarata. Nexata Pablo jumaitsi nacuaevetsinē Félixjavabelia:

—Yapētaniji baja cajena xamē bajayajebi mapanacuapijivi nenaneconitsiaexanabiabijava. Bajaraxuata barëyanē tacatsipaebinxena xua exanajë. ¹¹ Nexata taxaniajaijumeta catsipaebianatsi. Itsa yanijobijitsipame

itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota. ¹² Bajarapatemplobota

judíovi apo netae tabarëcuaicuaijajjava itsajivi ata. Apo netaenua judíovi penacaetuatabiabibonëjava jivi taitorobijava pianaepanaenexa. Apo netaenua tomaranëjava ata taitorobijava jivi pianaepanaenexa. ¹³ Nexata acuenebi

itsajivi ata pejumaitsijava xanë yabara: “Xanë raja pepacuenene taniji xua Pablo exana,” pejajava. Tsipaji itsajivi ata apo netae pibisiacuene taexanaejava.

¹⁴ Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneta Dioso

jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaaponaponajë. Bajayata Diosojumepaebivi profetavi peyaquinaelivaisianë ata jumecovënëtajë. ¹⁵ Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonae tëpa, pexaniajamatabëcuenevimi, pibisiajamatabëcuenevimi ata, itsamatacabi icatsia Dioso asaëyaexanaena. ¹⁶ Bajaraxuata bitso jitsipajë xaniavaetsia taponaponaejava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxisajivi ata pitabarata, jai Pablo nacuaevetsinë Félixjavabelia.

¹⁷ Icatsia Pablo jumaitsi nacuaevetsinë Félixjavabelia:

—Caevaimaxëto baja cajena ajibinë tsarucæ Jerusalén tomaravecua Dioso pitorobilivaisi jivi tatsipaebinxæ daxisitanacuanëjava. Bajaraxuacujinae icatsia naviatajë Jerusalén tomarabelia. Tocaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. ¹⁸ Itsa baja veretajë templobota tanajamatabëcuenevaniavaetsijava Diosojavabelia tajamatabëcuensaënexa, tara-

jutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yãijai. Templobopijivi ajumejibia jinavanapa. ¹⁹ Bajara baitsi jane pamonae judíovi, Asiavënë nacuapijivi, tanetaevi templobota, bepatsirena maberenaje taneneconitsinexa jane baja itsa necuenetane pibisiacuene taexanaejava. ²⁰ Itsa jume, nexata mapamonaeye, nitabarata penubenaevi, vecae taitabëta catsipaebi, itsa netane pibisiacuene taexanaejava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ²¹ Saya meta caelivaisiyo bajarapamonaeye catsipaebiana xanë talivaisi. Tsipaji pamatacabi nucajë judíovi pijaancianovi pitabarata, ayaijumeta jumaitsinë: “Mapamatacabitaje neneconitsiana. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitsiyava yabara bajarapamonaeye jamatabëneneconita xamëjavabelia, jai Pablo nacuaevetsinë Félixjavabelia.

²² Nacuaevetsinë Félix xaniavaetsia yapëtane daxitanacuanëjyava jivi pejumecovënëtaaponaejyava Jesucristo pelivaisi. Nexata nacuaevetsinë Félix pejumetaecujinae Pablo petsipaebilivaisi, nacuaevetsinë Félix naviabiaexana baja pamonaeye picani Pablo neconitsijitsiatsi. Nexata

nacuaevevtsinē Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaē pepo pevetsinē, comandante Lisias, yapētaenajē pacuenia exanaejitsianē Pablojavabelia, jai.

²³ Nexata nacuaevevtsinē Félix jumaitsi vajabitsaē pijacapitánjavabelia:

—Pablo barēevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacētsinejevamē. Tocopatsianamenua peyapētaevitsi pesivaxainaenexatsi perajutsinexatsinua penamatavenonaejavaxi, jai nacuaevevtsinē Félix vajabitsaē pijacapitánjavabelia.

²⁴ Bajaraxuacujinae, caematacabibejecujinae, nacuaevevtsinē Félix icatsia pata pijava yajava, Drusilavēnēva. Drusila judíova. Nexata nacuaevevtsinē Félix itoroba pijajivitonē petojunatsinexatsi Pablo. Nexata Pablo itsa pata, Pablo livaisi tsipaeba nacuaevevtsinē Félixjavabelia. Pablo tsipaeba jivi penajamatabēcuenecopabaponaejava Jesucristojavabelia. ²⁵ Pablo tsipaebanua Dioso pitorobijava jivi pejinavanapaenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevevtsinē Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevevtsinē Félix jumaitsi Pablojavabelia:

—Pitsapare baja abaxë. Icatsia cajunatsianatsi itsajota cuenesajinajë, jai nacuaeavetsinë Félix.

²⁶ Nacuaeavetsinë Félix jamatabëjumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabëjai.

Bajaraxuata Félix anijatonë pijajivi itorobabiaba Pablo petojunatsinexatsi pebarëcuaicuaijainexatsi.

²⁷ Anijavaibeje bajarapacuenia Félix pijajivi itorobabiaba Pablo petojunatabiabinexatsi. Belia baja Félix vecuapitsapa nacua pevetsicuene. Nexata juya itsanë, Porcio Festovënënë, tocopatatsi bajarapanacua pevetsinexa. Félix baja pitsapae ata, itsiata Félix pejamatabëcueneta Pablo apo tocopatsitsi pepitsapaenexa penaneconitsijavavecua. Bajarapacuenia Félix exana judíovi pesivajamatabëcuene barëyanexatsi.

25

*Pacuenia Pablo navajunupaeba pe-
jananacuaeavetsinë Festo pitabarata yabara
pelivaisi*

¹ Festo patajopa Cesarea tomarata pexanaenexatsi nacuaeavetsinënexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia.

² Nexata Jerusalén tomaratalia sacerdotevi penamatacaitorobivi Pablo neconitatsi pepëya nacuaeavetsinë Festojavabelia. Neconitatsinua judíovi ata, pamonae petuxanevi.

³ Bajarapamonae

pinijicuenia vajëta nacuaevetsinë Festojavabelia petocapatsinexatsirena Pablo Jerusalén tomaraberena. Bajarapacuenia vajëta tsipaji baja cajena bajarapamonae najamatabëcuenevereta picani Pablo pebeyaxuabiaexanaenexatsi namutoepatota. ⁴ Nexata nacuaevetsinë Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanë raja caematacabibejecujinae ponaejitsianë Cesarea tomarabelia. ⁵ Pablo pibisiacuene itsa exana, nexata papecana-matacaitorobivi tapëta naponana Cesarea tomarabelia peneconitsinexa Pablo, jai nacuaevetsinë Festo bajarapamonaejavabelia.

⁶ Bajarapacuenia nacuaevetsinë Festo pejumaitsicujinae, nacuaevetsinë Festo abaxë ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevetsinë Festo eca itsajota nacuaevetsinë ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsënëtsiaya neconitatsi beayaineconi pexainaenëcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenë. Nexata xanë judíovi pitorobilivaisijavabelia,

templobojavabelia ata, Romanonacua pepo pevetsinëjavabelia ata, apo naneconitsinë, jai Pablo nacuaevetsinë Festojavabelia.

⁹ Nexata nacuaevetsinë Festo yanijoba Pablojavabelia judíovi pejamatabëcuenebarëyanexa nacuaevetsinë Festojavabelia. Nacuaevetsinë Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevetsinë Festo Pablojavabelia.

¹⁰ Pablo nexata jumaitsi:

—Nucajë rabaja majotaje xamë nitabarata. Tsipaji nijatuxanenë, Romanonacua pepo pevetsinë, itoroba majotaje peneconitsinexatsi pibisiacuene pexanaevi. Bajaraxuata apo beneitorobimë itsajavabelia taneneconitsinexamë. Itsacuene ata pibisiacuene apo exanaenë judíovijavabelia. Bajarapacuene xamë xaniavaetsia yapëtaneme baja cajena.

¹¹ Itsa pepacuene naneconitsipajë, nexata itsa nebeyaxuabijitsia tajaneconi yabara, nexata apo najamatabëxainaenë tsipae tavecuapanepaenexa tatëpaejava. Itsiata baitsi jane pacuenia mapamonaeneneconitsiajumaitsi, apo xaniajai cajena. Nexata acuenebi itsajivi ata tanecanajetsijava mapamonaenepcobeyabeliaje saya aneconijibia tanebeyaxuabinexa. Nexata jane baja xanë cavajëtatsi taneitorobinexamë nijatuxanenëjavabelia, Romanonacua pepo pevetsinëjavabelia, bajaraponë pitabarata taneneconitsinexa, jai Pablo nacuaevetsinë Festojavabelia.

¹² Nexata nacuaevetsinē Festo barēcuaicuaijai pijajivi, pejamatabēcueneyavenonaevitsi. Bajaraxuacujinae nacuaevetsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevetsinē Festo Pablojavabelia.

Pacuenia Pablo navajunupaeba nacuaevetsinē Agripajavabelia yabara pelivaisi

¹³ Pablo pevajētsicujinae nacuaevetsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaevetsinē Agripa, pijava Berenicevēnēva yajava, parena Cesarea tomaraberena. Parenabeje pebajacobinexabeje nacuaevetsinē Festo pejanapatsinēxae nacua pevetsinēnexa.

¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevetsinē Festo tsipaeba nacuaevetsinē Agripajavabelia Pablo yabara. Nacuaevetsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua itsa evetaje, bajaraponē naneconitsiaexanatsi. ¹⁵ Nexata itsa ponajē Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanējavaberena. Bajarapamonae nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaitsinē

bajarapamonaejavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuaijainexa paneconi yabara neconitatsi,” janē bajarapamonaejavabelia, jai nacuaevetsinē Festo nacuaevetsinē Agripajavabelia.

¹⁷ Icatsia nacuaevetsinē Festo jumaitsi nacuaevetsinē Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajē taecaenexa itsajota ecabiabajē jivi itsa naneconitsiaexanaejitsianē. Nexata itorobajē tajajivi tanetocapatsinexa Pablo xanējavaberena. Tsipaji jamatabējumaitsinē: “Pablo meta pibisiacuene pexanaexae, neconitatsi,” jamatabējanē.

¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabēxainajē. ¹⁹ Saya judíovi jumeanaenotatsi Pablo Dioso pejumecovēnētsijava yabara. Jumeanaenotatsinua Pablo

petsipaebijava Jesús petēpaejava yabara ata. Jesús yabara Pablo jumaitsi: “Jesús raja apo tēpae. Petēpaecujinae baja icatsia Dioso asaēyaexanatsi,” jai Pablo bajarapajudíovijavabelia.

²⁰ Nexata xaniavaetsia apo yapētaenē pacuenia exanaejitsianē bajarapacuene yabara. Nexata

jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaee caneonita,” janë picani. ²¹ Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaeyaexanjë. Nexata pamatacabi necuenecaëjëpaena, itorobianajë vajatuxanenëbejejavabelia, jai nacuaeavetsinë Festo nacuaeavetsinë Agripajavabelia.

²² Nexata nacuaeavetsinë Agripa jumaitsi nacuaeavetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaeavetsinë Agripa.

Nexata nacuaeavetsinë Festo jumaitsi nacuaeavetsinë Agripajavabelia:

—Meravia rabaja jumetaename Pablo penavajunupaebijava, jai nacuaeavetsinë Festo.

²³ Nexata meravia pitsijavata nacuaeavetsinë Agripa pijava Berenicebeje bitso naitabëtabeje. Nexata naponabeje jivi penacaetuatabibiboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaeavetsinë Festo pijajivi itoroba petocaponaenexatsirena Pablo. ²⁴ Nexata nacuaeavetsinë Festo jumaitsi nacuaeavetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje vajanajuanacaetuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaë tapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonaë vavajaiya nejumai tsabiabi: “Pajitsipajë Pablo pebexuabinexatsi,” nejai tsabiabi. ²⁵ Itsiata baitsi jane xanë apo yapëtaenë paneconi yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorobijitsianë Romanonacua pepo pevetsinëjavabelia. ²⁶ Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonaë ataje, daxita paxamë paneitabarata Pablo penucaenexa pacatocapatatsi maberenaë. Pacatocapatatsi paneyanijobinexa paneconi yabara naneconita. Nexata meta paneyanijobicujinaë xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia. ²⁷ Tspaji acuenebi taitorobijava maponëje Pablo tajatuxanenëjavabelia toyaquinaenejevanë cuyalato xaniavaetsia peyapëtaenexa paneconi

yabara judíovi neconitsijitsiatsi, jai nacuaevetsinë Festo nacuaevetsinë Agripajavabelia.

26

Pacuenia Pablo navajunupaeba nacuaevetsinë Agripa pitabarata yabara pelivaisi

¹ Nacuaevetsinë Agripa jumaitsi Pablojavabelia:

—Catocopatatsi rabaja nenvajunupaebinexa paneconi yabara judíovi caneconita, jai nacuaevetsinë Agripa Pablojavabelia.

Nexata Pablo yaiyataeya bajacoba nacuaevetsinë Agripa. Nexata Pablo jumaitsi nacuaevetsinë Agripajavabelia mapacueniaje:

² —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia.

³ Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pa-judíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesu-cristo yabara pelivaisi

⁴ Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata.

Bajarapamonae neyapētane pacuenia ponaponajē patajanacuata tsiquirinēyojavaveliacujinaenē. Neyapētanenua pacuenia ponaponajē Jerusalén tomarata ata. ⁵ Judíoviyajuvēnēvi itsamonae naexana fariseovi. Nexata bajarapamonae Dioso Moiséspijinēta penajumecopatsilivaisi, bitso jumecovēnētsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinējavaveliacujinaenē catsitecaponaponajē fariseovi pecujarubicuene. ⁶ Bajarapamonae neneconitsijitsia tsipaji baja xanē jumecovēnētajē petēpaevimi itsamatacabi Dioso icatsia piasaēyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovēnētajē. ⁷ Daxita raja paxanē, Israelpijinēmi pexi doce ponēmibeje pape-momoxinē. Pacopiaevetavanapajē Dioso icatsia piasaēyaexanaejavanexa petēpaevimi pacuenia baja cajena tajēvelia Dioso najumecapanepaeya jumaitsi patajasalinaivimijavabelia. Bajaraxuata najamatabēcuenecopatsiaya pavajētabiabajē Diosojavabelia. Patonacuenebavanapajēnuca caematacabi canacujitsia, meravi yajava. Agripa, nacua nevetsinē, abaxē nenamuxunaevere. Dioso icatsia petēpaevimi piasaēyaexanaejavanexa, copiaevetaponaponajē. Bajaraxuata judíovi neneconitsijitsia. ⁸ Pētsa pajamatabējumaitsimē Dioso yabara: “Dioso raja apo caējēpaetsi petēpaevi icatsia piasaēyaexanaenexa,” pajamatabējamē pētsa, jai Pablo bajarapamonaejavabelia.

*Pacuenia Pablo navajunupaeba petaicapon-
aejava Jesús pejumecovënëtsivi pejebinexa
penaneconitsivi pejebabiabibota yabara pelivaisi*

⁹ Pablo icatsia jumaitsi nacuaevetsinë Agripa-
javabelia:

—Xanë abaxë Jesús itsa apo jume-
covënëtsinë, jamatabëjumaitsinë tsabiabi:
“Xanë bejiobiaexanaenajë daxita pamonae
jumecovënëta Jesús, Nazaret tomarapijinë,
pelivaisi,” jamatabëjanë tsabiabi. ¹⁰ Nexata
bajarapacuenia exanajë Jerusalén tomarata.
Sacerdotevi penamatacaitorobivi taneitorobixae,
ayaibitsaëto Jesús pelivaisi pejumecovënëtsivi
jebaponajë penaneconitsivi pejebabiabibota.
Itsa bajarapamonae naneconitsiaexanatsi,
itsa beyejebatsinua, netsitanepana
bajarapacuenia pebeyejebijavatsi. ¹¹ Pamonae
Jesús pelivaisi jumecovënëta, anijatonë
jumaconibabeyaexanabiabajë judíovi penacae-
tuatabiabibonëjava. Bajarapacuenia picani
exanaponajë bajarapamonae pecopabinexa
Jesús pelivaisi pejumecovënëtsijava. Xanë
picani cueneitoyanë bajarapamonae. Nexata
itsanacuajava penaetomaranëjava ata, jaitarutajë
Jesús pelivaisi pejumecovënëtsivi tataicaenexa
tajebinxexa penaneconitsivi pejebabiabibota, jai
Pablo nacuaevetsinë Agripajavabelia.

*Pacuenia icatsia Pablo navajunupaeba pacue-
nia Jesús pelivaisi jumecovënëta yabara pelivaisi*
(Hch 9.1-19; 22.6-16)

¹² Pablo icatsia jumaitsi nacuaevetsinë Agripa-
javabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovënëtsivi, ponajë picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabëcueneta nitoroba tataicaenexa picani Jesús pelivaisi pejumecovënëtsivi tajebinexa penaneconitsivi pejebabiabibota. ¹³ Agripa, nacua nevetsinë, abaxë nenamuxunaevere. Nexata jane baja ponajë Damasco tomarabelia. Nexata tanajetarucaejavata namutua, taniji matonejeepatota athëbëvetsica pinijicotia tanematatoyorotsianaitayotsijava. Naitayota matacabipijjuametocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota. ¹⁴ Nexata daxita paxanë irata pabobenajunuajë. Bajarajota irata jumetaenucajë hebreojumeta athëbëvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamë nijacuata najamatabëcuenebijanaponame,” tanejajjava, jumetaenucajë irata. ¹⁵ Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne. Xanë raja tajajivi netobejiobiaexanaponame. ¹⁶ Nonotabapunare. Catsitanaitajëtatsi raja tacaitapetsinexa tajajivitonënexamë. Xamë nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajëtsianatsi bexëa itsamatacabijavabelia. ¹⁷ Capanepaenatsi raja judíovi pecobevecua pecaitsacueniabiyanima. Caitorobianatsi apo judíovi pijanacuanëjavabelia.

Apo judíovi ata pecobevecua cacapanepaenatsi pecaitsacueniabiyani. ¹⁸ Caitorobatsi rabaja netsipaebinexa apo judíovijavabelia pexanialivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeneconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeneconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeneconimi,” nejai Jesús mapacueniaje athëbëvetsica, jai Pablo nacuaevetsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaitsi nacuaevetsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae

pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniva. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuenepënëyorotsijava Diosojavabelia.

²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani.

²² Itsiata baitsi jane neyjavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiobivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje:

²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeya jane baja asaëyaexanatsi

daxita petēpaevivecua. Nexata pamonaē Dioso pepuajumecovēnētsi tēpa, Dioso icatsia cotocaēvi asaēyaexanaenatsi petēpaecujinae. Nexata bajarapalivaisi tsipaebaponajē judíovijava, apo judíovijava ata. Daxita bajarapamonae itsa jumecovēnēta bajarapalivaisi, pecapanepaenexatsi Diosojavabelia, jai Pablo nacuaevetsinē Agripajavabelia.

Pacuenia Pablo petsipaebilivaisi pejumetaevitsi, sivanajamatabēxainatsi yabara pelivaisi

²⁴ Pablo penavajunupaebijavata, nacuaevetsinē Festo jumevabaxuabatsi.

—¡Pablo, xamē raja saya camatajemaba! Camatajemaba bitso nenacujarubixae, jai nacuaevetsinē Festo.

²⁵ Pablo nexata jumaitsi:

—Festo, pecayiyataenē, nacua nevetsinē. Apo nematajemabi raja xanē. Palivaisi raja pacatsipaebatsi, pepo pexaniajailivaisi.

²⁶ Bajarapalivaisi ajumejunavijibia pacatsipaebatsi tsipaji maponē ecaje, nacua pevetsinē Agripa, xaniavaetsia yapētane bajarapalivaisi. Agripa xaniavaetsia yapētane daxita xua Jesús exana. Tsipaji abaxē pamatacabi Jesús ponapona mapanacuataje, daxita xua exana, muetsia apo exanae.

²⁷ Agripa, nacua nevetsinē, xamē baja cajena jumecovēnētame profetavi bajayata peyaquinaelivaisi. ¿Baja tsabaitsi jane? Cayapētanetsi baja cajena nejumecovēnētsijava bajarapamonae peyaquinaelivaisi, jai Pablo nacuaevetsinē Agripajavabelia.

28 Nexata nacuaevetsinē Agripa jumaitsi Pablojavabelia:

—¿Bepijia tsabaja Jesús pelivaisi jamatabēnejumecovēnētsiaexaname? jai nacuaevetsinē Agripa.

29 Nexata Pablo jumaitsi:

—Vajētajē Diosojavabelia Jesús pelivaisi bepijia panejumecovēnētsinexa. Itsa jume, beaxayocuenia ata panejumecovēnētsinexa. Daxita paxamē patanejumetaeyenaevimē, jitsipajē panejumecovēnētsijava Jesús pelivaisi. Pacuenia baja xanē jamatabēcueneitsinē, Jesús pelivaisi tajumecovēnētsinē, bajara paxamē ata panejamatabēcueneitsinexa. Itsiata apo pacatojitsipaetsi papecacēbinexa mapitsicadenamaētonētaje pacuenia xanē necētanuta, jai Pablo.

30 Itsa baja Pablo najumevereta bajarapacuenia petsipaebijava, nacuaevetsinē Festo nonotapuna. Nacuaevetsinē Agripa ata, pijava Berenice yajava, nonotapuna. Daxita baja penajua-nacaetuatsivi ata nonobapuna peponaenexa.

31 Pepitsapaecujinaelia bajarapamonae najumaitsi:

—Maponēje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara et-sijitsiatsi penaneconitsivi pejebabiabibota, najai bajarapamonae Pablo yabara.

32 Nacuaevetsinē Agripa jumaitsi nacuaevetsinē Festojavabelia:

—Itsa apo cavajētsi tsipae nitorobinexa vajatuxanenēbejajavabelia, Romanonacua pepo

pevetsinëjavabelia, bajaraponë pitabarata
 peneconitsinexatsi, nexata baja picani
 copatsipatsi pepitsapaenexa penaneconitsivi
 pejebabiabibovecua, jai nacuaevetsinë Agripa
 Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaevetsinë Festobana naja-
 matabëcuenevereta baja pitorobinexatsi
 Pablo Italia nacuyabelia, Romanonacua
 pepo pevetsinëjavabelia. Nexata Pablo
 caponaejitsiatsi vajabitsaë pijacapitán,
 Juliovënënë. Itsamonae naneconitsia
 pejinavanapaevi, Pablo yajava, caponaejitsiatsi.
 Ponë Romanonacua pepo pevetsinë, bajaraponë
 pevënë Augusto. Nexata Augusto pijajivi
 vajabitsaë pijacapitánmonaeyajuvënënë Julio.

² Xanë Lucasnë, naponajë Pablota. Adramitio
 tomaraverena pepatsibarco ënëabereca
 parunarecajë. Bajarapamo yaëtanajetarucæjitsia
 manuamene muxubërëa penaetomaranëjava,
 pepatsinexa Asiavënë nacuyabelia. Paya-
 javaponajëbeje Aristarco, Tesalónica tomarapijinë.
 Tesalónicatomara eca Macedonia nacuata.

³ Meravia pitsijavata epatua panapatajë
 Sidón tomarata. Capitán Julio yaiyatanetsi
 Pablo. Bajaraxuata Sidón tomarata Pablo
 tocopatatsi penonotajunaenexa barcoënëvecua,
 penasivaxainaenexa peyapëtaevitsijavabelia,
 perajutsinexatsinua xua namatavenona Pablo.

⁴ Bajaraxuacujinae icatsia panaropobajë

Sidón tomaravecu. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërëa patanajetarubenaenexa. Nexata Chipretunaeto patatsavenononia paxenetanajetarubenajë. Tsipaji bajarapamuxubërëvelia jovibo beyajetayo. ⁵ Cilicia nacuabeje Panfilia nacuabeje canacujitsialia papaliajë. Nexata payaëtajë Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuayabelia. Nexata baja pabarcota pananajetarubenajë, pavecuanonobajunajë. Nexata icatsia capitán Julio panerunaeyaexana Alejandría tomaraverena pepatsibarco ënëabelia. ⁷ Anijamatacabianë bajarapabarcota pananajetarubenajë. Tsipaji beaxayo najetaruca. Pinijicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tsipaji bajarapaitapavelia jovibo beyajetayo. ⁸ Piayapëbejecuenia panajetarubenajë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecuapanepapona baja. Nexata baja bitso panetsiyayi menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja

copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniaje:

—Xanë raja yapëtaniji nacatsiayai baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitsibeje barco pexainaenë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

Pacuenia pinijjoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa

peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae ita tane bajarapajovibo, jitsipa pevajënaeyabelia peyacapon-aenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caepatoyocujinae pinijijoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponanexa jovibo. ¹⁶ Paponajë tsiquritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pegasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponanexa jovibota. ¹⁸ Meravia abaxë pitsijavata tsiteca pinijijovibo piyaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia

penereca barcoënëta pecanacuenebijavanë.
²⁰ Bajayajebi baja cajena apo pataenë
 matabipijijuameto, tulupu ata. Tsipaji
 bajayajebi pinijijovibo, ema yajava, tsitecanuca.
 Belia pajamatabëjumaitsinë: “Apo yapanepaetsi
 meta baja tsane,” pajamatabëjanë.

²¹ Pamatabibeje bajarapacue ne pataniji, ba-
 jara pijinia pamatabibeje apo paxaenë pataxae-
 java. Nexata Pablo nonotapuna bajarapamonae
 petuatuajëta. Pablo jumaitsi:

—Itsa paxamë panejumecovënëtsipame
 pacuenia pacatsipaebatsi, xanepanaejitsipa.
 Nexata maberena je apo yaponae tsipaetsi
 Cretatunaetovecua. Apo bejiobitsinua
 tsipae. ²² Itsiata baitsi jane aeconoxae pëtsa
 panatsinajamatabëxainame. Itsajivi ata raja
 paxamëyajuvënëjivi itsiata apo tēpae tsane.
 Èbarco rajane baja naxuabiana. ²³ Ajena
 baja cajena, pameravi, netsitanaitajëta ángel,
 Dioso pitorobinëtsica. BajarapaDioso xanë
 pijajivitonënë. BajarapaDioso tonacuenebapon-
 aponajë. ²⁴ Nexata ángel nejumaitsi: “Pablo,
 pëtsa junavame. Itsiata raja apo tēpaemë tsane.
 Tsipaji raja naitajëtsijitsiamë Romanonacua
 pepo pevetsinë pitabarata. Xamë raja
 nejamatabëcueneta Dioso capanepaenatsi
 petēpaeyaniva daxita pamona e yajavanajetaru-
 came mapabarcotaje,” nejai ángel. ²⁵ Nexata
 daxita paxamë panajamatabëcuenesaëre pane-
 jamatabëcuenebëjajjavavecua. Najamatabërutajë
 Diosojavabelia vajanacacapanepaenexa Dioso.
 Yapëtaniji Dioso vajanacacapanepaejavanexa

pacuenia baja ángel netsipaeba. ²⁶ Itsiata baitsi jane cajena jovibo nacayacaponaena itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸ Nexata bajarapamonae pemaëtota caëjëtapona xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtojopaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepijia peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capítan pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pavajabitsaëmë panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matacabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaemë. ³⁴ Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo pait-sacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitzijavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava.

³⁶ Daxita nexata bajarajota ajamatabëcuenesaëreca baja. Nexata bajarapamonae ata xane pexaejava.

³⁷ Doscientos setenta y seis papajivinëbeje daxitata

paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matabi tsarucaponae, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapatajetabojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtajarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanucacae. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaë pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonaë yapëtane pejuejava,

copiaya pejuenexa pitapayabelia copiaya pepatsinexa matatsënëabelia. ⁴⁴ Bajaraxuacujinae pamonaē apo yapētae pejuejava, cotocaevi itoroba tablapanējumata, barcopanēmijumatanua, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetojavata yabara pelivaisi

¹ Itsa baja daxita paxanē xaniavaetsia papanepajē matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanucaē. Nexata bitso cainejeba. Panejunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenē, bebula, pitsatabijirava isotojavaverena piatajujavavecua. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponē jivibenēje. Bajaraxuata man-uamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabēcuene, jomo pesinijavatsi peyatēpaenexa, najai Maltatunaetopijivi Pablo yabara.

⁵ Nexata Pablo nacobenēnēbiaxuaba jomo pejopaenexa isotojavabelia. Pablo itsiata apo itsacuene. ⁶ Nexata daxita Maltatunaetopijivi jamatabējumaitsi Pablo yabara:

—Aeconoxae meta Pablo cobeyajinaena. Itsa jume, irata meta petēpaenē jopaena, jamatabējai.

Nexata bajarapamonae bajayaepato evetanubenaē ata Pablo petaenexatsi jomo pecobesinijavatsi peyaitsacuenejava, itsiata Pablo apo itsacuene. Nexata icatsia bajarapamonae itsacuenia najamatabēxaina Pablo yabara. Nexata najumaitsi bajarapamonae:

—¡Maraeta papebi diosonēje! najai.

⁷ Maltatunaeto pevetsinē pevēnē Publio. Nexata itsajota panubenajē, imoxoyo bobena Publio pijairanē. Nexata bajaraponē panecopiapita pexaniacuenia. Bajaraponē pijabota panajinavanapajē acueyabi pamatacabibeje. ⁸ Publio paxa avitane tsanucaē camata. Romaebanucatsi. Bitso suliabatsi. Nexata Pablo taeyojopalia. Vajēta Diosojavabelia. Bajaraxuacujinae piavitānenē pematabocotojumavereca Pablo nacobebuta. Nexata baja Pablo jamatejemayaexana piavitānenēmi. ⁹ Bajarapacuene Pablo itsa exana, nexata daxita piavitānevi Maltatunaetopijivi pata Pablojavaberena. Daxita bajarapamonae ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexēajavabelia itsabarcota panaponajē, nexata Maltatunaetopijivi panerajuta daxita patanamatavenonaejavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vënētunaetota panajinavanapajë acueyabi pajuametobeje. Bjaraxuacujinae baja icatsia panaponajë barcota. Bjarapabarco patavajënae pata Alejandría tomaraverena. Bjarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bjarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa.

¹² Bjarapabarcota panaponajë. Nexata jane baja panapatajë Italia nacuyabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje.

¹³ Bjaraxuacujinae icatsia panaropobajë. Paponajë manuumene muxubêrëa. Nexata icatsia papatajë Regio tomarata.

Nexata meravia pitsijavata patacovëverena pexaniajovibo najetaruca. Nexata bjarapajovibo paneyacapona patavajënaeyabelia. Nexata icatsia anijamatacabibejecujinae papatajë Puteoli tomarata.

¹⁴ Puteoli tomarata pacaxitarabajë Dioso pejumecovënëtsivi. Bjarapamonae paneasiva caesemana patanajinavanapaenexa bjarapamonaejavata. Bjaraxuacujinae jane baja matatsënëa paponajë Roma tomarabelia.

¹⁵ Roma tomarapijivi, Dioso pejumecovënëtsivi, patavajënaelia panevënëlivaisitane patanajetarubenaeva. Nexata bjarapamonae panecopiajairëna. Nexata penamataxainaebitsaëto panemataenena

Foro de Apiovēnjavata. Bajaraxuacujinae icsitsia itsabitsaēto panemataenena Tres Tabernasvēnjavatalia. Nexata Pablo itsa tane bajarapamonae, pexaniajamatabēcuene rajuta Diosojavabelia. Nexata ajamatabēcuenesaēreca Pablo bajarapamonae petaejavata. ¹⁶ Nexata jane baja papatajē Roma tomarabelia. Nexata Roma tomarata capitán Julio rajuta baja pamonaē naneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinē pecobeyabelia. Itsiata Pablo tocopatatsi saicayabota peponaponaenexa. Caenē vajabitsaēnē evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacuene apo exanae atanē vajavēna judíovijavabelia, vajasalinaivi pecujarubicuene jumecovēnētsiaponaponaē atanē, itsiata vajavēna judíovi nevaetaba Jerusalén tomaratalia. Nexata necanjeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuene pevetsivi, neyanijoba xua yabara vajavēna judíovi neneconita. Nexata baja picani Romano nacuapijivi

necopatsijitsia. Tsipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia. ¹⁹Itsiata baitsi jane vajavëna judíovi, pamona neneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maberenaje Romanonacua pepo pevetsinë pitabarata taneneconitsinexa pibisiacuene itsa exanajë. Itsiata xanë apo jitsipaenë juya bajarapamona taneconitsijava tajanacuapijivijavabelia.

²⁰ Bajaraxuata nexata pacajunatatsi patacataenexa patacabarëcuaicuaijainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuaverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsipajë patanetsipaebinexamë pacuenia Jesús pelivaisi jumecovënëtame. Daxitanacuanëpijivi baja cajena baracuaicuaijai tsabiabi bajara papejanapit-sapaelivaisi: “Apo pexaniajailivaisi cajena bajarapalivaisi. Díoso cajena apo nacatocopatsi

bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi caējëta matabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëtoxaneto parena pabota Pablo ponapona. Nexata Pablo bajayacunua petaxuxubicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaitsi Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. ²⁴ Itsamonae bajarapamonaeyajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinë Espíritu Santo pejamatabëcueneta tajëvelia yapëtaeyaexanatsi paxamë apo panejumecovënëtsijavanexa Jesús pelivaisi. Nexata profeta Isaíaspijinë Espíritu Santo itorobatsi

petsipaebinexa vajasalinaivimijavabelia
mapacueniaje:

Paxamë raja picani pajumetaeyabiabianame
palivaisi pacatsipaebabiabiana. Itsiata
apo pajumeyapëtaemë tsane xua yabara
bajarapalivaisi pacatsipaebabiabiana.
Paxamë raja picani pataeyabiabianame
xua pacatsitaexanabiabiana. Itsiata
apo payapëtaemë tsane pajamatabëcuene
yabara bajaraxua pacatsitaexanabiabiana,
jai profeta Isaíaspijinë vajasalinaivimijavabelia.

²⁷ Bajarapacuenia jumaitsi profeta Isaíaspijinë
tsipaji baja cajena Dioso tajëvelia jumaitsi paxamë
apo panejumecovënëtsijavanexa yabara mapacue-
niaje:

Bajarapamonae ajamatabëcuenetaja tsane. Nexata
benamuxuacabiaya pejinavanapaevi
tsane. Benaitaxutotsaquebiaya pejina-
vanapaevi tsane. Itsa bajarapacuenia
apo itsipae, nexata yapëtaejitsipa
pajamatabëcuene yabara tsitaexanatsi
xua tane. Jumeyapëtaejitsipanua palivaisi
tsipaebatsi. Pejamatabëëthëtojavavetsina
jumeyapëtaejitsipa. Nexata naja-
matabëcuenepënëyorotsipa perujuja-
matabëcuenevecua. Nexata xanë ja-
matabëcuene xanepanaeyaexanaejitsipajë
pibisiacuenevecua,

jai baja cajena Dioso bajayata tajëvelia paxamë
apo panejumecovënëtsijavanexa yabara, jai Pablo
judíovijavabelia Roma tomarata.

²⁸ Pablo icatsia jumaitsi judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijävaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuaicuaijai tsanajetarubena.

³⁰Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamonaesivaxainabiabatsi. ³¹Pamonaesivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

**Dios pejumelivaisibaxuto
pejanalivaisibaxuto
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

bc03f416-faf8-5000-bfb5-5ca8a3fa98cf